

Matyu

Jesus anen tubun bagen

Luk 3:23-38

¹ Yanak e irig ipalu den in Jesus Kristus san tubun bagen a. Jesus in Dawid lo ilasa ya, agod Dawid man in Abraham lo ilasa ya. ²⁻⁵ Abraham log ipalug Kin Dawid lo man, tubun bagen san yanak igo iri a: Abraham, Aisak, Jakob, Juda in tein muroun dida. Aria, Juda man Peres in Serah da tamadi, agod uraru an tinadi Tamar. Aria, Peres, Hesron, Ram, Aminadab, Nason, Salmon, Boas (Boas tinan Rahab), Obed (inanan tinan Rut), agod Jesi. Aria, Jesi man Kin Dawid taman.

⁶⁻¹¹ Dawid log ipalug saen Babilon san kin yu yabisag Jerusalem daon ipani dugo, Juda adi ikudai go Babilon na subanek tamolpein igo won diau go ante dumado na yan san saen lo man, tubun bagen sad yanak igo iri a: Dawid, Solomon (in tinan man, pein nek a imug Uraya inane ya), Rehoboam, Abijah, Asa, Jehosafat, Jehoram, Usia, Jotam, Ahas, Hese kaya, Manasei, Amon, Josaya, agod Jehoyakin in tein muroun dida.

¹²⁻¹⁶ Aria, Juda adi Babilon na dumado yan san saen ibiseig ipalug, Jesus ilasa yan san saen lo man, tubun bagen sad yanak igo iri a: Jehoyakin, Sealtiel, Serubabel, Abiud, Eliakim, Asor, Sadok, Akim, Eliud, Eliasar, Matan, Jakob, agod Josef nek a Maria inane ama ya. Maria nek a Jesus igansi a, in tamol nek a Kristus tabol dama ya.

¹⁷ Aria, Abraham log ipalug Dawid ilasa yan tubun 14 lo dar igile ya. Anteg, Dawid log ipalug Juda adi Babilon na dumado yan san saen lo, tubun 14 taida lo dar igile ya. Aria, anteg tubun 14 taida lo dar igile gug Kristus ilasag malan ipuk a.

Kristus ilasa ya

Luk 2:1-7

¹⁸ Aria, Jesus Kristus dugo ilasa amaiak san dal man igo ya. Maria tinan taman in Josef inane san nien dupani, ago yak man Josef pein an da gamugo dien dugo, Awan Urgan san dabai iganeg Maria luan anda yan tamolpein fidian dile dulon a. ¹⁹ Agog in iwon Josef man tamol itaot ago yan lo in pein an malak malak miai ipani man imoi, agog pasak nam pein an ibiseip isol yau o ilo sou ago igane ya. ²⁰ Saen in san ilo sou ago igane man, yen dugo Tubun ak san enel nionamin lo san na ilasag irupeig ibol, “Josef, Dawid nanun, Maria on iwo yak njen o ilo ta gidigheid na wa, fun dugo, nanuk Maria tinan lo man Awan Urgan san dabai lo ilasa la ya. ²¹ In nanuk tamol ak igansi wa, ago dop on yan Jesus ubol a, fun dugo, in in san tamolpein inaned aupasek san ai wadan an lo patud ipasi wa.” ²² Mel an fidian dilasa yan san fun man igo ya, wagan Anut ru fulalek profet ta awan lo ibol ilasa yan gamu nunon fo tusuda ya. ²³ In ibol, “Pein baras ta kitek tamol ta da dutor man tia yak, tinan lo nanuk tamol ak ta ilasa wa. Ago dop yan Imanuel dubol a.” (Yanak Imanuel fun man igo: “Anut id da tumado da.”) ²⁴ Agog saen Josef nion lo imasa man Tubun ak san enel awan irig, Maria iwon on inane san panu na diaug iwon on ida

dumado se ya. ²⁵ Ak man saen inaneg yau man kitek iwon on ida dien man tia ya, agog yaug peinan nanuk tamol luan lo yan igansi a. Agog Josef nanuk an yanan Jesus ibol a.

2

Manau tamol Jesus dile wo dupalu ya

¹ Jesus Betlehem na ilasa, Betlehem man tan tubun Judea na yen da. Saen an lo Herod in kin imado se ya. Saen Jesus ilasa man manau tamol adi ad ilasa dak lo yak Jerusalem na dupalug gidigheid dusumiaen se ya, ² “Nanuk a ilasa amaiak dugo mi ak i? Inj murnap Juda adi sad kin imado wa. Ilasa yan man malon a, man dugo, insan patui ad ilasa dak ate fun iganeg ided do mile ya, an lo man ubou an mile wo mupalu ya.”

³ Saen kin Herod insad ninen ago ilon man ilo sou ifini saian, ago dugo tamolpein Jerusalem na dam sisem ilo sou gidigheid dinane se ya. ⁴ Agog Herod pris gurman adi, agod kubiaen san girek manau adi dida itumanai go isumianaig ibol, “Aben dugo amaiak lo Kristus ilasa wak i?” ⁵ Ago dugo dubol, “Inj aben Betlehem o Judea na amaiak ate ilasa wa. Man dugo, wagam ru fulalek san profet ta igireg ibol,

⁶ ‘O Betlehem, tan Judea na,
on Judea san gugoi gurman lulunad lo panu kawan ak on tia ya.

Man dugo, mitep on lo gurman ta ilasa wa.

Gurman an naisag tamolpein Isrel itirnai a.’ ”

⁷ Murnag Herod pasak nam manau tamol adi igiaig dupalug isumianai, “Saen dugon lo patui

fun iganeg ided ak i?” ⁸ Agog Betlehem na idinaig diau o dugo ago ibol, “Aup nanuk an niñen o abañ ale wo uyanan a. Saen ale dop ru añanep apalup, abol ñalonj dop, ñai dam ñaup ubou an ñile wa.” ⁹⁻¹⁰ Saen kinj san niñenj dulong go itout man fun diganeg Betlehem na diau a. Ago dugo patui a ad ilasa dak lo dile yan, afon ilasa dag dile ya. Saen patui an dile man ilod uyanan geig go uyad isusa ya. Agog patui an imug naod na yaug, nanuk ab a lo yen dak ate gug, ab fufo ago ided dugo yen se ya. ¹¹ Agog ab an ate dilasag diladug, nanuk tinan Maria da dumado dugo diliai man, ditakoksig ubou an dile ya. Ago gug melmel naod lak na lak na disini an, awad dupasi idug lou dupani a. Mel naon ibol gol, agod ubou san marasin ta yanñ frankensens dubol dan, agod marasin ta yanñ mirr dubol damaiak dupani a. ¹² Agog dumul man Herod san na ta diau na ya, man dugo, insad ñionj lo Herod san na ta diau na wo Anut geg ipidinai a. Ago yan lo dal senamo diñaneg sed naod na dumul diau a.

Disol go Egipta na diau a

¹³ Aria, saen dumul man Tubun ak san enel ñionamin lo Josef san na ilasag irupeï, “Masa kisaek onj pe nanuk tinan da unjal pe tan Egipta na ante asol pe au a. Aup ante amado dop saen isudap ñai amul o ñabol dop amul. Man dugo, Herod nek nanuk an daonj ipani wo abañ ile da.” ¹⁴ Agog Josef imasa kisaek onj go nanuk tinan da tidom lo injal go, ab dibiseig fun diganeg Egipta na diau a. ¹⁵ Diaug Egipta na dumado yau dugo Herod imat. Ago gug Egipta dibiseig Judea na dumul diau a.

Niñeñ nek e ru fulalek san profet wagam ibol ago mi nuñon ilasa ya. Tubun en ibol, “Egipta ilon lo ñaineñ nanug ñuwagiñ go tan en ibiseig ilasa ya.”

¹⁶ Saen Herod mañau tamol dirawi ago ilon man, tiñaen imumari geig a. Agog wagai tamol idinaig Betlehem na fidian mi lubanek diaup ante nanuk tamol anañar urarug isuda agog anañar urarug idu yan fidian dufu dumat o diau a. Man dugo, imug Herod mañau tamol an isumianaig ibol, “Nal dugon lo patui an fun iganeg ided se yak i?” Ago dugo iñ ru naon durupeig dubol, “Anañar uraru yau la ya.” ¹⁷ Dal an lo ulon tamol yañan Jeremaia wagam niñeñ a ibol ilasa yan nuñon ilasa ya. Iñ ibol,

¹⁸ “Kilagun ta panu Ramah lo dulon a,
 tinañ igane dugo tubun mi isasai se ya.
 An man Rasel nanun muroun niñedi wo tinañ yabi
 se ya.
 Ilon diñane gug imoi, man dugo,
 iñanen nanun muroun fidian dumat pasik a.”

Inj dumul ak man Nasaret na diau a

¹⁹ Aria saen Herod imat man, Tubun ak san eñel Egipta na yaug ñionamin lo Josef san na ilasag irupeig ibol, ²⁰ “Masap nanuk tinañ da uñal pe tan Isrel na ante au a. Man dugo, tamol iñ dufuni imat o digane yan man gubak mi dumat la ya.” ²¹ Agog Josef imasag nanuk tinañ da iñal go tan Isrel na atna diau a. ²² Saen dumul diau man, Akilaus taman Herod aben iñaneg kiñ imado se yan Josef ago ilon a. An niñen o Josef irer an lo provins Judea ante imado wo man imoi a. Agog afon ñion lo Anut ru kagin ipanig Jerusalem na ta yau na

wo ibol a. Ago tag Jerusalem irinjanig Galili na yau a. ²³ Agog yaug aben ta Nasaret dubol dak lo imado se ya. Ante afon ru ta wagam Anut san ulon tamol adi dubol an nujon ilasa da ya. Njinen an igo ibol, “Tamolpein inj tamol an njinen o Nasaret tamol dubol a.”

3

*Jon suguek tamol Jesus san dal ikubine da
Mak 1:1-8; Luk 3:1-18; Jon 1:19-28*

¹ Saen malak malak lo Jesus gamugo ilasa man, Jon suguek tamol dubol dan ipalug, Judea na tan kawan ak lo ru ifulale se ya. ² In ru kuai te iganeg ibol, “An ilom ibileksa wa, man dugo, Anut san kagin panek an sumeik ipanad la ya.” ³ Profet Aisaia tamol an njinen o wagam mi igo ibol a, “Tamol ta san kilagun tan kawan ak lo iwagin go ibol,

Tubun en injanen dal akubunep itaot yen a.”

⁴ Aria, Jon san biouj tinin fo idiri man kamel san fufulun nam igane ya. Agod san let luan na man makau san sujulon nam igane, agod san ananj man sis tutubun agod nini* sad dubei bulbal bulbal dineg ilasa damaiak mi ile dop yani da. ⁵ Saen injsan urat fun iganep ru ifulale se man, tamolpein wei mi Jerusalem nag Judea ilon lo fidian, you Jordan yen dugo giranjen na aben an fidian dupalug ru dulon se ya. ⁶ Agog saen injsan ru dulon man aupasek digane na yan walal te dubol ilasa dugo, Jon you Jordan lo isuguai idu ya.

* **3:4:** Kunjobnjob

⁷ Ak gug saen in̄ tamol wei mi Farisi agod Sadyusi ago in̄ isuguai o naon na dupalug dilasa dugo yil a, agog ru dabai ipidinaig ibol, “An̄ mot nanun moroun! Enti Anut san tin̄ae saian mitep ilasa wan nin̄en o ru kagin ipanañ dugo asol dak i? ⁸ An̄ kagin mok a ilom ibilisa dak iri panig yen dan mi agane ilasa wa. ⁹ An̄ an̄sem ilom lo igo ta abol na wa, ‘Abraham man mañ tamama, an mañ o idaisuda ya.’ Man dugo, ñai en ñurupaian̄ itaot da, Anut ilon ibol tap man, pat e dien den ka in̄jilaip ibilaip Abraham nanun muroun mok dilasa wa. ¹⁰ Pilagis ai dabin lo yen la ya. Ai fidian a nun̄od uyan uyan ta ifu na dan, Anut itarep yai lo yabi yaup inanai yau a.

¹¹ “Ñai you lo mi an̄ ñusuguan̄ da, ago dop tamolpein naod na an̄ ilom ibilisa yan kuai isi wa. Ak man tamol a ñai patug fo ipalu dan in̄san dabai ñaisag dabai irin̄ani geig a. Ñai man tamol gidad a, amaiak nin̄en o in̄san sendal ñisini san o yan̄ag tia ya. Gug tamol en man Awan Urgan lo isuguan̄ a, agod Urgan an san yai nam ifulanañ pe ikok alasa wa. ¹² In̄ banin lo kon gilek lo idirai san bioun̄ yabig imado da. Aben ate urat a igane wan ikubineg ante itur da. Uyan ak senamo idirai dop, metmet adi yabi yau o da. Ago dop kon anañ ab lo itumani wa. Ak man metmet adi man yai lo isuwari yau a. Agod tamol ta yai an̄ igane imat san tia ya.”

Jon Jesus isugui a

Mak 1:9-11; Luk 3:21-22

¹³ Aria saen ta Jesus Galili ibiseig you Jordan lo Jon isugui wo yau a. ¹⁴ Ak man Jon ipadau go ibol,

“Onse amaiak ηai suguag a. Ata wo on ηusuguo wo ubol go ηaisag na palu i?” ¹⁵ Jesus ru naon irupeig ibol, “Gidad umoi dop ago ilasa wa. Id kagin itaot ak fidian tigane san an tigane itout o uyanan a.” Ago tag Jon awan mi iri a. ¹⁶ Agog Jon Jesus isugui a. Nek saen a Jesus you ibiseig tan fo isuda man, kumaen panu san dalawan awan pasek go yen dugo, Anut san Ur muluk on idug, in kabunan fufo imasi dugo ile ya. ¹⁷ Agog kumaen panu lo wagin ta ininon idug, igo ibol dugo ilon, “En man ηaineg Nanug, ηaineg bubeg mok, in ninen o ηai ilog tubun mi uyanan da.”

4

Ur saian a Satan dubol dan Jesus bitinaek lo igane ya

Mak 1:12-13; Luk 4:1-13

¹ Aria, Jon Jesus isugui itout man, Urgan in Jesus iduduwig tan kawan ak lo yaup an lo Satan in bitinaek lo igane wa. ² Ante man Jesus sen anan lo geg ipani a. Nal 40 ad tidom da anan ta yani na ya, ak ninen o nal wadan ante man imatigen saian geig a. ³ Ago dugo ilo ηanek san ur saiak an inisan na ilasag irupeig ibol, “On Anut Nanun tap, ubol dop pat en bret on ibili wa.” ⁴ Ak man in ru naon irupeig ibol, “Girek ta buk lo igo ibol, tamol bret lo mi ta kumaen imado na da, tia, ru a fidian Anut awan lo ilasa dan lo mi in ka kumaen imado wa.”

⁵ An itout go Satan inaneg Jerusalem na diaug, lak na tempel san nudun fufo igunig itur a. ⁶ Ago dugo irupeig, “On Anut Nanun tap sokalik udu, man dugo, girek ta buk lo igo ibol,

‘In inanen enjel irupidai dop kagin dupano wa.

Banid nam disawo wa,
kabelan pat on nje ifini banau.’ ”

⁷ Ago dugo Jesus ibol, “Girek ta buk lo dam igo ibol, on mel ta gane tap lo Tubun en onane Anut an bitinaek lo ta gane na wa.”

⁸ Agog afon Satan Jesus inaneg did lak na geig ak kabunan fufo igunig itur dugo tan en san aban fidian, agod inaned girager dam, ikubiai pani a.

⁹ Agog irupeig ibol, “On takoksip ubou ag ule tap man, nai mel e ule den fidian nupano wa.”

¹⁰ Ak man Jesus ru naon irupeig ibol, “O Satan sen lasa wau! Man dugo, girek ta buk lo igo ibol, ‘On Tubun en onane Anut mi ubou an ule wa. In sen mi ninen o bigabeg urat gane wa.’ ”

¹¹ Ago ibol dugo Satan ibiseig yau a. Agog enjel dudug kagin dupani a.

*Jesus inanen ru fulalek san urat fun igane ya
Mak 1:14-15; Luk 4:14-15*

¹² Aria, Jon dusubanig subanek ab lo digane ya. Saen Jesus ninen an ilon man aben an ibiseig Galili na yau a. ¹³ In sinanen panu Nasaret ibiseig, yaug Kaperniam na imado ya. Taun an you tilianek ta, you uyanan ak man, yan an You Galili dubol dan, siniren na yen da. Distrik an gugoi uraru a yan ad Sebulun agod Naftali amaiak sad tan.

¹⁴ Dal amaiak lo awak aban ta profet Aisaia ibol an nunon ilasa ya. In ibol,

¹⁵ “Tan Sebulun agod tan Naftali,
you tilianek siniren na yan, you Jordan aen
ate,

tan Galili gob wei mi ante dumado dan, tan an
niñen o ñabol da.

¹⁶ Abañ an san tamolpein a tidom tubun lo du-
mado dan,
lilaman tubun ak dile ya.

Agod ensauta a materñ san miriau lo dumado dan,
ilalanñ inñsad na ilasa ya.”

¹⁷ Nek saen an lo Jesus fun iganeg ru ifulaleg
ibol, “Ilom abilisa, man dugo, Anut san kagin
panek man anñsam na ipalu sumeik la ya.”

*Jesus inñsan megeloum malmalan ak igiai a
Mak 1:16-20; Luk 5:1-11*

¹⁸ Jesus You Galili gigin irig itor dugo tamol ta
tein da yil a. Tamol an imug yañan Saimon, agod
yañan ta dam Pita dubol da. Agod tein Andru.
Uraru an iy ñalañal, ago yan lo inñaned dob you
lo dubal idu dugo, Jesus ipalu ya. ¹⁹ Agog irup-
idai, “Ñai ñieg abag ari gup tamol añal san mañau
ñipitenñanañ a.” ²⁰ Agog dob dubal yen dugo ñien
aban diri kisaek oñ a. ²¹ Jesus you aen gigin irig
isuda yau man afon tamol ta tein da yil a, Jems
Sebedi nanun agod tein bakanan ak yañan Jon,
uraru an wog fo tamad Sebedi da dob duwei se
ya. An dam urarum igiai a. ²² Agog urarum wog fo
dudu kisaek oñ go tamad dibiseig Jesus ñien aban
diri a.

*Jesus ru ifulale dugo tamolpein subam ifu ak
ikubuniai a
Luk 6:17-19*

²³ Aria Jesus aben Galili ilon lo fidian itiliani
pasik go sad ubou ab ilon lo mañau ipitenñanai
dugo, Anut inñanen kagin panek an san bilalun

dam malak malak ifulale se ya. Saen an lo tamolpein ilod lo subam naon funfun fidian agod n̄ied banid ikikai an ikubuniaid idu se ya. ²⁴ Ago tag n̄ijen in̄ n̄ijen o ifurak yaug tan Siria ilon lo in̄san yaŋan tubun geig ilasa ya. Ago yan lo tamolpein fidian subam amad da yan diŋal go san na dupalu ya. Tamolpein madai gidigidad tinid lo, agod subam naon funfun, tamolpein ur saiak saiak ilod lo yen dan, a saen wei mi kurbarib ifu dan, agod tamolpein n̄ied banidi imat ak an fidian dusu dupalu ya, agog in̄ ikubuniaid idu pasik a. ²⁵ Agog tamolpein wei mi geig n̄ijen aban duri na ya. Galili na dipalug, provins a TenTaun* dubol dan te, Jerusalem na, Judea na, agod aben you Jordan aen ate dam fidian in̄ dile wo dupalu se ya.

5

Jesus Anut san kagin panek an n̄ijen o ru ifulale ya

Luk 6:20-23

¹ Aria, saen Jesus tamolpein dubuluwi dugo ago ile man, yaug did giran̄en na isuda yau a. Agog saen imasi an, in̄san megeloum awan duloŋ o san na dupalu ya. ² Agog awan isupanig fun iganeg ipiteŋanai a. Agog ibol,

³“Talpein enti n̄utun lo binawek n̄ijen katukan, an bar in̄aneg imado da.

Man dugo, Anut san kagin panek man in̄san mok a.

⁴ Talpein enti tan en lo tinaŋ yabi dan, bar in̄aneg imado da.

* **4:25:** Dekapolis

Man dugo, Anut in ilon inane dop ilon pasa ibol a.

⁵ Talpein enti mos kagin mi iri pani dan, bar inane imado da.

Man dugo, tan tilianek en san taman igo ilasa wa.

⁶ Talpein enti tamolpein fidian kagin itaot digane san ninen o yaes isofutani dan, bar inane imado da.

Man dugo, in san mala nouk an idaisuda wa.

⁷ Talpein enti aenta ilod imunanai dan, bar inane imado da.

Man dugo, Anut dam talpein an inane ilo munanek ipani wa.

⁸ Talpein enti ilon lo ikokan imado dan, bar inane imado da.

Man dugo, in Anut ile wa.

⁹ Talpein enti maror ipidinaig itor dan, bar dinane dumado da.

Man dugo, in man Anut san nanun muroun mok ago dubol a.

¹⁰ Talpein enti kagin itaot ak ninen o muruan ile dan, bar inane imado da.

Man dugo, Anut san kagin panek man in san a.

¹¹ “Tamolpein an naom dufute wak, muruan dupanan ak, agod an ninemi wo ru saiak saiak lo sewak digane wa. Man dugo, an naisag tamolpein ago yan ninen o ago digane tap man, an bar anane amado da. ¹² Yousai lo amado dop ilom uyanan a, fun dugo, ananem naon kumaen panu lo yen den tubun geig a. Man dugo, nek muruan naon kisaek mi tamolpein profet adi imug dumado yan dupidinai se ya.

An beig ilalan da igo won a

Mak 9:50; Luk 4:34-35

¹³ “Tan en lo man an nek ibol beig on a. Ak gug beig san gigen itout tap, aria dugo won tamol ta san gigen an iganep beig on ilasa da wak i? Beig an urat aman tia ya, an ninen o tamolpein tan fo diabi yau dop fufo diau dumul pe duparfufari wa. ¹⁴ An tan en lo ilalan on amado da. Panu ta did fufo yen dan tamolpein dimiani san tia ya. ¹⁵ Nek ago mi tamol ta lam ibanip sareg paen na ta igane na da. Tia, lam an ab ilon lo isunani dop ate ab ilon igane ilalan da. ¹⁶ Nek dal kisaek an lo na agane dop tamolpein ilod lo an sam midiad* an dile wa, an lo tamolpein an sam kagin uyan uyan an kuai tem dile wa. Ago dop in an anem Tamam kumaen panu lo imado dan per dupani wa.

Jesus Moses san kubiaen dabi ipani a

¹⁷ “Kabelan Moses san kubiaen agod profet sad ru an nai ngigane itout o npalu abol banau. Nai mel uraru an ngigane itout o ta npalu na ya, tia, nai tinig lo inaned ru idaisuda wo npalu ya. ¹⁸ Man dugo, nai rumok nrupaian da, gamu yaup tan keit da itout san saen idu dop, samun kitekan ta kubiaen ilon lo yen dan dupasi yaup itout san tia geig a. Tia, mel fidian kubiaen lo man nek ago yen yaup, nek ru fidian digire yan sad nunon ilasa wa. ¹⁹ Aria, talpein enti a kubiaen tusan ak ta ipilali dugo tamolpein aenta ago mi digane wo ipitehanai dan, talpein an kumaen panu lo yan an tia wa. Gug talpein enti a kubiaen fidian iri ipani dugo tamolpein aenta kubiaen an fidian diri wo

* **5:16:** Mididan

ipitenjanai dan, inj yanjan kumaen panu na man tubun geig a. ²⁰ Alonj uyan a, man dugo, naj itaot njurupaianj da, anj gidad maeg aganep anjanem kagin itaot an, kubiaenj girek manjau adi, agod Fasidi adi dam, sad kagin itaot ak irinjani wa. Tia tap, anj Anut san kagin panek lo aladu san man tia geig a.

Jesus tinjæ saian san ai wadan ninjen ipitenjanai a

²¹ “Ru kubiaenj a Anut anjam tubum bagem irup-
idai an alonj a. Ru an ibol, ‘Onj tamol ta funi imat
na wa. Talpein ta tamol ifuni imat tap, isol yau
san tia ya, tia, inj mok mitep Anut san sumiaek
lo itur a.’ ²² Ak man naj njurupaianj da, anj anjanem
turam ninjemi wo ilom wananan dan, kagin an
dam saian geig a. Man dugo, talpein enti a tein
lo tinjæ saiak igane dan, inj dam Anut san sumiaek
lo itur a. Agod talpein ta tein pilapil ru saian ak
ipani tap, Juda sad kot malan te yak lo itur a. Agod
talpein ta tein ipeip ‘onj njineo’ ibol tap, inj Ades
san yai lo idu yau a. ²³ Fun an ninjen o, saen onj
Anut ilo uyan pani wo mel ta alta san yai fo mari
san ninjen o sini palu dop, tei mel ta ninjen onj lo
ilon saian an ilo sou tap, ²⁴ onjane ilo uyan san mel
an alta naon na wabi idu dop, umul waup tei da
bubem kisaek gup, umul palup onjane mel an sinip
marip Anut ilo uyan pani wa. ²⁵ Saen onj kot ab
naon na wau dop, tamol a injiliog kot lo wau o dan,
dabai ganep ida njinenj an dal te mi akubune kisaek
onj gup aup alasa wa. Kabelan kot lo alasa dop,
tamol an tulek tamol† banin lo iginiop, inj onj ai
katuk banid lo iganep, subanek ab lo dibilio waup,
dusubano banau. ²⁶ Naj rumok njurupaio da, onj nek

† 5:25: Jas

ago mado yaup naon dugo dupano yan udad pasik a.

Jeit kagin san pitejanek

²⁷ “An ru kubiaen e dubol en alon a, ‘On jeit kagin ta gane na wa.’ ²⁸ Ak man naj igo nurupaian da, tamol ta pein ta ilep ninen o ilo masa lo malan isi tap, in ilo sou lo da jeit kagin digane la ya. ²⁹ On mala iganep kagin saiak lo udu tap, mala an fure ilasap biliau a. Gidad, an uyan a, an man on tini san boi ta mi ideg yau a, kabelan on tini fidian mi Ades lo idu banau. ³⁰ Agod saen on bani won ak boi iganep aupasek lo udu tap, an dam tutep biliau a. Gidad, an man on tini san boi kisaek o lian bisei a, kabelan an iganep on tini fidian mi Ades lo yau banau.

Jesus iwo kudi san manau ipidinai

Mat 19:9; Mak 10:11-12; Luk 16:18

³¹ “Ru kubiaen e dubol en dam alon a, ‘Tamol ta iwon pein ak ikudi wo ilon ibol tap, nug banin diabi an itout san girek iwon pein ak an ipani wa.’ ³² Ak man naj igo nurupaian da, tamol ta in san pein ikudi san fun man kisaek o lian a, pein an jeit kagin igane la ya, nek an mi a. Saen pein an jeit kagin ta igane na yak gug iwon ikudi tap, in iganep pein an jeit san pein ago ilasa ya. Man dugo, in san pein an tamol foun ak inane tap man, da jeit digane wa. Ago dop tamol sen ta pein a iwon ikudi an inane tap, in dam pein an da jeit kagin digane ya.

Jesus ru dabai panek san ipitejanai a

³³ “Afon ru a Moses san kubiaen tubud baged irupidai an an alon a, ‘Saen on sigane ninen dabai pani wo dop, ninen nunon aman tia yak lo dabai

pani wo ago ta gane na wa. Tia, oņane nņen Anut malan lo uri uyanan an mi gane wa.’ ³⁴ Ak man nņai igo nņurupaian da, oņ mel ta san yaņan lo oņsa ru dabai pani wo ta gane na wa. Oņ kumaen panu yaņan patep lo oņane ru dabai ta pani na wa, man dugo, aben ante Anut san badim yen da. ³⁵ Agod tan san yaņan patep lo oņane ru dabai ta pani na wa, man dugo, tan en man aben Anut san nņien ate yaes ibal da. Jerusalem san yaņan patep lo ago gane wan nņen o umoi a, man dugo, aben an man Kiņ tubun amaiak san panu malan te ya. ³⁶ Taidam, oņ kabuņa dam san yaņan patep lo oņsa ru dabai ta pani na wa, man dugo, oņ gumura roun ta ganep milkouk boi bilkas boi ilasa san tia ya. ³⁷ Nek ‘awok’ ubol a, tia dop, ‘tia’ ubol a, an mi idaisuda ya. Oņ mel ta suguan taida gane tap, kagin an san fun man, ilo sou saiak a ilo lo yen damaiak lo ilasa ya.

Jesus naon pani san maņau ipidinai

Luk 6:29-30

³⁸ “Aņ mel e kubiaen ibol en alon a, ‘Malak ta in oņ mala san a, agod luok ta in oņ luo san a, agodo naon pani wa.’ ³⁹ Ak man nņai igo nņurupaian da, oņ tamol a saian an ta wabiani na wa. Tia, saen talpein ta kudaņa won ak igufte tap, nņas ak dam bilisa dop dam igufte wa. ⁴⁰ Agod saen muruan ta nņen o talpein ta kot lo inilio waup ante tulek tamol irupaio, ‘oņane siot pani.’ Ago tap, siot mi ta pani na wa, tia, mel suguan taidam pani wa. ⁴¹ Agod saen yu san tamol ta inanen biouņ sinip kilomita kisaek wau wo isoduduno tap, sinip kilomita uraru wau pani wa. ⁴² Agod saen talpein

ta mel an tia dop bunawi wo ibol tap, pani wa. Agod saen talpein ta onsa na gubun igane wo dop ta umoi na wa.

Idsad ager bubed tupidinai a

Luk 6:27-28,32-36

⁴³ “An mel e kubiaen ibol en alon a, ‘Onane tura murou ilo pidinai a, ak gug onane ager adi ninedi wo man siai gane wa.’ ⁴⁴ Ak man naj igo nurupaian da, ananem ager adi dam bubem apidinai a. Agod ensauta a muruan dupanan dan ninedi wo Anut san na agudani wa. ⁴⁵ An lo dop an man Tamam kumaen panu lo imado dan inisan nanun muroun mok ago amado wa. Man dugo, inisen mi inanen ad igane ilasa dugo tamol uyan, agod tamol saian ak sisem ilalan ipidinai da, agod ui iganep tamol sad kagin itaot, agod a sad kagin ta itaot na yan, sad na isi wa. ⁴⁶ Ak dugo, tamolpein a on nise wo ilod dupano dan mi ilo pidinai tap, Anut naon uyan ak ta ipano wak i? Tia geig a. Man dugo, moni takis nilanjal tamol adi dam, kagin nek ago mi digane na ya. ⁴⁷ Agod on tura murou mi sad na adian ubol tap, on kagin dugo uyan ak suguan taidam tamolpein aenta ta digane na yan gane di? Gob adi dam kagin nek ago mi digane na ya. ⁴⁸ Amaiak ninen o nek ibol onane Tama lak na yan itaotan igo won, on dam itaota lasap mado wa.

6

Jesus pani san manau ipidinai a

¹ “Kagin gane wo uyan a, onane kagin uyan uyan man tamolpein naod na gane dop lo dilio wo ago ta

gane na wa. Onj ago gane tap, Tama kumaen panu lo imado dan naon ta ipano na wa.

² Fun an niñen o, saen onj talpein enti mel aman tia yan mel ta pani wo ilo ibol tap, talpein ta imug mi dinip yaup dugo gane wo dan niñen o tour ta iwi na wa. Tamol balek uraru san kagin diri dan man, ubou ab lo, agod dal te dam, tamolpein dil o kagin naok ago yak digane na ya. Nai rumok n̄rupaianj da, tamol naok an in̄aned naon idaisuda mi diñane la ya. ³ Ak man saen onj tamol filiad tia yak mel ta pidinai tap, onjane bani n̄as an biabi a bani won ak nam gane dan ilonj o ta ulefuni na wa. ⁴ An lo dop mianuk lo mi on̄sa binawek pidinai a. Ago dop lo onjane Tama kagin a mianuk lo mi gane yan ile dop, naon ipano wa.

Jesus gudanek niñen o ipiteñanai a

Luk 11:2-4

⁵ “Agod saen onj gudani wo dop, tamol balek uraru san kagin diri dan, igo wonj ta gudani na wa. Inj ilod ibol dak ubou ab lo, agod dal titin gidigheid ate dam, dugudani wo dutur dop lo tamolpein diliai o digane da. Nai rumok geig n̄rupaianj da, in̄ naon nek an mi diñane wa. ⁶ Ak man saen onj gudani wo dop onjane galunj lo ladup, dalawan futani gup, mianuk lo mi Anut enti a sen imianig imado dan san na gudani wa. Ago dop Tama enti a mel ta mianuk lo yen ak gug, in̄ kuai te mi ile dan, naon ipano wa.

⁷ “Agod saen an̄ agudani man, nek ibol gob adi igo niñen̄ kawan ak ta afuti na wa. Man dugo, in̄sad niñen̄ wei mi dubol dan lo mi Anut kududon igure wak ago dubol a. ⁸ Nek ibol in̄ dugudani dak igo

woŋ ago ta agane na wa. Man ata wo? Gamugo oŋane Tama sumiani dop mel a niŋen o umat pe sumiani wo dan iŋ ilonŋ la ya.

⁹ Fun an niŋen o aŋ igo agudani wa.

O Bai, oŋ did lo mado da.

Oŋane yaŋa gun migane da.

¹⁰ Oŋane kagin panek idu ipalu wa.

Oŋane awa mi muri mupani wa,

tan na nek ibol did lo digane dak ago mi a.

¹¹ Gamu nal en san anaŋ panama wa.

¹² Maŋsama gubun oŋ lo migane yan pasi yau a, nek ibol aenta sad gubun maŋ lo diganeg mupasi dak ago mi a.

¹³ Maŋ kubianek lo madu san an lo ta giniamo na wa.

Tia, Satan tuon lo patuma pasi wa.

¹⁴ Man dugo, aŋ tamol ta sad aupasek apare idu tap, Tamam lak na yak aŋsiganem aupasek dam ipare idu wa. ¹⁵ Ak gug aenta sad aupasek ta apare idu na tap, Tamam aŋsam aupasek dam ta ipare idu na wa.

Jesus anaŋ geg pani san niŋen o maŋau ipidinai a

¹⁶ “Saen oŋ gudanek san dabai ŋane wo anaŋ lo geg gane tap, nao san leil ta ganep saian na wa, nek ibol tamol balek uraru adi digane dak ago mi ta gane na wa. Iŋ naod diganep saian dop aenta dil dop dubol a, ‘iŋ anaŋ tia ditor da.’ Ŋai rumok ŋurupaiaŋ da, iŋaned naon idaisuda mi diŋane la ya.

¹⁷ Ak man saen oŋ gudani wo anaŋ lo geg gane tap, usug pe nao kubune wo uyan a. ¹⁸ Ago dop aenta oŋ anaŋ lo geg gane yan ta dulonŋ na wa. Ago dop Tama mi ilio dop, iŋ mel mianuk lo ile dan, naon ipano wa.

Filian kumaen panu lo dien da
Luk 12:21,33-34; 11:34-36; 16:13

¹⁹ “Anj tan en lo filian tubun mok afuti wo urat maeg ta agane na wa. Fun dugo, ente man kadum diani wak, teirteir dam malad dusue wak, gumagam dam ab digilep diladup digam a. ²⁰ Ak man kumaen panu lo mi filian afuti wa. Aben an ate kadum ta diani na wak, teirteir dam malad ta dusue na wak, agod gumagam dam ab digilep diladup ta digam na wa. ²¹ Man dugo, aben a onjane filia ate yen dan, nek aben an mi lo onjane ilo tini fidian dam antem yen a.

²² “Onjane mala man tini san lilaman. Saen onjane mala uyan tap, tini fidian mi igane ilalanj a. ²³ Ak man saen onj mala saian tap, tini fidian geig an tidom tubun da awan isa wa. Aria, saen lilaman onj lo yan tidom tubun onj tap, tidom tubun an bilkas geig a.

²⁴ “Tamol ta gurman uraru mi nal kisaek lo mi awad yabi san tia ya. Inj ago igane wo igane tap, inj kisaek o lian ninjen o imat dop, turan ile sisaian a. Tia dop, kisaek o lian ilon ipani dop, turan patun ipani wa. Nek ago mi onj Anut moni da sisem uri san tia ya.

Ilo ta muruan na wa
Luk 12:22-31

²⁵ “Nek an ninjen o njurupaianj da, anjsam madok ninjen o ilom ta muruan na wa. Mel ani wan ninjen o, mel aluk san agod biouj tinim san an ninjed i wo ilom ta muruan na wa. Ak dugo, ananj an mel tusan dugo njutumi an mel tubun ak i? Aria, taida mi, biouj tinim san an mel tusan dugo tinimi mok an mel tubun ak i? ²⁶ An ninjen o kusej eil,

in anan ta dupae na da, in anan disinip anan ab lo ta dutumani na da, ak man Tamami kumaen panu lo amaiak inaned anan ipidinai da. Ak dugo, Anut malan lo kuseŋ mel tusan dugo an mel tubun geig ak i? ²⁷ Ak dugo, an lulunam lo talpein ta ilon weiwei dan lo nal taidam ka imado wak i? ²⁸ Agod an ata wo biouŋ direk san niŋedi wo ilom muruan dak i? Garaŋ san kakak dugo woŋ disa dak ilom isou a. Kakak an urat ta digane na dak, agod inaned biouŋ dam ta diwei na da. ²⁹ Ak man ŋai ŋurupaian da, gidad Solomon damag siŋaokan ak dupani bo man, inŋsan leil man kakak an san leil igo tia ya. ³⁰ Aria, Anut garaŋ san kakak san leil iganep siŋaokan ago dilasa dop, gidad gamu kumaedi dumado gup gabulop yai lo diabiau o tap, o an tamol ilo rumok amam tusan a, ak dugo, an dam biouŋ tinim fo ta idiri na wak i? ³¹ Amaiak niŋen o ilom muruan pe ‘ata tani wak i?’ tia, ‘ata taluk ak i?’ tia, ‘ata tinid san biouŋ on tidiri wak i?’ ago ta abol na wa. ³² Man dugo, gob adi mel an fidian abanjan diabi dutor da. Agod ananem Tamami lak na imado dan mel dugo niŋedi wo amat dan in fidian ilon pasik a. ³³ Gug imug mi man, inŋsan kagin panek lo aladu san, agod inŋsan kagin itaot an dam anane san niŋen o maeg agane wa. Ago agane tap, mel an fidian dam anane wa.

³⁴“Ak niŋen o gabulo san niŋen o ilom ta muruan na wa, man dugo, gabulo man inŋsen niŋen o mi ilon muruan a. Nal anen anen inaned muruan anen anen idaisuda la ya.

Aenta bitinaek lo ta dirai na wa
Luk 6:37-38,41-42

¹ “Onj aenta biai dudu wo bitinaek lo ta dirai na wa. Onj ago ta gane na tap, Anut dam onj lo ago ta igane na wa. ² Man dugo, dal kisaek nek a lo, aenta bitinaek lo dirai dan, ago mi Anut onj dam lo ago igane wa. Agod saen aenta sad madok bitinae ule man, tou dugo yan lo onj aenta pidinai dan, tou nek kisaek an mi lo Anut onjane madok dam ibitinae ile wa. ³ Dugo wonj go metmet samun ta tei malan lo ule gug onj sigane mala lo ai lapan yen an ta kubiani na yak i? ⁴ En dugo wonj tei rupeip ubol, ‘Gane dop metmet samun a mala lo yan njupasi yau,’ dugo onj sigane mala lo ai an nal fidian mi ago yen di? ⁵ Onj bale uraru ama ya, imug mi sigane mala lo ai lapan an pasi gup, lo aban ka ule uyanan dop lo tei malan lo metmet samun an pasi yau a.

⁶ “Mel gun ak gown ta pidinai na wa. Ago gane tap, gown an didansap tini diburtiti kitiktik a. Nek ago mi onjane koksai bor naod na ta ubal na wa. Ago gane tap, bor njied nam duparfufari wa.

Sumiaen, aban ule, dalawan tuti
Luk 11:9-13

⁷ “Sumiaen dop Anut ipano wa, aban ule dop ule wa. Dalawan tuti dop ipasi pano wa. ⁸ Man dugo, talpein a isumiaen dan inane wa, talpein a iban ile dan ile wa, agod talpein a iladu wo isumiaen dan, Anut dalawan ipasi pani wa.

⁹ “Enti an lulunam lo nanun bret o isumiaen dop pat ipani wak i? ¹⁰ Tia dop, iy o isumiaen dop mot wagai ak ipani wak i? ¹¹ Fun an ninen o gidad onj tamol saia bo man, nanu murou mel

uyan uyan ak pidinai o ulon a. An ninen o mel uyan uyan ak sapita taida dop on Tama kumaen panu lo yan tamolpein a dusumiani dan ipidinai ak i? ¹² Ak ninen o mel fidian lo kagin tamolpein aenta dukubiai pano wo ilo ibol dan, kagin nek an mi on dam imug mi kubiai pidinai a. Ago agane tap, kagin naok naok nek a kubiaen lo ibol an, agod profet sad ru kubiaen durupaian an dam ibulumai a.

Dalawan ipipiani aman

Luk 13:24

¹³ “Dalawan ipipiani* aman an lo mi aladu wa. Man dugo, dalawan a pitininek aben lo yau an man tubun geig a, agod san dal dam nek ago mi a, agod tamolpein a dalawan amaiak lo diladu dan man wei kasik a. ¹⁴ Ak man dal a kumaen aben lo yau dan man ta pasauman na ya, agod san dalawan ipipiani aman a. An ninen o tamolpein kisaek kisaek mi dal amaiak dile da.

Ai ta nunon an da

Luk 6:43-44; 13:25-27

¹⁵ “Profet sewak an ninedi wo kagin agane wa. In tinidi sipsip sunulon nam dubuluwi dop lo mos nam an sam na dupalu wa, ak man tinidi ilon lo man in nek ibol goun kasik yai ided geig ak igo won a. ¹⁶ In sad urat nunon digane ilasa dan te gup sad bunud lo ale alon ak in tamol naok ago ya. Ak dugo, ka tamolpein ai dudurun anda yak lo anar nunon dinane wak i? Tia, nom lo fud nunon dinane wak i? Tia geig a. ¹⁷ Fun an ninen o saen ai ta uyan tap, san nunon ifu ilasa man dam uyan mi a. Ak

* **7:13:** Ipinima

man saen ai ta saian tap, san nuḡon dam saian a.
¹⁸ Ai uyan ak lo nuḡon saian ak ilasa san tia ya, agod ai saian ak lo nuḡon uyan ak ilasa san dam tia ya. ¹⁹ Saen ai ta nuḡon ta ifu uyan na tap, ai an ditare idup dubal yai fo isuda wa. ²⁰ Nek dal an lo mi sad naok naok dugo sad kagin lo igane ilasa dan te, inḡ tamol naok dugo yan anḡ ale alonḡ a.

²¹ “Tamolpein a ḡai durupaiaḡ pe ‘O Tubun ak, O Tubun ak’ igo dubol dan lulunḡad lo, aenta Anut san kagin panek lo diladu san tia ya. Tia, tamolpein nek a ḡaisag Tamag kumaen panu na imado dan san ilon dugo yen dugo durid amaiak mi diladu wa. ²² Nal an lo tamolpein wei mi durupaiaḡ pe dubol a, ‘O Tubun en, O Tubun en, maḡ onḡ yaḡa lo profet ru mabol ilasa ya, onḡ yaḡa lo ur saiak saiak tamol ilod lo mukudai diau a, agod onḡ yaḡa lo dam urat dababai anda yan wei mi migane na yan ta ulonḡ na i?’ ²³ Ak gug ḡai ḡurupidaip ḡabol a, ‘ḡai nal fidian anḡ ta ḡalonḡ na ya. Anḡ kulob saiak saiak san tamolpein, abisawag pe sen alasa!’

Ab bek ta san kankan milaen inḡ ab bek ta san kankan ḡiḡeo ak da

Luk 6:47-49

²⁴ “Ak ninḡen o talpein a ḡaisag ru ilonḡ pe awag kagin ipani dan, inḡ nek ibol maḡau tamol ab yabi wo dugo bag san gib kuror mi yabig, pat nam bag fun isueg sakar ak igo wonḡ a. ²⁵ Agog saen ui tubun ak isi dugo, lom dam idug tim ifureg ab an ifuni bo man, ab an ibili idu san tia ya. Man dugo, ab an pat nam yabi an lo itur sakar a. ²⁶ Ak man talpein ru e ḡabol den ilonḡ gug awag kagin ta ipani na dan, inḡ man nek ibol ḡiḡeo tamol igo ya, inḡanen ab yabi wo

dugo gib ta yabi nag, lul fufo mi yabi ak igo won a. ²⁷ Agod saen ui isig lom tubun ak idu dugo tim dam ifureg, ab an ibili idug iratitale yau a. Agod ab an san pitininek man saian geig a.”

²⁸ Saen Jesus tamolpein sad na mel e fidian ibol se yen igane itout man, inſan dal dugo lo manjau ipidinai man dileg maladi ifure idu ya. ²⁹ Fun dugo, in nek ibol inſad kubiaen san girek manjau adi igo won manjau ta ipidinai se na ya, tia, tamol tubun yanjan anda yak on ipitenjanai se ya.

8

Tamol ta tinin lepra yafutani a

Mak 1:40-45; Luk 5:12-16

¹ Saen Jesus did an fo idu dugo tamolpein wei mi njen aban diri se ya. ² Ago dugo tamol ta tinin lepra yafutani an ipalug Jesus naon na turun isaluwig irupeig, “O Tubun ak, on ilo ibol tap, naj kubuniag pe tinig ikok ilasa da wa.” ³ Agog Jesus banin iwateg isupurig ibol, “Ubol agom naj ilog ago yen da, ikok lasa.” Agog tamol an tinin ikok ilasa kisaek on a. ⁴ Ago dugo Jesus irupeig ibol, “Kagin gane, kulob ilasa yen njen o aenta ta rupidai na wa. Tia, itaot waup, tini Juda sad pris mi kubiaip ile dop, mudan a Moses san kubiaen lo ibol dan njanep Anut yai gane pani. An lo dop tamolpein dulong ak onane subam itout a.”

Rom yu gurman san ilo rumok

Luk 7:1-10

⁵ Jesus Kaperniam na yang saen iladu wo dugo Rom san yu gurman ta inſan na ipalug binawek ipani wo imosiai a. ⁶ Ago dugo irupeig ibol, “O

Tubun en, ηaisag urat tamol ta subam ifunig ab lo yen da. Nien banin imat dugo madai tubun kasik lo yen da.” ⁷ Agog ru naon irupeig ibol, “Nai ηupalup ηukubune wa.” ⁸ Ak gug yu gurman an ru naon irupeig ibol, “O Tubun en, oη ηaisag ab lo ladu san man ηai yanag tia ya. Ru mi ubol dop lo ηaisag urat tamol uyan isusa da wa. ⁹ Man dugo, nek oηse ago mi, ηai dam tamol aenta waged lo urat ηigane da, agod ηaisag yu tamol adi paeg na dumado da. Saen ηai yu tamol ta ‘wau’ ηabol tap, in yau a. Tia, ta ‘palu’ ηabol dop in ipalu wa. Tia, ηaisag biabi ηilanjal ta ‘igo gane’ ηabol dop, in igane wa.” ¹⁰ Jesus ru an ilon man, irut saian geig a. Agog idansag tamolpein a nien aban diri se yan irupidai, “Rumok geig ηurupaian da, tamol ta ilo rumok naok igo yak aman da Isrel ilon lo ηile man tia ya. ¹¹ Nai ηurupaian da, tamolpein wei mi ad ilasa dak ate, agod ad idiau dak ate dam dupalup Abraham, Aisak, agod Jakob dida dutumanip, Anut san kagin panek aben ante sisem dumasip, soubul san anan diani wa. ¹² Ak man Anut in san kagin panek aben san tamolpein injal pe yabiaup patun fo dilasa dop tidom tubun lo mi dumado yau a. Aben ante man tamolpein tinaη digane dop madai lo luod dugurmi wa.” ¹³ Agog Jesus yu gurman an irupeig, “Waup, nek ibol oη ilo rumok ama da ago mi, ηai dam nek ago mi ηigane wa.” Saen Jesus ago ibol go itout man, biabi ηilanjal an uyan isusa kisaek oη a.

Jesus tamolpein wei mi ikubuniaig uyan dilasa ya

Mak 1:29-34; Luk 4:38-41

14 Pita raon subam ifunig tinin dam wananan go, gadab fo inſiganen ab lo diganeg yen se ya. Saen Jesus ab an lo iladu man, pein an yen dugo ile tag 15 banin iwateg pein an banin yabi a. Agog pein an tinin ibubarum kisaek on dugo subam an ibisei a. Agog imasa itur go anan ikubuneg Jesus kagin ipani a. 16 Aria, saen gurai isi dugo, tamolpein a tinid ur saian saian amad da yan diſal dupalu ya. Ago dugo Jesus ru ta dabai anda yak lo ur saian an fidian ikudai diau a, agog tamolpein subam amad da yan dam ikubuniaig uyan dilasa pasik a. 17 Jesus kulob a igane yan lo awak aban ta profet Aisaia ibol an nuſon ilasa ya, “In idsad muruan injal go inanen tinin nam idsad subam isini a.”

Jesus awan tiri san muruan

Luk 9:57-62

18 Saen Jesus tamolpein wei mok dubuluwi dugo yil an, inanen megeloum adi wog nam you aen ate diau wo irupidai a. 19 Agog kubiaen san girek manau ta siniren na ipalug irupe, “O Girek Manau, on dugon te wau o dan, nai dam ate tau a.” 20 Gug Jesus ru naon irupeig ibol, “Goun kasik in wur amad da ya, anakanak dam wur amad da ya, gug Tamol Nanun ninen o man aben ta ate kabunan igansip nion yabi san o man tia ya.” 21 Agog tamol ta in nien aban iri an irupeig ibol, “O Tubun en, umoi dop nau, tamag nisare gup.” 22 Ak man Jesus irupeig ibol, “Nieg aban uri wa. Tamolpein a nutudi imat la yan bisawai dop inſiganed tubabun ka disiriai a.”

Jesus inijen dugo beig tim da dutokubol a

Mak 4:35-41; Luk 8:22-25

²³ You lo dupalug Jesus imug wog lo isuda gug inanen megeloum murna disudag diyawai diau a. ²⁴ Agog you titinaem dumado dugo tim tubun ak ifure ya. Ago dugo you tubun geig imasag wog ilon lo iladu bo man Jesus njon yabi se ya. ²⁵ Agog diaug Jesus dufufunig dubol, “Tubun ak binawam, tadeg tau o sumeik da.” ²⁶ Agog irupidaig ibol, “O an tamol ilo rumok amam nanunan, ata wo arer dak i?” Agog imasa itur go tim tamun da ipidai man, tim ifure na yan itout dugo you malin idu geig a. ²⁷ Saen inŕsan megeloum ago dile man malad ifure idu dugo sed nug dusumianig dubol, “En so tamol ta igo yak i? Gidad you tim da dumasa yak dubo man awan duloŕ a.”

Jesus tamol uraru tinid ur saian saian anda yak ikubuniaia

Mak 5:1-20; Luk 8:26-39

²⁸ Jesus wog nam you aen ate ipalu dugo aban ta Gadarin tamolpein dumado dak ate disasau a. Aben ante tamol uraru tinid ur saian saian anda yak mutou aben lo dumado se ya. Uraru an yaied nuŕon a, an lo tamolpein niŕedi wo tubun mi direr dugo aben ante ta diau na da. Saen Jesus sumeik ipidinai man mutou dibiseig diaug naon na dilasa ya. ²⁹ Ago dugo tubun mi disasai dugo duwagin go dubol, “O Anut Nanun, oŕ mel ta maŕ lo i? Dag inŕsan saen mok gamugo ilasa wo dugo, maŕ imug madai tubun ak panama wo palu i?” ³⁰ Aria, inŕ dumado dak ate kitekan asau man, bor malan tubun geig ak dunuaen se ya. ³¹ Agog ur saian saian an Jesus san na dumosiaig dubol, “Gidad oŕ tamol uraru en ilod lo kudama tap, diramap maup bor malan tubun an tinid lo miladu wa.” ³² Agog

inj irupidaig ibol, “Au.” An lo man, ur saiak saiak dilasag diaug bor tinid ilon lo diladu ya. Ago yan lo bor fidian dumasag, dumaspalug diaug damab aen te dudug you duluk go dumat pasik a. ³³ Tamol bor kagin dupidinai dan disol go dumaspalu on panu lo diaug mel ilasa yan ninen o tamolpein durupidaig dulon a. Agod tamol a ur saiak saiak ditirni na yan mel dugo inj lo ilasa yan dam ninen o dubol go dulon a. ³⁴ An lo man, panu an san tamolpein fidian direr go Jesus dile wo dupalu ya. Saen dupalug dile man inaned aben ibisei wo dusumiani a.

9

*Jesus tamol njen banin ikikai ak ikubune ya
Mak 2:1-12; Luk 5:17-26*

¹ Jesus wog fo isudag you ituteg aen ate siganen taun lo yau a. ² Ante tamol ta njen banin fidian ikikai aman ak kapal anda disinig Jesus san na dupalu ya. Agog saen Jesus inaned ilo rumok ile man, tamol an irupeig ibol, “O nai nanug, se ilo wabisa; nai onane aupasek fidian nusuas yau la ya.” ³ Ago dugo kubiaen san girek manau aenta inj awan dulon man ilod lo mi dubol se, “Tamol an Anut lo ru kukok igane da.”

⁴ Ak man Jesus inj kankan dugo digane se yan fidian ilon pasik an lo irupidaig ibol, “An ata wo ilo saiak saiak ilom lo agane dak i? ⁵ Ata mel pasauman ak i? Aria, nai igo nabol, ‘Onane aupasek npasi yau wo?’ Tia, ‘Masap kapal wabisap utor o?’ ⁶ Gug kulob e nigane en lo, nai Tamol Nanun, tan en lo Anut wagen lo aupasek ka npasi yau amaiak alon o ...” saen ago ibol man, tamol a

ņien banin ikikai aman ak irupei, “On masa utur pe onjane kapal űanep onsigane na wau.” ⁷ Agog tamol an imasa itur go siganen ab lo yau a. ⁸ Aria, saen tamolpein a Jesus dubuluwi an kulob ago dile man, dirut saian go Anut yaņan diabisa ya, man dugo, inřsan dabai naok ago yan tamol ta ipanig, an lo tamol űien banin ikikai ak ikubune ya.

Jesus Matyu iwagi a
Mak 2:13-17; Luk 5:27-32

⁹ Jesus kitekan taida yaug ab ta, ate moni űilanjat tamolpein sad na takis diņane dak ate ilasa ya. Ate man takis űilanjat tamol ta imasig imado dugo ile ya. Tamol an yaņan Matyu. Agog irupei, “Njeg aban uri.” Agog Matyu imasag űien aban iri a.

¹⁰ Murnag saen Jesus Matyu san ab lo imasig imado dugo sisem anaņ diani man, takis űilanjat wei mok, agod tamolpein aenta wei mi a Farisi adi niņedi wo “aupasek tamol” dubol dan dam, dupalug dumasig Jesus injanen megeloum dida sisem anaņ diani a. ¹¹ Saen Farisi adi ago dile man Jesus san megeloum dusumianai, “En ata wo anřsam girek maņau takis űilanjat, agod aupasek tamolpein dida sisem anaņ diani dak i?” ¹² Ak man Jesus inřsad sumiaeņ ago ilonņ man irupidaig ibol, “Tamolpein a uyadi ak dokta san na ta diau na da, tia, tamolpein subam anda yak mi diau da. ¹³ Alasa aup girek en ilom isou uyan dop san fun alonņ mok a, ‘Aņ ilo uyan apanag an niņen yai agane panag o ilog ta ibol na ya, tia, aņ aenta ilom imuņanai o mi űamat da.’ Man dugo, űai tamolpein a itaot adi dubol dak űigiaip dupalu san niņen o

ta nꞑpalu na ya, tia, aupasek tamol adi mi nꞑgiai o nꞑpalu ya.”

*Jon san megeloum ananꞑ san geg ninꞑen o dusumi-
aenꞑ a*

Mak 2:18-22; Luk 5:33-39

¹⁴ Agog Jon san megeloum Jesus san na dupalug dusumiani, “Maꞑ agod Farisi dida nal kadi ananꞑ lo sema geg ipanama da, ago gug ata wo onꞑsigane megeloum ananꞑ lo geg ta digane na dak i?” ¹⁵ Agog Jesus irupidaig ibol, “Tamol ta iwon da sad nug nꞑanek san saen an ilom isou a. Ak dugo, saen tamol an inꞑanen turan muroun dida dumado dan, waliꞑ diganep lo ilo muruan amad da dumado wo ago digane wak i? Tia geig. Gug nal ta ipalu dan te man, nug nꞑanek san tamol an naon atna tia wa, nal an lo gup waliꞑ digane dop ilo muruan lo ditata wa.

¹⁶ “Tamol, yamel kilaken ta ikukuik* na yan irasirep ate yamel wagam ak san mutunuk ta iwei na da. Man dugo, ago igane tap, yamel kilaken foun an yamel wagam an irae dop afon irasire dop daonꞑ ipani wa. ¹⁷ Agod tamol dam wain foun ak bilelek sunꞑulon wagam ak lo ta diwali na da. Man dugo, ago digane tap, wain foun an iganep bilelek sunꞑulon wagam an ikafut yaup ipuk dop, wain ikulmaek pe tan fo idu dop, bilelek sunꞑulon dam daonꞑ ipani wa. Fun an ninꞑen o inꞑ wain foun ak bilelek sunꞑulon foun ak lo mi diwali da, ago dop bilelek sunꞑulon an inꞑ wain da sisem ka uyanan mi dien yau a.”

* **9:16:** Ikukup isuda

Kubakan ta imat ak in pein ta subam anda yak da

Mak 5:21-43; Luk 8:40-56

¹⁸ Saen Jesus mel an sad na ibol ilasa dugo, gurman ta san na ipalug njen fun na turun isaluwig irupeig ibol, “Naineg nanug pein gamu na geig imat a, ak man on inſan na palup bani kabunan fufo gane tap man, kumaen ilasa da wa.” ¹⁹ Ago tag Jesus imasag inanen megeloum dida njen aban dirig diau a.

²⁰ Gug saen dal durig diau man, pein ta subam anda imado se yan njen aban irig yau se ya. Pein an anajar 12 siganen dar tinin ilon lo yak ilasa se ya. Aria, in Jesus patun fo yang sumeik man banin iwateg inſan kulos bitinjen isupuri a. ²¹ Man dugo, in imug mi siganen ilo sou lo ago ibol, “Nai banig inanen kulos mi nusupuri tap, inanen dabai ikubuniag a.” ²² Saen inanen kulos isupuri man, Jesus idanſag ileg irupei, “O nanug pein, ilo wabisa, onſigane ilo rumok nai lo yan ikubunio ya.” Ago ibol man pein an tinin nek saen ante mi uyan ilasa kisaek on a.

²³ Saen Jesus gurman an san ab ate ilasa man, ilon lo iladu ya. Ante man tamol suduk duwi dugo, tamolpein ditata wo dutumani an, liliſan tubun mok diganeg dumado dugo yil a. ²⁴ Agog irupidaig ibol, “Alasa au, man dugo, pein baras an ta imat na ya. Tia, in njen yabi da.” Ago ibol man disel on dugo kukok an digane se ya. ²⁵ Ak man Jesus imug tumanek malan an ikudaig kuai te dilasa, agog pein baras an san galuſ lo iladug banin te yabi a. Saen yabi man pein baras an imasa ya. ²⁶ Agog

kulob e igane yen san n̄iñeñ an diñaneg aben tubun an san titin fidian lo dubol itiliani a.

Jesus tamol malad itau agod tamol awan itau ak dam ikubuniaia

²⁷ Jesus aben an ibiseig yau dugo tamol uraru malad itau an n̄ien aban duri se ya. In̄ tubun mok disasai dugo duwagin̄ se, “O Dawid Nanun, gidad ilo panama wo!” ²⁸ Saen Jesus ab ta lo iladu man, tamol uraru malad itau an ate san na dilasa ya. Ago tag irupidaig ibol, “Ak dugo, n̄ai kulob e n̄igane san an ilom lo rumok aki?” Go in̄ durupei, “Awo, O Tubun ak.” ²⁹ Agog Jesus uraru an maladi isupuri dugo ibol, “An̄anem ilo rumok iri panim nek ago mi an̄ o ilasa wa.” ³⁰ Agog maladi uyan ilasag aban̄ dile uyan a. Ak gug Jesus ru dabai nam ru kagin igo irupidai, “Kagin agane wa, talpein ta kulob e ilasa yen dulon̄ o ta arupidai na wa!” ³¹ Ak man dibiseig diaug n̄iñeñ an aben fidian distrik an ilon lo dubol ditiliani se ya.

³² Saen Jesus in̄anen megeloum dida ab an dibi-sei man, tamol awan itau ak ta diñaneg san na dupalu ya, man dugo, tamol an ur saiak ilon lo imado na ya. ³³ Jesus tamol an ilon lo ur saiak an ikudi man, tamol an in̄iñeñ kisaek on̄ a. Agog tamolpein a dutumanig dumado dan kulob an dileg durut saian go dubol, “Mel tutubu naok ago yak imug mi Isrel na ta ilasa na ya.” ³⁴ Ak man Farisi adi dubol, “Ur saiak sad gurman in̄anen tuon nam ur saiak tamol tinid ilon lo yak ikudai da.”

Urat tamolpein wei an tia ya

³⁵ Jesus panu fidian agog taun fidian lo itilianig itor se ya. In̄aned ubou ab fidian ilod lo ipiteñanai

go aben gidigheid lo Anut san kagin panek an san bilalun uyanan ak ninen o ibol ilasa se ya. Agod subam naok funfun an fidian dam ikubunia na ya. ³⁶ Saen tumanek ile man, ilon lo tubun mok imunanai a, man dugo, inanen malan lo goun kasik tamolpein an dirasisirai ak igo won a, agod tan fufo dudug dabai amad tia yak dien dak igo won a. Nek ibol sipsip sad muroun tia yak ago mi dumado se ya. ³⁷ Agog Jesus inanen megeloum irupidaig ibol, “Anan wei mi ibes pasik a, ak man sinek san tamol wei an tia ya. ³⁸ Amaiak ninen o ananem gadin lo man, an sinek urat san muroun asumiani dop in ka sinek san tamol wei mok inal pe idinaip, anan dutumani wo, inanen abi lo diau a.”

10

Jesus inanen megeloum urat digane wo manau ipidinai a

Mak 3:13-19; 6:7-13; Luk 6:12-16; 9:1-6

¹ Jesus inanen megeloum 12 an igiaig siniren na dupalug dabai ipidinai a. Ago yan lo in wagen lo ka ur saiak saiak tamolpein ilod lo dukudai diau a. Agod dam ka subam funfun dukubunia idu wa. ² Aposel 12 an yanadi igo ya, imug an Saimon, tamol an yan aneinta Pita dubol dan, in tein Andru da. Tinin te Jems in Jon da Sebedi nanun muroun. ³ Filip, Bartolomiu, Tomas, Matyu tamolpein sad na moni takis isi dan, Jems Alfeus nanun, agod Tadaeus. ⁴ Saimon neinta in Rom san yu tamol sad ager, agod Judas Iskeriot tamol an murnag Jesus ager tamol banid lo igane yau a.

⁵ Jesus tamol 12 en idinaig ru dufulale wo diau a. In igo digane wo irupidai a, “An tamolpein Juda

tia yak sad tan lo ta au na wak, agod taun dugon Samaria sadi dam lo ta au na wa. ⁶ Tia, sipsip a dideg diau san dumado dan Isrel sad warou lo dilasa yan sad na mi au a. ⁷ Atiliani ator dop igo abol ilasa wa, 'Anut san kagin panek ipalug sumeik la ya.' ⁸ Subam ifu an akubunia, dumat la yan afufunaip dumasa wa. A tinid lepra amad da yan akubuniaip tinid afon uyan ilasa da wa. Agop ur saiak saiak tamolpein ilod lo yan akudai diau a. An ηaisag dabai sen kawan anane amaiak ninen o, tamolpein dam moni tia kawan akubunia a. ⁹ An moni dam ta asini na wa. Pat naon ibol gol boi ta silva boi ta kopa ago won ananem let lo iyuk dan ta asini na wa. ¹⁰ Au wo dop turen san badam ta asini na wak, madid san kulos taidam ta asini na wak, sendal dam ta anane na wak, agod makud dam ta anane na wa. Man dugo, a sad na urat agane wo dan anan lo dibinawan san man uyan a.

¹¹ "Agog saen panu ta boi, tia taun ta boi lo aladu wo dop asumianai a. Ago dop enti tamol uyan an dubol alon gup, aup, tamol an da amado na gup, abisei dap, au a. ¹²⁻¹³ Agog saen san ab lo aladu wo dop, bar maror san an tamolpein ab an lo dumado dan ninedi wo agudani gup, aladu wa. Saen tamolpein an ilo uyan lo digian tap, bar an in da dumado wa. Ak man saen in ta digian o uyan na tap, bar an apasi anane da wa. ¹⁴ Ak gug saen tamolpein aban an ate patud dupanan boi, tia, ansam ninen ta dulon na tap, niem fo gufgaf afuni idu gup, ab boi, tia, aben boi, an abiseip au a. ¹⁵ Nai ru en rumok geig ηurupaian da, saen nal a lo Anut tamolpein ibitinae san ilasa dop, aben an san tamolpein muruan tubun geig ak ipidinai a. Agod

inaned wadan naon an taun Sodom in Gomora da sad wadan naon an irinani geig a. ¹⁶ Aloŋ sinjaokan, nek ibol sipsip in goun kasik luluŋad lo dutor dak igo woŋ, ŋai an ŋidinaŋ pe tan en san tamolpein naod na au o da. Ago yak niŋen o mot igo woŋ aban ale wo uyanan a, gug anjanem turen lo nek muluk oŋ mos kagin lo mi ator a.

Murnap muruan wei mi dilasa wa

Mat 24:9-14; Mak 13:9-13; Luk 21:12-19

¹⁷ “Tamol niŋedi wo kagin agane wo uyanan a, man dugo, tamol an dusubanaŋ dop diŋiliaŋ pe inaned tumanek lo dibitinaŋ o dugunaŋ a, agod Juda sad ubou ab lo rasau nam dufunaŋ a. ¹⁸ Tamolpein an ŋai niŋeg o dibiaŋ dop diriaŋ oŋ diŋiliaŋ pe tamol gurman in kiŋ da naod na atur a. Ago yan lo in naod na, agod gob fidian naod na dam, anjanem ilo rumok ŋai o kuai tem ka abol ilasa wa. ¹⁹ Aria, saen ager banid lo didiraŋ dop, ru dugo abol man niŋen o ilom ta muruan na wa, ru naok dugo yak arupidai an dam niŋen o ilom ta saian na wa. Man dugo, saen nek an lo ru a arupidai an Anut san Urgan ipanaŋ a. ²⁰ Man dugo, ru a ubol dan oŋsa mi tia ya. Tia, oŋane Bai Anut anen Ur, inŋen mi oŋ awa lo ininŋen da. ²¹ Tein ta inanen tein ager banid lo iganep dufuni imat a. Taman ta dam nanun muroun lo ago igane wa. Nanuk dam tinan taman patun ipidinaip ai katuk banid lo idiraip dufu dumat a. ²² Agod tamolpein fidian ŋai niŋeg o an lo siai digane wa. Ak gug enti a muruan en fidian lo itur sakar oŋ yaup inanen wadan idu dop, ŋai talpein an niŋanep patun ŋupasi wa. ²³ Saen panu ta ante muruan dupano tap, usol

pe panu turan ate wau a. Nai rumok nurupaian da, an panu fidian Isrel ilon lo yan ate gamugo au itout dop, nai, Tamol Nanun, namul nupalu wa.

²⁴ “Nanuk manau inane wo dan, inisan girek manau ta irinani na da. Agod urat tamol dam inanen tirnek ta irinani na da. ²⁵ Nanuk a manau inane dan siganen girek manau igo won ilasa tap, an idaisuda ya. Agod urat tamol siganen tirnek igo won ilasa tap, an dam idaisuda ya. Ak dugo, ab muroun in Satan dubol dak ago tap man, sapta taida dop ab muroun an san gugoi lo uf ru dupidinai ak i?

Tamol Anut mi ninen o irer a

Luk 12:2-9

²⁶ “Amaiak ninen o an tamolpein naok ago yak ninedi wo ta arer na wa. Man dugo, mel fidian gamu dufutanig dien dan murnap walal te dilasa wa, agod mel fidian gamu mianuk lo didiraig dien dan dam, murnap Anut iganep id fidian talon a. ²⁷ Ru tidom tubun lo nurupaian dan, ad lo abol ilasa wa. Agod ru dugo kisikisik lo alon dan, ab fun fufu atur pe awam tubun mi abol ilasa dop fidian dulon a. ²⁸ Agod tamolpein a on tini dufuni imat gug, on ntu dufuni imat san ta idaisuda na yan ninedi wo ta urer na wa. Tia, gidad enti a on tini ntu sisem Ades lo daon ka ipidinai san dabai aman da yan ninen o mi urer a. ²⁹ Ak dugo, kusen uraru didaen san an sapita yak i? Nek toea kisaek o lian a. Ago bo man, onane Bai ilon ago ta yen na tap, kusen an dumat pe tan na dudu san tia ya. ³⁰ Nek gurma roun san sutek Anut ilon pasik a. ³¹ Amaiak ninen

o urer umoi. Anut malan lo onjane naon lak na geig a, naon an kuseŋ wei mi sad naod iriŋani geig a.

³² “Talpein ta tamol naod na inŋ ŋaisag ago ibol tap, ŋai dam Tamag kumaen panu na yan naon na ŋatur pe ŋabol ak inŋ ŋaisag a. ³³ Ak man talpein ta tamol naod na inŋ ŋaisag tia yak ago ibol tap, ŋai dam Tamag kumaen panu na yan naon na inŋ ŋaisag tia yak ago ŋabol a.

Jesus tan na ilasa yak san fun

Luk 12:51-53; 14:26-27

³⁴ Kabelan ŋai maror tan en lo ŋigane ilasa san ŋupalu yak ago ilom isou banau. Tia, ŋai muruan ale yau o aŋ lulunjam lo ŋupalu ya. ³⁵ Man dugo, ŋai ŋupalu san fun man igo ya,

‘nanuk dimasap tamadi lo siai digane wa,

nek ago mi nanudi pein dimasap tinadi lo siai digane wa.

Nek ago mi, nanuk pein dam dimasap iraodi lo siai digane wa.

³⁶ Tamol san ager mok man, siganen gugoi ilon lo mi a.’

³⁷ Talpein ta tinan taman niŋedi wo tubun geig imat gug, ŋai o tubun mi ta imat na tap, talpein naok ago man inŋ ŋaisag talpein ilasa san an ta idaisuda na ya. Agod talpein ta nanun muroun niŋedi wo tubun geig imat gug, ŋai o tubun mi ta imat na tap, talpein naok ago yan dam ŋaisag talpein ilasa wo ta idaisuda na ya. ³⁸ Agod talpein siganen aigim fufo imat an isinip ŋieg aban ta iri na tap, inŋ dam ŋaisag talpein ilasa san ta idaisuda na ya. ³⁹ Talpein a siganen madok yabituani dan, madok mok a kumaen panu lo yan banin lo ideg

yau a. Ak man talpein ta ηai niηeg o siganen madok tan san an banin lo ibisei yau tap, madok yen yau san an iηane wa.

Id aenta tibunawai tap, naon uyanan ak tiηane wa

Mak 9:41

⁴⁰ “Talpein enti uyan ipanaη tap, ηai dam uyan ipanag da. Agod iη a uyan ipanag dan, a idinag go ηupalu yan dam uyan ipani da. ⁴¹ Talpein ta iη profet ta ilonη gug profet an uyan ipani tap, iη profet sad urat naon iηane wa. Nek ago mi, talpein ta iη tamol itaot ak ta ilonη gug, tamol an uyan ipani tap, iη dam tamol itaot aman an san naon iηane wa. ⁴² Agod talpein ta nanuk kititik luluηad lo nanuk kisaek o lian, iη ηaisag megeloum ago ilonη go, talpein an you bubarum kitek an mi nanuk an ipani tap, ηai rumok ηurupaian da, kulob an san naon iriηani san tia geig a.”

11

Jesus iη Jon suguek san da

Luk 7:18-35

¹ Saen Jesus iηanen megeloum ru kagin irupidai itout man, iη aben an ibiseig yau a. Yaug aben an san taun gidigheid dien dan lo sad tamolpein ipiteηanai dop Anut san ru ifulale wo itor se ya.

² Aria, saen Jon subanek ab lo imado se man, Kristus urat naok naok igane dan ilonη, iηsiganen megeloum aenta idinaig ru disinig Jesus san na diau a. ³ Ru sinek tamol an Jesus san na dilasag Jon wagen lo ago dubol dusumiani, “Tamol a ipalu san niηen o maη mala nouk mumado dan, on tamol nek amaiak i? Tia, maη tamol sen ak ipalu

san niŋen o mala nouk mumado wak i?” ⁴ Jesus ilon go ru naon irupidai, “Amul aup mel dugo ale dugo, ru alon na yan dam Jon arupeip ilon a: ⁵ malad itau ak afon aban dile dugo, njed saian ak afon turen diabi dugo, a tinid lepra amad da yan tinid siŋaokan dilasa ya. Kududod itau ak niŋen afon dulon dugo, a dumat ak kumaen dumasag dumado dugo, agod tamolpein mel amad tia yak bilalun uyanan ak nfulale pidinai dugo dulon da. ⁶ Agod talpein a nai o ilon ta saian na yan, in Anut san bar inane wa.”

⁷ Jon san megeloum dumul diau dugo, Jesus Jon niŋen o tamolpein irupidai o fun iganeg igo ibol, “Saen an aben kawan talpein tia yak ate au an, an ata mel mok ale wo au ak i? Nag an tim ifurep war iwi yau imul dop ale wo au boi ak i? ⁸ Tia tap, ata wo au ak i? Nag an tamol ta tinin kulos naon lak na geig ak idiri amaiak ale wo au ak i? Tia, tamol a biouŋ naok ago yak didiri duman, in kin sad ab lo mi dumado da. ⁹ Ak niŋen o ata mel mok ale wo au ak i? Nag profet ale wo boi i? Awo, agod nek amaiak niŋen o nrupaian da, profet en man rumok in profet a, ak gug urat suban taidam da imado da, ¹⁰ tamol nek emaiak niŋen o girek e Anut san ru lo digire idug yen den, igo ibol,

‘Ule, naisag ru sinek tamol nidinip, on nao na imug mi yau a.

An lo man onsa dal ikubune wa.’

¹¹ Nai rumok nrupaian da, tamol a pein tinaed lo dilasa yan lulanad lo tamol ta kisaek Jon Suguek san irinani man tia ya. Ago bo man, tamol ta Anut san kagin panek aben ilon lo yan aman tia yan,

fidian aenta paed na imado dan, in Jon Suguek san an irinani a. ¹² Saen Jon Suguek San kuai te ilasag yang saen gamu tumado den lo, Anut san kagin panek aben an sen wagai ikubiani na ya, agod tamol wagai san amaiak silei nam aben an dinane da. ¹³ Man dugo, profet adi agod Moses san Kubiaen dam profet ru lo dubol ilasag yang saen Jon ilasa yan lo inaned urat itout a. ¹⁴ Agod ninen e nrupaian en ilom lo rumok o ilom ago yen tap, profet Elaija Anut san buk lo in ipalu wak ru ago ibol an man nek Jon ama ya. ¹⁵ Tamol on kududo ama da tap, ru an ulon uyanan a.

¹⁶ “Saen en san tamolpein in naok dugo won ak i? In nek ibol nanuk kititik daden aben na dumasig dumado dugo nanuk aenta igo dubol digiai da,

¹⁷ ‘Man an atari wo dum muwi se ya,
ak man an ta atari na ya.

Agod maten san saen an san bar mabi se ya,
gug an ilom saian dugo atata man tia ya.’

¹⁸ Man dugo, Jon ipalug anan tubun ak ta yani na dugo, you sakar ak dam ta iluk na ya, an ninen o ago dubol, ‘in ur saiak aman da ya.’ ¹⁹ Ago dugo Tamol Nanun dam ipalug anan tubun mi yani dugo you sakar dam iluk da, an ninen o ago dubol, ‘Ale wo, tamol en tunalek tamol, agod lukluk tamol, in man takis nilanjal agod aupasek adi dam sad turadi!’ Ak man, kankan a milaen mok amaiak, inanen kagin naok naok an lo mi tamolpein malad lo man itaot geig an ago ikubiai pidinai a.”

Taun funfun a sad tamolpein ilod ta dibili na yan

muruan dile wa
Luk 10:13-15

²⁰ Agog Jesus taun ante inſan kulob tutubu yak wei mi igane se yan ibubuſanai o fun igane ya, man dugo, taun an sad tamolpein ilod ta dibili na ya. Agog inſ igo ibol, ²¹ “O Korasin san tamolpein, muruan tubun geig ale wa; O Betsaida san tamolpein, anſ dam muruan tubun geig ale wa. Man dugo, kulob girager a ſai anſ luluſam lo ſigane se amaiak, wagan geig taun Tair agod Saidon dam ante ſigane wo tap, taun uraru an sad tamolpein ilod ibilsag, muguſ san kulos didirig, yai san utut fo dumasig dumado ya. ²² Amaiak niſen o ſai anſ ſurupaianſ da, saen Anut san bitinaek san nal ipalu wan lo, urat naon Anut anſ ipanaſ an naon senamo geig a, agod muruan an Tair inſ Saidon da sad urat naon an iriſani geig a. ²³ Agod anſ Kaperniam tamolpein, sem yanſ am bisap timtaen lo isuda wak i? Tia mok, Anut inſen inſianſ pe au adu dop tan ilon lo aben yanſ Ades dubol dan lo idiraſ pe amado wa. Man dugo, kulob girager a ſai luluſam lo ſigane yan taun Sodom ante ago mi ſigane yak man, gamu taun an yen dop na wa. ²⁴ Amaiak niſen o ſai anſ ſurupaianſ da, saen Anut san bitinaek nal ipalu wan lo, muruan Anut anſam na igane ilasa wo duman, muruan a gubak mi Sodom san aben ante ilasa man iriſani geig a.”

Anſ ſai ſiſireg na apalup yaes abal a

Luk 10:21-22

²⁵ Saen an lo Jesus ago ibol, “O Bai, onſ kumaen panu agod tan en dam sad Tubun ak, ſai onſ ilo uyan ſupano wo da, en ata wo? Onſ melmel en mi-anaig an lo tamolpein a maſau amad da yan, agod

tamol kankan milaen amad da yak dam melmel en duloŋ san tia geig a. Ak gug tamolpein in nanuk kititik oŋ dumado dan melmel en kubiai pidinaig duloŋ o uyanan a. ²⁶ Awo, Bai, oŋane ilobol man nek ago ya, an niŋen o ilo uyan ak lo oŋ ago gane.

²⁷ “Melmel fidian man ŋaineg Tamag in ŋai tuog lo idiri a. Tamol ta in Anut Nanun ta ilon na ya, nek Taman inŋen mi a. Agod tamol ta in ŋai Tamag ta ilon na ya, nek ŋaiseg mi, gug ŋai mi tia ya, tia, tamolpein a ŋaisag ilobol lo mi Tamag ŋukubiai pidinai o yan in dam ka duloŋ a.

²⁸ “An fidian urat dabai geig agane dugo ilom isali dan, agod muruan tubun mi asini dan, ŋaisag na apalu dop, ŋai an tinim yaes ibal uyanan san ŋupanaŋ a. ²⁹ ŋaisag urat ananep paen na sem ibian adu dop, ŋai lo maŋau anane wa. Man dugo, ŋaiseg mi mos kagin lo ŋumado dugo maror ŋumado da. Ago dop an ŋutumi ŋai lo yaes ibal a.” ³⁰ Man dugo, ŋaisag urat man muruan an tia ya, agod muruan a ŋupanaŋ dan dam pasauman a.

12

Jesus man ubou nal yanŋan Sabat dubol dan san muroun

Mak 2:23-28; Luk 6:1-5

¹ Murnag Sabat nal* lo Jesus kon abi lo itor se ya. Ago dugo inŋan megeloum dimatigen, amaiak niŋen o in kon nuŋon aenta dufunig fun diganeg diani a. ² In ago digane dugo Farisi adi dil a, ago tag Jesus durupeig ago dubol, “Ule, urat a Sabat nal lo

* **12:1:** Juda sad ubou nal yanŋan Sabat dubol dan man Sarare.

tigane san niŋen o idsad kubiaen ipadau amaiak, gamu oŋane megeloum adi urat an digane da.”

³ Ago man Jesus ru naon irupidaig igo ibol, “Nag mel e Dawid igane yen ta asuti na ak i? In iŋanen turan muroun dida kadag[†] san saen lo anan o dumat go, ⁴ Dawid Anut san ab lo iladug, bret a Anut naon na didirig dien an isinig, iŋanen yu tamol adi dida diani a. Bret an tamolpein fidian lo geg a, nek Anut san pris mi diani wa. ⁵ Nag an ru a Moses san kubiaen lo yen dan ta asuti na i? Sabat nal lo pris adi tempel lo urat diganep, saen an lo kubiaen a Sabat nal niŋen o ibol dan dipilali bo man, muruan amad tia ya. ⁶ Aria, ŋai ŋurupaian da, tamol ta an luluŋam lo imado dan in tempel iriŋani geig a. ⁷ Anut san ru igo ibol, ‘An ilo uyan apanag san yai agane wan ilog ta ibol na da, tia, an aenta ilom imuŋanai o mi ŋamat da.’ Aria, an ru an san fun mok aloŋ uyan tap man, an tamol e muruan amad tia yan ta abiai dudu na wa. ⁸ Man dugo, Tamol Nanun man inŋen Sabat nal an san muroun.”

*Jesus tamol tuwon ikurŋak yau an ikubune ya
Mak 3:1-6; Luk 6:6-11*

⁹ Jesus aben an ibiseig yaug, taun ta siŋiren na ilasag, inŋad ubou ab lo iladu ya. ¹⁰ Tamol ta tuon ikikirig ikurŋak yau ak ante imado ya. Ago dugo tamol aenta dal aban dilep lo Jesus ru dupani san niŋen o dusumianig igo dubol, “Ak dugo, idsad kubiaen an iliad funad dop subam tamol ta ka ubou nal lo tukubune wak i?” ¹¹ Ago tag Jesus irupidaig ibol, “En dugo, tamol ta an luluŋam lo in

[†] **12:3:** Pitol

sipsip kisaek aman da ya, ak man sipsip an ubou nal lo gib lo idiau a, an niŋen o tamol an iŋanen sipsip ta irae isuda na wak i? Man tia ya. ¹² Ubou nal lo sipsip tibinawi wo uyanan tap, sapta taida dop id ka ubou nal lo tamol ta tibinawi wak i?”

¹³ Agog Jesus tamol a tuon ikurŋak an irupe, “Bani wate.” Ago man tamol an banin iwateg foun ikubune dag banin aenta igo mi uyan ilasa ya. ¹⁴ Ak man Farisi adi dumasag ubou ab dibi-seig Jesus palan an dumari wo diaug dutumani a. Dal dugo man lo Jesus daon dupani san niŋen o diŋiŋen se ya.

Jesus iŋ urat tamol Anut ipiliani a

¹⁵ Ak man Jesus kagin dugo digane wo dan ilon, an niŋen o aben an ibiseig yau. Ago dugo iŋ tamolpein wei kasik iraug dadi diau se ya, ago dugo a subam amad da yan fidian ikubuniaia a.

¹⁶ Nal an lo dam iŋ ru kagin ipidinaig ibol, “An ŋai enti mok an niŋen o tamolpein ta arupidai na wa.”

¹⁷ Kagin nek amaiak lo, awak aban ta profet Aisaia ibol an nuŋon ilasa ya. Iŋ ago ibol,

¹⁸ “En man ŋaisag urat tamol, ŋaiseg mi ŋupiliani a,
 ŋaineg bubeg mok,
 iŋ niŋen o ilog bulbal da.

Nai ŋaisag Ur iŋ lo ŋigane wa,
 agod dop iŋ tamolpein aben fidian lo dumado
 dan sad na bitinaek Anut san nag ipalu dan
 niŋen o ibol ilasa wa.

¹⁹ Iŋ maeg iganep lo ru ta ikubiai dop iwagiŋ na wa.

Taun san dal lo iŋanen awan iwagiŋ den ta
 dulon na wa.

- ²⁰ In war roun dabai an tia yak daon ta ipani na wa,
 agod lun ided on dan ta igane imat na wa.
 Ago igane yau on dop, nal wadan lo man, tan en
 san tamolpein kot ipidinai an lo,
 kagin itaot an imug pe malan te ilasa wa.
- ²¹ Agod tamolpein a tan titin fidian lo dumado dan
 injanen yanjan ninen o tini ganei digane wa.”

*In dubol ak Jesus in Satan san dabai lo tamolpein
 ikubuniai se ya*

Mak 3:20-30; Luk 11:14-23; 6:43-45

²² Saen an lo tamol ta in tinin lo ur saiak aman
 da yan Jesus sinjiren na diñane dupalu ya. Tamol
 an in kududon agod malan dam itau a. Jesus
 ikubineg uyan isusa ya, agog tamol awan itau an
 ru ibol dugo, malan dam ka aban ile ya. ²³ An
 ninen o tamolpein fidian durut dugo ago dubol,
 “Dag tamol en man Dawid Nanun boi i?”

²⁴ Ak man saen Farisi adi njen an dulon man
 ago dubol, “Tia, ur sisaiak sad gurman yanjan
 Belsebul tabol damaiak, san dabai lo mi in ur
 sisaiak ikudai diau da.”

²⁵ Jesus in sad ilo sou ilon dugo irupidaig ibol,
 “Kin ta san kagin panek aben ilon lo man, in san
 tamolpein sed itarpaleg malan ururu dilasap nug
 dufuni tap, kin an san ager in san na yu diñane
 dupalup aben an daon dupani wo man pasauman
 geig a. Agod taun ta boi, tia, warou ta boi, san
 tamolpein tarpalek ururu dilasap nug dufuni tap,
 taun an, warou an dam, sed ipitinjinai dop ririan
 sad kagin fidian itout yau a. ²⁶ Amaiak ninen o
 Satan in sen mi sen ikudi yau tap, in sen lo yu yabisa
 da. Ago tap, en dugo won pe injanen kagin panek

aben an dabai yen you ak i? ²⁷ Taida mi, ηai Belsebul tuon lo ur sisaiak ηukudai diau dak an rumok tap, enti mok an muroumi ibinawaig ur sisaiak dukudai diau dak i? Fun amaiak ninen o an muroumi in sed mi, kubianek tamol on dilasap bitinaek lo didiran a. ²⁸ Ak man ηai Anut san Urgan lo ur sisaiak ηukudai diau dak ago tap, an gidad alon uyan a, Anut san kagin panek an sinirem na ipalu la ya.

²⁹ “Agod fon, en dugo won pe tamol ta tamol dababai geig ak san melmel isini wo san ab lo iladu wak i? Dal ta tia ya. In gidad imug mi tamol dababai an rasau nam isubani gup, in ka tamol an san ab lo iladup melmel isinip you a.

³⁰ “Talpein enti in ηai ta iganurag na dan, in ηai patun ipanag da. Agod talpein a ηai da sisem anan mutumani san urat ta migane na dan, ηaisag urat iratitale da. ³¹ Amaiak ninen o ηurupaian da, aupasek fidian agod uf ru fidian dam a tamolpein digane dan, Anut aupasek an ka isuas you pidinai a. Ak gug talpein in Awan Urgan ninen o uf ru igane tap, aupasek an Anut ta isuas you na wa.

³² An ninen o talpein ta in Tamol Nanun ninen o ru saiak ibol dan, Anut aupasek an ka isuas you a. Ak gug talpein ta in Awan Urgan ninen o ru saiak ibol dan, saen e gamu yen den lo, agod saen foun ak a murnap ilasa wan lo dam, Anut talpein an san muruan ta isuas you na wa.

³³ “Talpein ai uyan ak ipae tap, ai an san nunon uyan ak inane wa. Gug talpein ai saian ak ipae tap, nunon dam saian a. Man dugo, ai nunon lo mi ule dop, ai naok dugo yan ka ule ulon a.

³⁴ An mot wagai ak sad nanud muroudi! En dugo

wonj anj saian geig amado yan ru uyan ak ka abol ilasa wak i? Man tia geig a. Man ata wo? Kagin saian ak boi, uyan ak boi, tamol ilon injanefute yan injanep awan lo ibol ilasa wa. ³⁵ Tamol uyan ak inj kagin uyan uyan ak tinin ilon lo itumanai an lo, kagin uyan uyan ak mi injal dop an idirai dilasa wa. Ak man tamol saian ak inj kagin saiak saiak tinin ilon lo itumanai an lo, kagin saian saian ak mi injal dop an idirai dilasa wa. ³⁶ Njai njurupaianj da, Anut tamolpein fidian bitinaek lo idirai san nal lo, tamol Anut naon na itur dop, ru kitek a fidian injsinan awan kagin ta ipani na dugo lo gubak mi injinej se yan, ninjen o inj Anut naon na ru an naon ipani wa. ³⁷ Man dugo, onsigane ru lo mi Anut onj tamol uyan ak ibol a, agod onsigane ru lo mi onj tamol saian ak ibol a.”

*Jesus kulob girager igane wo dusumiani a
Mak 8:11-12; Luk 11:29-32*

³⁸ Agog kubiaenj san girek manjau aenta, agod Farisi aenkadi dam Jesus durupej, “Girek manjau, manj iloma igo ya, onj gidad kulob girager ta ganep an lo kob igo wonj onj Anut san ak ago kubiai panama wa.”

³⁹ Ago gug Jesus inj ru naon irupidaig ibol, “Nek ibol tamol ta tamol aenta iwodi ninjedi wo ilon imasa dak igo wonj, tamolpein ensauta a kulob girager dile wo dusumianag dan man, anut sewak aenta ninjedi wo dumat dak igo wonj, inj aupasek tinadi a. An lo kulob girager ta njigane pananj dop ale san ago ta njigane na wa, nek profet Jona san kulob girager amaiak mi a. ⁴⁰ Jona inj adian utol, tidom dam utol, inj iy tubun ak tinjaen lo imado

se ya, ago yak ninjen o, nek ago mi Tamol Nanun dam, adian utol tidom utol tan ilon lo imado wa. ⁴¹ Ninive san tamolpein man anj gamu saen en san tamolpein dida Anut san bitinaek nal lo sisem amasap, kot lo atur a. Ago dop Ninive adi anj ninjemi wo ru dubol ilasa dop boum dupananj a. Man ata wo? Ninive adi Jona san ru ibol ilasa yan dulonj go an lo ilod ibilisa ya; ak man tamol ta inj Jona irinjani geig an gamu imado da. ⁴² Kwin a saut lo ilasa yan man, anj gamu saen en san tamolpein dida Anut san bitinaek nal lo sisem amasap, kot lo atur a. Ago dop kwin an anj ninjemi wo ru ibol ilasa dop boum ipananj a. Man ata wo? Kwin an inj tan asau mok imado bo man, Solomon san kankan milaen amaiak ibol ilasa dop ilonj o ipalu ya. Ago yak gug tamol ta dam inj ente imado da, tamol an man Solomon irinjani geig a.

Ur saiak fon imul yau da ya

Luk 11:24-26

⁴³ “Saen ur saiak ta tamol tinin lo yak dukudip ilasa yau man, aben igosan ak ate gidigheid ila iso wa. Ante aben ta yaes ibal san ile wo abanj yabi wa, ak man aben an ta ile na wa. ⁴⁴ Ago dop ilon lo ibol, ‘Nai gidad njumul pe ab gubak mi ate njumado amaiak lo njau a.’ Inj imasap yau ak man, ab an kawan di ilon dam diriani dugo bala dupani la yan ile wa. ⁴⁵ Amaiak ninjen o inj imul yaup, ur saiadi geig ak 7 taidam injal a. Ur an kulob sisaiak digane san man inj dirinjani geig a. Inj sisem ab an lo diladup dumado wa. Gubak mi tamol an san madok saian a, ak man gamu gup san madok saian geig a. Kagin nek amaiak tamolpein saiadi a gamu saen en lo dumado dan ilasa pidinai a.”

Enti in Jesus tinan di tein muroun aki?

Mak 3:31-35; Luk 9:19-21

⁴⁶ Saen Jesus ab lo imado dugo tamolpein dida diñinen se man, inñinan tinan in muroun dida dupalug kuai te dutur se ya. In Jesus da dukubiai o ilod ago yen a. ⁴⁷ Tamol ta irupeï, “Uloñ, oñane tina, tei murou dida akubiai o kuai te dititiano da.” ⁴⁸ Ak man Jesus tamol an ru naon irupeig igo ibol, “Enti mok ñaisag tinag ak i? Agod enti mok ñaisag teig ak i?” ⁴⁹ Agog inñanen megeloum banin nam ikubiaig ibol, “Ñaisag tinag di teig muroug man nek en mi a. ⁵⁰ Man ata wo, tamolpein ensauta a in ñai Tamag kumaen panu lo yan ilon duri dupani dan, nek an mi ñaisag teig, lug di tinag muroug a.”

13

Tamol ai patun tan fufo iratitale yak san ru fañan

Mak 4:1-9; Luk 8:4-8

¹ Nal kisaek an lo mi Jesus ab ibiseig you aen te yaug imasig imado se ya. ² Ak man tamolpein wei kasik dutumanig Jesus dubuluwi a. Ago tag Jesus wog lo isudag wog an kitek isuk ilasa ya. Agog Jesus imasig imado dugo, tamolpein dutumani an loñ na dutur se ya. ³ Ante man Jesus ru fañan lo mel wei kasik niñedi wo irupidai se ya. Ru ta ago irupidaig ibol, “Saen ta lo tamol ta ai patun isinig abi lo ipae wo yau. ⁴ Yaug siñanen abi lo man ai patun banin igane inawaig tan fufo iratitaleg idu se ya. Saen iratitale man, ai patun aenta dal fufo dudu dugo, anakanak dupalug diani itout a. ⁵ Agog ai patun aenta sagargar fufo dudu ya, tan ante man kuror an tia, ago man milaen tiag ai patun an balud isa ya, man dugo, tan mok an ta

kuror na ya. ⁶ Ak man saen ad isuda man ai baludi an dukurnak diau a. Ai an dam dabidi tan lo ta idiau geig na, an lo dugos diau kisaek on a. ⁷ Ai patun aenta ud saian an luluṅad lo dudu ya, agog sisem disag diau dugo, ud saian an ai uyan ak yafutani an lo nuṅon ta igane na ya. ⁸ Ak man ai patun aenta tan uyan ak fufo dudu man nuṅodi digane ya, aenkadi patudi 100 dilasa, aenta 60, aenta 30. ⁹ Tamol on kududo ama da tap, ru an ulon uyanan a.”

Jesus ru faṅan ibol ak san fun

Mak 4:10-12; Luk 8:9-10

¹⁰ Agog murnag megeloum Jesus san na dupalug dusumiani, “On ata wo saen tamolpein maṅau piteṅanai o dop ru faṅan lo ṅiṅeṅ dak i?” ¹¹ Jesus ru naon irupidaig ibol, “Anut inṅsan kagin panek aben san melmel imianuk an san maṅau ipanaṅ a. Ak man in maṅau an ta ipidinai na ya. ¹² Man dugo, talpein a maṅau anda yak man Anut in subaṅan taidam ipani dop an lo in maṅau idaisuda geig a. Ak man talpein a maṅau aman tia yan, ata maṅau kitekan in lo yen dan, Anut maṅau an inṅsan na ipasi inane wa. ¹³ Nai inṅsad na ru faṅan lo ṅiṅiṅeṅ dan san fun man igo ya.

‘In leil digane bo man, ilod ta itarpasi na da.

Kududod nam dulon bo man, fun mok ta diṅane na da.’

¹⁴ Rumok, in lo profet ru en Aisaia wagam ibol an nuṅon ilasa ya:

‘Saen aṅ ru alon man, ka alon on se ya, ak man san fun ta aṅane na ya,

agod saen aban̄ ale man, malami ka yau on̄ se
ya, ak man ilom ta itarpasi na ya.

15 Man dugo, tamolpein en sad bubedi dabai geig
dilasa ya,

in̄ kududodi ta dulon̄ uyan na ya,
agod maladi ikilakil pasi a.

Tia tap, maladi nam in̄ ka aban̄ dile wak,
kududodi nam ka dulon̄ ak,
agod ilodi nam man̄au ka dijan̄e wa.

Ago dop an lo ilod ibilisa dop didan̄sap n̄aisag na
dupalu dop n̄ukubuniai a.'

16 Ak man an̄ malami bar dijan̄e ya, man dugo,
malami aban̄ ka ile da, agod an̄ kududomi dam
bar dijan̄e ya, man dugo, kududomi ka ilon̄ da.

17 N̄ai ru rumok ak n̄urupaian̄ da, imug geig profet
adi agod tamol itaot ak wei mi, mel e gamu an̄ ale
den dile wo mok dumat se ya, ak man in̄ digane
san tia ya. Agod ru e gamu an̄ alon̄ den dulon̄ o
mok dumat se ya, ak man ta dulon̄ na ya.

Ru fan̄an an san fun

Mak 4:13-20; Luk 8:11-15

18 "Kududom agurep tamol ai patun tan fufo
iratitale yak, san ru fan̄an san fun mok n̄isafulale
wo da. 19 Ai patun dal te dudu man nek ibol ta-
molpein Anut san kagin panek aben san ru dulon̄
dugo san fun ta dijan̄e na yak igo won̄ a. An lo
Satan ipalup ru a Anut tamolpein ilod lo ipaeg yen
dan in̄anep ipasi yau a. 20 Agod ai patun sagargar
fufo dudu man, nek ibol tamolpein ru dulon̄ go
ilod rumok kisaek on̄ go, niñen o ilod uyanan a.
21 Ak man in̄ dabidi man ta idiaug kuror na ya, ago
yan lo sad ilo rumok an ilod lo ta yen milaen na ya.

Saen Anut san ru niĵen o muruan sad na ilasa boi, tia, kubianek ipalu tap, iĵaned ilo rumok dibisei kisaek oĵ a. ²² Aria, ai patun ud luluĵad lo dudu man, nek ibol tamolpein ru rumok an duloĵ pe ilod lo rumok kisaek oĵ dak igo ya. Ak man iĵ tan en san madok niĵen o ilo sou gidigheid mi digane da, agod iĵ melmel wei mi amad da wo dumat da, an lo kagin uraru an Anut san ru ilod lo yen dan yafutani da. Ak niĵen o ru amaiak nuĵon aman tia ya. ²³ Aria, ai patun tan uyanan fufo dudu man, nek ibol tamolpein ru rumok an duloĵ go san fun dam duloĵ siĵaokan ak igo ya. Talpein nek amaiak mi nuĵod ifu mok a, aenta nuĵod 100, aenkadi 60, aenta 30, nuĵodi ago ifu yau a.”

Ud san ru faĵan

²⁴ Jesus afon ru faĵan taida naod na irupidaig igo ibol a, “Anut san kagin panek aben man igo ya. Tamol ta siganen abi lo yaug kon kubulan ipae ya. ²⁵ Agod tidom lo saen iĵsan urat tamol dien dugo, san ager tamol ipalug kon ipae yan luluĵad lo ud marasin saiak anda yak dam ipae idug, isol go yau a. ²⁶ Agog kon isag nuĵon dam didilan te dilasa ya, ak man, ud an dam luluĵad lo dida disa kisaek a. ²⁷ Agog tamol an san urat tamol iĵsan na dilasag durupeig dubol, ‘Gurman, ai patun a oĵ pae yan uyan a. En dugo won go ud dam dida disa kisaek ak i?’ ²⁸ Iĵsad gurman an ru naon irupidaig ibol, ‘Naisag ager tamol kulob an igane ya.’ Ago tag dusumiani, ‘Ak dugo, maup ud an mubilanaid idu wo umat di?’ ²⁹ Gug iĵ ibol, ‘Man tia, kabelan aup kon dam abilanai banau. ³⁰ Amoi dop urarum ka disa diaup, nuĵod tiĵane san saen

ante gup, ηai urat tamol adi igo ηurupidai a. Ud an tu kisaek kisaek atem imug mi atumanaip, yai fufo abibol dusudap dinani diau a. Ak gug kon man atumanaip ηaisag ananη ab lo adiri wa.’ ”

Ai patun kititikan kawan ak san ru faηan

Mak 4:30-32; Luk 13:18-19

³¹ Jesus ru faηan taidam naod na igo irupidai, “Anut san kagin panek man igo ya. Tamol ta ai yaηan mastet dubol dan patun inηaneg siganen abi lo yaug ipae ya. ³² Ai patun an sen kawan kititikan a, ak man saen isa yau dop ai tinan igo woη ilasa wa. Agop raen dam idirip ibalsarer dop kusenη ka ate wur dufuni wa.”

Yis san ru faηan

Luk 13:20-21; Mak 4:33-34

³³ Inη ru faηan taidam irupidaig ibol, “Anut san kagin panek man igo ya. Pein ta yis kabelan inηaneg plawa tubun geig da itumanig ikubuli kisaek, agog yis an plawa ilon lo ifurak yaug iganeg plawa fidian mi ikafut isuda ya.”

³⁴ Jesus melmel an fidian niηedi wo ru faηan lo tamolpein dutumani an irupidai a. Inη ru itaot ta irupidai se na ya. ³⁵ Inη ago igane yan lo awak aban ta profet ta ibol an nuηon ilasa ya.

“ηai awag isupani dop ru faηan lo mi niηinēη a.

Melmel mianuk lo dien se yan, tan ilasag ipalug gamu en nek ago mi dien dan, niηedi wo niηinēη dop tamolpein duloη a.”

Jesus ud san ru faηan ifulale ya

³⁶ Saen Jesus tamolpein dutumani an ibisawaig ab ilon lo iladu man, inηsan megeloum san na dupalug ago dubol, “Ud a abi lo isa damaiak san

fun ubol dop malon a.” ³⁷ Agog Jesus ru naon irupidaig igo ibol, “Tamol a in ai patun uyan ipae yan, Tamol Nanun naon inane ya. ³⁸ Abi man, tan en naon inane ya. Ai patun uyan man, tamolpein ensauta a Anut san kagin panek paen na dumado dan naod inane ya. Agod ud saian an man, tamolpein ensauta a Satan nanun muroun amaiak naod inane ya. ³⁹ Ager tamol enti ud ipae man Satan in sen, agod anan tumanek san saen man, saen gamu lo tumadog ilag san wadan lo amaiak naon inane ya. Agod urat tamol enti anan dutumani an man, enel adi naod inane ya. ⁴⁰ Nek ibol ud saiak dutumani idup yai fo digansa inani yau dak igo won, saen gamu lo tumadog ilag san wadan lo nek ago mi ilasa wa. ⁴¹ Tamol Nanun mitep in san enel idiraip dudu wa. Agop in mel fidian tamolpein idiri dop aupasek digane dan dibia ak, agod tamolpein fidian a sad turen saian an dam dibiaip, dutumanai kisaek pe in san kagin panek aben patun fo diabibol dilasa wa. ⁴² Diabibol pe Ades san yai wananan geig an lo dudu wa. Aben ante man tamolpein tinar digane dop madai lo luod dugurmi wa. ⁴³ Agog Anut san tamolpein, in sad Bai san kagin panek aben lo man, ad ided dak ago won dided a. Tamol on kududo ama da tap, ru an ulon uyanan a.”

Filian naod lak na geig mianuk lo yen dan san ru fanan

⁴⁴ “Anut san kagin panek man igo ya. Tamol ta gib yabig mel naod lak na geig ak tan lo imianaig dien na ya. Agog tamol sen ak ta yaug walal ipanig afon ituanai da. Agog yousai lo yaug in san bioun

fidian moni inane wo didaen lo idiri yau a. Biouñ an san moni inaneg tan an muroun san na yaug tan an idad a.

⁴⁵ “Anut san kagin panek dam igo ya. Daden tamol ta koksai siñaokan ak idad o abañ an ile se ya. ⁴⁶ Nal ta, koksai siñaokan geig ak ile, ago tag yaug inñsan biouñ fidian didaen lo idirig an lo moni inaneg ate koksai an idad a.

Dob san ru fanan

⁴⁷ “Afon Anut san kagin panek an dam ibol dob on a. Iy nlanal dob ta beig lo dubal pe iy funfun diñane wa. ⁴⁸ Saen dob an iy lo inawai man, lon na dirae isuda wa. Agop iy naok naok atem sensen didiri wo dumasip dumado wa. Iy uyan ak senamo didiri dugo saian ak dam senamo didiri wa. Agop uyan ak inaned kulgou lo ditane idu dop, saian ak diabi yau a. ⁴⁹ Saen gamu tumado den san wadan ifutani dop nek ago mi ilasa wa. Enel adi dudup tamolpein saiadi ak, uyadi ak da, sensen didirai idu wa. Agop saiadi ak diabibol diau dop ⁵⁰ Ades san yai wananan geig ak inanai a. Aben ante man tamolpein tinañ digane dop madai lo luod dugurmi wa.”

⁵¹ “Ak dugo, añ mel fidian en alon uyanan ak i?” Agog durupeï, “Awo, malon a.” ⁵² Agog Jesus irupidaig ibol, “Amaiak ninen o kubiaen san girek manau ensauta a Anut san kagin panek ninen o manau diñane yan man nek igo ya. Ab muroun ta filian aman da yak, in ka siganen biouñ lo mel ta foun ak, agod wagam ak dam, iragursip tamolpein malad lo kuai te idiri wa.”

*Profet inſan muroun luluſad lo yaſan tia ya
Mak 6:1-6; Luk 4:16-30*

⁵³ Saen Jesus ru faſan inſen itout man aben an ibisei a. ⁵⁴ Agog inſanen panu mok lo yaug ubou ab lo maſau ipiteſanai se ya. Ak man Nasaret tamolpein saen inſan ru duloſ man durut saian a. Agog dubol, “Tamol en dugon te maſau inſane yak i? Agod kulob dababai a igane idu dan san dabai dam dugon te inſane yak i?” ⁵⁵ In man nek kapenta kawan amaiak san nanun, tinan Maria, agod tein moroun Jems, Josef, Saimon agod Judas. ⁵⁶ Agod lun moroun e dida tumado da! Amaiak niſen o tamol en dugon te mel a fidian igane dan san dabai inſane yak i?” ⁵⁷ Fun an niſen o naod ikafut go patud dupani a. Ago gug Jesus irupidaig ibol, “Panu fidian lo tamolpein profet ta yaſan diabisa wa, nek inſanen panu fun lo, agod inſanen dar lo man tia ya.” ⁵⁸ Nek an niſen o aben an lo kulob dabai anda wei mi ta igane na ya, man dugo, in niſen o ilodi ta rumok na ya.

14

*Jon suguek san dufuni imat a
Mak 6:14-29; Luk 9:7-9*

¹ Saen an lo Herod, provins Galili agod Perea sad tirnek tamol imado se ya. In tamolpein sad ru Jesus niſen o dubol dugo ilon a. ² Agog inſanen urat tamol irupidaig ibol, “Tamol en man Jon suguek san. In mateſ aben lo yak imasa da ya, an lo man dabai tubun geig tinin ilon lo yen dugo lo urat igane da.” ³⁻⁴ Imug Herod in Herodias iwon igo inſane ya, ak man pein an inſanen tein Filip san

iwon a. Ak niñen o Jon suguek san an niñen o Herod irupeig ibol, “On Herodias iwo igo won ñane amaiak niñen o kubiaen pilali a.” Fun an lo Herod inanen ai katuk irupidaig Jon diabig, dusubanig, subanek ab lo digane yau a. ⁵ Herod ifuni imat o igane se ya, ak man doup adi niñedi wo irer a. Man dugo, inşad ilo sou lo man Jon in profet ago dubol se ya.

⁶ Ak man saen Herod tinan igansi ak san nal idu yan lo, Herodias nanun pein tamolpein ante yan naod na isaluwai ila iso se ya, an lo man Herod pein baras an niñen o ilon uyanan a. ⁷ An lo in ru dabai nam irupeig ata mel niñen o isumiani dop man, rumok geig ak mel an ka ipani san mi a. ⁸ Ago tag yaug tinan, dal dugo ipani wak o isumiani a. Agog imul go Herod irupeig, “Gamug geig Jon suguek san an kabuñan daeg lo ganep sini palup panag a!” ⁹ Kiñ Herod ilon muruan geig a, ak man ru dabai geig pein baras an Herod turan muroun naod na ipani an niñen o, inanen yu tamol irupidaig nek pein an ibol ago mi digane ya. ¹⁰ Ago tag inşan yu tamol diaug subanek ab lo Jon buron dutute ya. ¹¹ Agog kabuñan daeg lo disinig Herod san ab lo diaug pein baras an dupani a. Agog pein an afon inaneg isini yaug tinan ipani a. ¹² Agog Jon san megeloum dupalug tinin diñane diaug disare ya. Agog diaug mel ilasa yan Jesus durupeig ilon a.

Jesus tamol 5,000 ifutuwai a

Mak 6:30-44; Luk 9:10-17; Jon 6:1-14

¹³ Saen Jesus Jon san maten ilon man, wog fo isudag pasak nam aben ta yoitout yen dak ate yau a. Ak man saen aben a ate Jesus imug imado

yak san tamolpein Jesus ibisawai an dulonj man, inaned panu anen anen dibiseig, lonj na diaug njed nam Jesus dirig diau se ya. ¹⁴ Saen Jesus wog ibiseig idu man, tamolpein malan tubun geig ak dititianig dumado dugo yil a. Inj ilon ipidinai an lo talpein a subam amad da yak luluñad lo yan ikubuniaid idu ya.

¹⁵ Ad idu yau dugo injsan megeloum dupalug durupeig dubol, “Aben en yoitout a, agod ad dam idu yau da, amaiak ninen o onj tamolpein dinaip panu na diaup, ananj didad pe diani wa.” ¹⁶ Agog Jesus ibol, “Gidad, aben en dibisei dumoi, ansem mi ananj ta apidinaip diani wa.”

¹⁷ Ago gug inj Jesus durupeig dubol, “Manj etna bret faiv o lian a, agod iy dam uraru o lian a!”

¹⁸ Agog inj ibol, “Igo asini apalu wa.” ¹⁹ Agog tamolpein dutumani an irupidai, “Ago gafurfur fo amasi.” Agog bret faiv inj iy uraru da yan isinig, malan keit lo isudag, bret iy da bar ipanig yafute idu se ya. Agog ananj an megeloum ipidinaig diaug tamolpein dupidinai a. ²⁰ Fidian diani man luadi ipuk a. Diani itout man megeloum diaug samsamun disini wo ditiliani se ya. Samsamun disini an sareg 12 tutubu yak digane inawai a. ²¹ Tamol mi faiv tausen ananj an diani a, taida mi pein wei mi, nanud muroudi dida ananj an dam diani a.

Jesus you fufo itor a

Mak 6:45-52; Jon 6:15-21; Mak 6:53-56

²² Saen ananj dianig itout man Jesus inanen megeloum wog fo dusudap aen ate imug diau wo irupidai a. Ago dugo inj kitekan ka imado dugo,

tamolpein siganed ab lo dumul diau wo irupidai a. ²³ Saen tamolpein idinaig diau pasik man, inj sen mi did fo Taman san na igudani wo isuda ya. Agog saen ad idu yau man sen kisaek did fufo imado se ya. ²⁴ Saen an lo wog man you titinjaem yen se ya. Agog tim ifure dugo you dam imasa man wog ifuni ila iso se ya, man dugo tim naon na yen se ya.

²⁵ Salso idug abanj ipasti yau dugo, Jesus injanen megeloum sad na you fufo yau se ya. ²⁶ Ak man saen injanen megeloum ago dile man direr dudug dubol, “An man tamol njutun a!” Agog disasai dugo disuruwor se ya.

²⁷ Agog Jesus irupidai kisaek onj go ibol, “Dabai anjane! Naiseg o, asuruwor amoi!”

²⁸ Agog Pita ru naon irupeig ibol, “O Tubun en, onjse mok tap, ubol dop njai dam you fufo onjsa na njupalu wa.”

²⁹ Agog Jesus ibol, “Palu!” An lo man Pita imasag wog lo yak ilasag fun iganeg you fufo mi yau se ya.

³⁰ Ak man malan yaug tim tubun ak ifure dugo ile man irer saian geig a. Agog fun iganeg you lo isarir idiau dugo iwagin, “Tubun en, binawag!”

³¹ Jesus banin iwate kisaek onj go yabi dugo isumiani, “Onj tamol ilo rumok ama kabelan, ata wo ilo weiwei ak i?”

³² Saen uraru an wog fo dusuda man, tim ifure yan itout kisaek onj a. ³³ Agog injan megeloum turud disaluwig ubou an dile dugo dubol, “Rumok geig, onj Anut Nanun mok a!”

³⁴ Saen you dututeg tan yanjan Genesaret dubol dak ate disasau man dusuda ya. ³⁵ Tamolpein ante Jesus naon dile da man, ru diganeg panu tan

ante yan fidian sad na yau dugo, tamolpein subam amad da yak Jesus san na diɲal dupalu wo dubol a. ³⁶ Tamolpein subam ifu dan Jesus dusumiani dop inɲsan kulos bitinɛn an mi ka dusupuri wa. Ago dugo fidian a dusupuri an uyad isusa da ya.

15

Juda gurman sad balek uraru san kagin

Mak 7:1-23

¹ Agog Farisi inɲ kubiaenɲ san girek maɲau da Jerusalem dibiseig Jesus san na diaug dusumianig igo dubol, ² “En ata wo oɲsa megeloum adi idsad tubud baged sad tamol kagin digansi an ta diri na dak i? Inɲ banidi ta dufulani na gup anaɲ diani da.”

³ Ago tag Jesus ru naon irupidaig igo ibol, “Ata wo aɲ siganem tamol kagin ari apani wo Anut san ru kubiaenɲ patum apani dak i? ⁴ Man dugo, wagam mi Anut ru kubiaenɲ en igansi, ‘Oɲane tina tama awad paen na mado dop kagin pidinai o uyan a.’ Agod Anut ru kubiaenɲ en taidam ibol, ‘Ta inɲ awan nam tinan taman saian ipidinai tap man, mateɲ ile wa.’ ⁵ Ak man aɲ abol, ‘Tamol ta taman boi, tinan boi, ka igo irupeɲi, mel ta ate ɲai ka ɲibinawo san man, ɲai mel an Anut ɲupani san ɲien ɲupani la ya. O kabel, an ninɛn o ɲai mel an ɲupanaɲ san tia ya. ⁶ Tamol an ago ibol tap, ru kubiaenɲ a inɲ tinan taman kagin ipidinai o ago ibol an man, nuɲon an tia ya.’ Ago man aɲanem tamol kagin ari apani dan lo Anut anen ru nuɲon tia agane ilasa da. ⁷ Aɲ balem rararu a! Profet ru a Aisaia gubak mi aɲ ninɛmi wo ibol ilasa yan rumok geig a. Inɲ igo ibol,

⁸ “Tamolpein en awadi nam yaɲag diabisa da,

ak man bubedi man asau geig yen da.

⁹ In sen kawan ηai ubou amag dile da,
man dugo, pitejanek a tamolpein durupidai
dan man nek tamol siganed ilo sou mi a.' ”

¹⁰ Agog Jesus tamolpein inſan na dutumani wo
igiai a. Dupalu dugo irupidaig ibol, “En alon dop
anane o uyanan a! ¹¹ Anan a tamol awan ilon lo
iladu dan, ilon ta nun igane na da. Tia, mel a tamol
awan lo ilasad amaiak ilon nun ipani da.”

¹² Agog inanen megeloum adi siniren na dupalug
durupei, “Ak dugo, saen Farisi adi ηinηan an dulon
man, on niηe wo ilod saian an ulon ak i?”

¹³ Jesus Farisi adi niηedi wo ru naon megeloum
irupidaig igo ibol, “Ai fidian ηai Tamag tan lo ta
ipae na yan, ibilani yau a. ¹⁴ Abisawai, in man
unbek malad itapul ak igo ya. Aria, tamol ta malan
itapul aman ak, turan ta dam malan itapul ak,
dal ikubiai pani wo banin te yabi tap man, tamol
uraru an dog lo diau dudu wa.”

¹⁵ Ak man Pita irupeig ibol, “Ru mitilaen a rup-
idai an fun fulale dop malon a.”

¹⁶ Agog Jesus ibol, “An dam nag manau lo katuk
am mi ak i? ¹⁷ An ta alon o uyan na yak i? Mel a
tamol awan lo iladu dan anan mi a, agop tinan
lo dam iladup dibe san dal lo yaup tinin patun
fo yak ate ilasa wa. ¹⁸ Ak man mel ta awan lo
ilasa man senamo geig a, man dugo, an ηutun lo
ilasa da, agod mel amaiak mi tamol ilon nun ipani
da. ¹⁹ Man ata wo? Kagin naok naok igo yan
tamolpein sad ηutud lo ilasa da: ilo sou saian ak
san kagin, tamol ifuni imat dak, turan iwon ida
dien dak, jeit kagin, gumagam kagin, supalek ru

agod uf ru dam mi a. ²⁰ Mel naok amaiak tamol nun ipani wa. Ak man tamol banin ta ifulani na gup ananj yani dan, nun ta ipani na wa.”

Tan Kenan san pein ta Jesus o ilon rumok a

Mak 7:24-30

²¹ Agog Jesus aben an ibiseig gob adi sad tan ate yaug, Taia in Saidon da sad distrik lo itilianig itor se ya. ²² Aria, gob pein ta tan Kenan dubol dan ate imado dan isusag awan tubun ak lo iwagin, “O Tubun ak, Dawid Nanun, ilo imunjanag! Ur saian ta naj nanug pein itirni dugo muruan ipani geig da.”

²³ Ak man Jesus ru naon ta irupei na ya. Agog inisan megeloum sinjiren na dupalug dubol, “On pein an peip sen ilasa, man dugo, in man irama dugo mibinawi wo igiama da.”

²⁴ In ru naon irupidai, “Anut naj Isrel san sipsip dideg diaud amaiak mi nibinawai o idinag a.”

²⁵ Ak man pein an sinjiren na ipalug turun isaluwig irupei, “O Tubun ak, binawag!”

²⁶ In ru naon irupeig igo ibol, “Nai nanuk sad ananj njanep goun diani wo naji yau tap, an ta uyan na wa.”

²⁷ Pein an ibol, “Awo, Tubun en ru rumok ubol da. Ak gug goun dam inaned muroudi sad awad aban tan na idu man ka diani wa.” ²⁸ Agog Jesus ru naon irupeig ibol, “O pein, onane ilo rumok an tubun geig a! Nek on ilo yen dak ago mi on lo ilasa wa.” Ago ibol dugo pein an nanun pein uyan isusa kisaek on a.

²⁹ Agog Jesus aben an ibiseig You Galili aen irig yau se ya. Agog yaug bubun ta fo isudag ante imasig imado ya. ³⁰ Ago dugo tumanek malan

tubun ak inſan na dupalu se ya. Tamolpein nſied ikael ak, a malad itapul ak, a banid ikael ak, a awad itau ak, agod aenta dam wei mi diſal go dida dupalu se ya. Agog Jesus nſien fun na didiraig tinid ikubune dugo uyad isusa da ya. ³¹ An lo tamolpein dutumani an, saen tamolpein awad itau ak diſinſeſ dugo, a nſied ikael ak uyad isusa dugo, a nſied ikikai ak ditiliani ditor dugo, agod a malad itapul ak afon abanſ dile da dugo dil man, durut saian geig a. Ago dugo Isrel sad Anut yanſan diabisa ya.

Jesus tamol 4,000 ifutuwai a

Mak 8:1-10

³² Agog Jesus inſan megeloum san na dupalu wo igiai a. Dupalug irupidaig ibol, “Nai tamolpein malan tubun en ilog imunſanai da, man dugo, gamu nal utol yau la dugo inſ nai dida mumado ya, ak gug ananſ ta diani san etna tia ya. Ak man dimatigen dop nſidinaip diau man, ilog ta ibol na da, kabelan dal na yaes ifu dop malad itiliani banau.”

³³ Agog inſanen megeloum durupeig dubol, “Man dugon te ananſ mile dop miſanep lo tumanek tubun geig en ka mufutuwai ak i? Aben en yoitout a.”

³⁴ Jesus isumianai, “Anſ bret sapita yak i?”

Inſ dubol, “Bret seven dien da, agod iy kititik kisaek kisaek a.”

³⁵ Agog inſ tamolpein tan na dumasii wo irupidai dugo ³⁶ bret seven inſ iy da inſaneg, Anut ilo uyan ipani gug yafuteg inſanen megeloum ipidinaig, di-aug tamolpein duwae pidinaii a. ³⁷ Fidianaſ ananſ an dianig luad ipuk. Diani itout go megeloum dumasag ananſ samsamun dutumanig sareg seven

lo ditaneg awad isa ya. ³⁸ Tamolpein ensauta a anañ diani an sad sutek man tamol 4 tausen, agod pein nanuk man ta dusutai na ya. ³⁹ Jesus tamolpein siganed panu anen anen atem diau wo irupidaig, wog lo megeloum dida dusudag, panu Magadan* san tan tilianek lo diau a.

16

*Jesus kulob girager igane wo dududuwi a
Mak 8:11-13; Luk 12:54-56*

¹ Farisi adi Sadyusi dida Jesus san na dupalug dusubani wo bitinaek lo digane ya. Inj Anut san dabai nam kulob girager ta kob igo wonj igane dop dile wo dusumiani a. ² Inj ru naon irupidaig igo ibol, “Saen ad idu yau dop anj abol, ‘Gabulo dop malin ibalsi wa,’ man dugo, timtaen daran da. ³ Agod tidom lo mi dop abol, ‘Gamui ui isi wa,’ man dugo, timtaen daran an bilkas ak ituani a. Anj ka keit san leil akubiani ale uyanan mok a, ak man anj kulob sensen a anjiganem saen lo dilasa la yan, sad fud mok akubiani ale san anj ta idaisuda na ya. ⁴ Nek ibol tamol ta tamol aenta iwodi niñedi wo ilon imasa dak igo wonj, tamolpein ensauta a kulob girager dile wo dusumianag dan man, anut sewak aenta niñedi wo dumat dak igo wonj, inj aupasek tinadi a. An lo kulob girager ta njigane pananj dop ale san ago ta njigane na wa, nek Jona san kulob girager amaiak mi a.”

*Farisi inj Sadyusi da sadyis
Mak 8:14-21*

* 15:39: Magdala

⁵ You tilianek dututeg you aen ate diaug disasau man, inanen megeloum bret ta disini na yan ilod isou a. ⁶ Agog Jesus irupidai, “Kagin agane wa, Farisi in Sadyusi da sad yis an ninen o kagin agane wo uyanan a.”

⁷ Agog fun diganeg ilod lo mi dininon yau imul se ya. “Ago ibol man fun dugo i? Nag id bret ta tisini na, amaiak ninen o ago ibol boi.”

⁸ Jesus dugo dubol se man ilon, ago tag isumi-anai, “O an tamol ilo rumok kabelan geig amam da ya, ata wo bret tia yan ninen o aninon dak i? ⁹ An an ta alon uyan na di? Saen nai bret faiv nafuteg ate tamol faiv tausen nfutuwai an ilom inon ak i? Agod an sareg sapta awad agane inawai an dam ilom ta isou na i? ¹⁰ Tia, bret seven nam tamol 4 tausen nfutuwai, agod sareg sapita awad agane inawai an dam ilom inon ak i? ¹¹ En dugo won go nai bret ninen o ta nininon na yan, ta alon sinon na yak i? Aria, afon kududom agurep kagin agane: Farisi in Sadyusi da sad yis ninen o sen alasa wa.”

¹² Agog inanen megeloum dulon ak in yis bret ate digane dan ninen o ru kagin ta ipidinai se na ya. Tia, pitenanek a Farisi in Sadyusi da tamolpein durupidaid amaiak ninen o ru kagin ipidinai se ya.

Pita Jesus in Kristus an kuai te ibol a

Mak 8:27-30; Luk 9:18-21

¹³ Saen Jesus inanen megeloum dida distrik a taun Sisaria Filipai siniren na yen dan te dilasa man, igo isumianai, “Tamol Nanun en enti mok ak i? Tamolpein in ninen o ru dugo dubol dak i?”

¹⁴ Agog dubol, “Aenkadi on Jon suguek san ago dubol dugo, aenta on Elaija dubol dugo, aenta

on dag Jeremaia boi, tia, on profet ta a wagam dumado na yan lulunad lo fon lasa boi ago dubol da.”

¹⁵ Agog Jesus isumianai, “Ak man ansem mi najai enti mok abol di?”

¹⁶ Agog Saimon Pita inſan ru naon irupei, “On Kristus, on Anut ipiliano ama ya, on Anut a kumaen imado dan Nanun mok a.”

¹⁷ Jesus ru naon irupeig igo ibol, “Saimon, Jon nanun, on bar ama da, man dugo manau an tamol ta, ta ifulale dugo ulon na ya, tia, manau an itaot najai Tamag kumaen panu lo yan san na ilasa dugo ubol ilasa ya. ¹⁸ Agod najai nŕurupaio da, on Pita, yanŕa san fun man pat. Pat tubun en fufo naisag midaen nŕususe wa. Agod maten san dabai an najaineg midaen ibiai dudu san tia ya. ¹⁹ Najai Anut san kagin panek aben san ki nŕupano wa, agod ata mel tan en lo futani tap, kumaen panu na dam itau a, agod ata mel tan en lo pasi tap, kumaen panu na dam awan ipasi a.” ²⁰ Agog Jesus inanen megeloum adi ru kubiaen dabai mok an ipidinai man, inſen mi Kristus, an ago ta dubol ilasa na wa.

*Jesus imat san nal sumeik ak ago irupidai a
Mak 8:31-9:1; Luk 9:22-27*

²¹ Saen an lo yau man Jesus inanen megeloum adi kuai tem irupidai se ya, in Jerusalem na yaup ante dop Juda sad matu gurman adi, pris gurman adi, agod kubiaen san girek manau adi saian dupani dop madai wei mi ile na gup dufuni imat a. Agop murnap nal utol lo Anut ifufunip kumaen imasa da wa.

²² Ago ibol go Pita Jesus yabig inaneg ida gigin na diaug san ru an ninen o igo ibol, “Tubun en, tia geig a, kulob ago on lo ta ilasa na wa!”

²³ Agog Jesus idansag irupe, “Satan, nai patug fo sen lasa! On nai naog dal fou da, man dugo, ilo sou uri dan man Anut san tia ya, an man tamol san mi a.”

²⁴ Agog Jesus inanen megeloum irupidaig ibol, “Talpein ta nai nieg aban iri wo imat tap, gidad inſan mel an fidian ilon inaon pe inſiganen aigim isinip nieg aban mi iri wa. ²⁵ Man ata wo? Talpein enti siganen madok kagin mi yabi sakar tap, inanen madok murna san an ibisei wa. Ak gug talpein enti nai nineg o siganen madok kagin ibisei tap, inſiganen madok mok an ile dop inane wa. ²⁶ Talpein ta tan en san madok lo malan imug dop, an lo tan en san filian fidian an san muroun ilasa wak gug, nŕutun ideg yau tap, nuon uyan ak dugo won igane ilasa wak i? Man tia geig a. Tia, mel dugo man, talpein ta Anut ipanip, an lo siganen nŕutun an idad inane dop daon ta ile na wak i? ²⁷ Man dugo, Tamol Nanun mitep Taman san girager an lo ipalu dop, inanen enel adi dida dudu wa. Agop talpein fidian inaned urat dugo digane na yan naon ipidinai a. ²⁸ Rumok nŕurupaian da, tamolpein aenta igo dutur dan gamugo dumat dop, Tamol Nanun amaiak Kin igo won ipalu dop dile gug, murnap dumat a.”

17

*Jesus tinin ibilisag ad on ided a
Mak 9:2-13; Luk 9:28-36*

¹ Nal siks itout go, Jesus in Pita, Jems agod tein Jon da injal go imug did lak na geig ak fo disudag ate inşed mi dumado ya. ² Agog ante Jesus tinin ibilisa dugo dile ya. Inşan naon man ad on ided se ya, agod san biouñ tinin fo man ibilisag lilaman on milkouk geig ilasa ya. ³ Ago dugo Moses in Elaija da megeloum naod na dilasag Jesus da dinñen dugo dil a.

⁴ Agog Pita imasa kisaek on go Jesus irupeig ibol, “Tubun en, nek uyanan geig man ente mumado da! On ilo ibol tap, lalai utol etna nabi wa, onsa kisaek, Mosen san kisaek, agod Elaijah san kisaek dam nususe wa.”

⁵ Saen inñen se man timtaen ta ided dak ipalug, ibuluwai dugo, nñen ta timtaen an ilon lo yak ibol, “En man naineg Nanug mok, naineg bubeg mok, in nñen o njai ilog tubun mi uyanan da. Awan alon!”

⁶ Saen megeloum utol an nñen an duloñ man, tubun mok direr go naodi tan fo ditakok dudug dumunamig dien se ya. ⁷ Ak man Jesus sad na ipalug isupuraig ibol, “Amasa, arer amoi.” ⁸ Saen dufotsa man, tamol ta dile man tia ya, nek Jesus sen kisaek mi dile ya.

⁹ Saen did dibiseig dudu se man, Jesus ru dabai anda irupidaig ibol, “Mel gamu ale yan nñen o aup tamolpein ta arupidai na wa, abol amoi dop Tamol Nanun mateñ aben lo Taman ipasi inane gup abol a.”

¹⁰ Agog inanen megeloum utol dusumianig dubol, “En ata wo kubiaen san girek manau, Elaija imug ipalu dop Kristus murna ilasa wak ago dubol dak i?”

¹¹ Jesus ru naon irupidai, “Rumok, Elaija imug ipalu dop mel fidian ikubuniaip uyad dususa da wa. ¹² Ak man ηai ηurupaian da, Elaija imug ipalu la ya. In bo ilasa gug tamolpein in ta dile dulon na ya. Ago dugo insiganed ilobol lo mi saian dupani se ya. Nek dal kisaek an lo mi in Tamol Nanun dam saian dupani wa.” ¹³ Agog inanen megeloum dulon ak Jesus Elaija mok ninen ta ibol na ya, tia, Jon suguek san amaiak ninen o ibol na ya.

*Jesus nanuk ta ur saiak anda yak ikubune ya
Mak 9:14-29; Luk 9:37-43a*

¹⁴ Saen dumul go tamolpein a dutumanig dumado se yan sad na dupalu man, tamol ta Jesus san na ipalug naon na turun isaluwig ibol, ¹⁵ “O Tubun ak, ηaineg nanug ilo imunani! Saen wei mok kurbarib* ifunig an lo madai tubun geig ile da. Saen aenta ilon inaoη dop yai lo idu dak, saen aenta dam you lo idu da. ¹⁶ Ak ninen o oηane megeloum sad na ηinane ηupalu yak man dukubune wo digane yak gug tia ya.”

¹⁷ Jesus ru naon irupeig ibol, “An saen en san tamolpein man ilo rumok amam tia ya, agod ilom gidigheid aman a. Nal sapta ηai an da tumado wak i? Nal sapta muruan a apanag yau an ηisini wak i? Nanuk an igo anane apalu.” ¹⁸ Agog Jesus in ur saian nanuk ilon lo yan ru dabai aman da nam ipei dugo, ur saian an nanuk ibiseig uyan isusa kisaek on a.

¹⁹ Murna gug megeloum adi pasak nam Jesus san na dupalug dusumiani, “En ata wo man ur saian an mukudi san tia yak i?”

* **17:15:** Lunajin

²⁰ In ru naon igo irupidai, “Man dugo, an ilo rumok kabelan mok amam da ya. Nai ru rumok nrupaian da, gidad onjane ilo rumok nek ibol ai patun tusan igo won tap, did en rupeip ubol, usuk onte wau, ago ubol dop yau a. Mel fidian onjane san tia yan ka gane wa.”†

Jesus saen uraru injsan materj ninjen o megeloum irupidai a

Mak 9:30-32; Luk 9:43b-45

²² Saen Jesus injanen megeloum adi dida Galili na turenj diabi se man, irupidaig ibol, “Tamol Nanun inj ager tamol banid lo digane yau o da. ²³ Agop dufuni imat a. Murnap nal utol itout gup, Anut ifufunip kumaen imasa da wa.” Injanen megeloum ago dulonj man, tubun mi ilod itau idu ya.

Jesus tempel san takis idad a

²⁴ Saen Jesus injanen megeloum dida Kaperniam na dupalu man, tempel san takis njalanj dupalug Pita dusumiani, “Dugo, onjane girek manjau tempel san takis idad o dak i?”

²⁵ Pita ru naon igo irupidai, “Awo.”

Murnag Pita ab ilon lo ipalu dugo Jesus imug injen, “Saimon, tan en sad kin, enti sad na takis moni dinjane dak i? Insigned nanud muroudi sad na, tia, tamolpein gol ak sad na, aria, onsa ilo sou dugo yak i?”

²⁶ Agog Pita ibol, “Tamol gol ak sad na ya.”

Ago ibol man Jesus irupe, “Ago tap nanud muroudi sad na takis moni ta digane na da. ²⁷ Ak man gidad ilodi ta tigane saian na wa. Ago yak ninjen o you lo waup oul ubal idu. Iy malmalan

† **17:20:** Boi 21 Grik lo tia ya.

wane dan rae isudap, awan pasi dop moni ate yen dan nane. Moni an nek idaisuda ya, onse niñe wo, agod n̄ai n̄utug dam, ate tempel san takis udad a.”

18

*Enti Anut san kagin panek aben lo in malan te ya
Mak 9:33-37; Luk 9:46-48*

¹ Saen an lo megeloum adi Jesus san na dupalug dusumiani, “Enti Anut san kagin panek aben lo yañan malan te yak i?”

² Agog Jesus nanuk ta iwagig megeloum naod na igunig itur dugo ³ irupidaig ibol, “N̄ai rumok geig n̄urupaian da, an gidad sem ibilañsap nanuk en igo woñ alasa. Tia tap, Anut san kagin panek aben an lo aladu san tia geig a. ⁴ Amaiak niñen o talpein enti sen yabi idup nanuk en igo woñ ilasa dan, nek talpein amaiak Anut san kagin panek aben lo yañan malan te ya.

⁵ “Talpein enti n̄ai yañag lo nanuk igo yan inane wo iyuñani tap, n̄ai dam iniliag o iyuñanag da. ⁶ Ak man nanuk ta n̄ai o ilon rumok dan, talpein ta iganep aupasek lo idu tap, talpein an gidad kagin igane wa. Man dugo, pat tinan buron lo disisi idup beig lo dibal pe isarir o man bo, uyan mok a. Man ata wo? An tia tap, ai wadan n̄upani san man irinani geig a!

⁷ “Tan en san tamolpein ensauta a mel ta lo ilo rumok adi aupasek lo dudu wo dududuwai dan, naon muruan tubun geig ak diñane wa! Rumok, melmel ta tamolpein ilod diñanep lo au dupas dan, dilasa san dal tufutani san tia ya. Ak man talpein enti ilo n̄anek an igane ilasa dan, naon saian geig

ak injane wa! ⁸ Amaiak niŋen o oŋ bani boi, tia, nje boi, iganep aupasek lo udu tap, tutep wabi yau! Gidad nje bani tia man ago madok yen yau san lo ladu man ta saian na ya, man dugo, kabelan nje bani ama da yak ago dijilio dop yai pempem ided dan lo dubulo wau banau. ⁹ Agod oŋ mala iganep au upas tap, mala an bilanip biliau a. Gidad mala kisaek o lian da ago madok yen yau san lo ka ladu wa. Kabelan mala uraru mi dop dijilio Ades san yai lo dubulo wau banau.

Sipsip ideg yau ak san ru fanjan

Luk 15:3-7

¹⁰ “Anj gidad nanuk kititik anjanem leil lo yanjad tia yak ago ilom ta isou na wa. Man dugo, naj jurupaianj da, injaned enjel kumaen panu lo yan maladi pempem yau dop naineg Tamag kumaen panu lo imado dan naon dile da.*

¹² “Anjanem ilo sou dugo yak i? Sipsip muroun injanen sipsip 100 dida ditiliani da, ak man kisaek man naon tia ya. Sipsip muroun an dugo igane wak i? Inj sipsip 99 an ibisawaip, did luan te gafurfur dianid dumado dop yaup kisaek an abanj an ile wa. ¹³ Sipsip naon tia yan ile tap, 99 a dumado dan niŋedi wo ilon ta tubun mi uyan na wa. Tia, kisaek a naon tiag fon injaneg imul da yan niŋen o man ilon tubun geig uyanan a. ¹⁴ Nek dal kisaek an lo mi, anjanem Tamami kumaen panu na yan, nanuk kititik igo yan naod tiap dideg diau o ilon ago ta yen na da.”

Tei ta oŋ lo aupasek igane ya

* **18:10:** Boi 11 Grik lo tia ya.

15 “Saen Kris tei ta oŋ lo aupasek igane tap, san na waup inŋsan aupasek an kibiai ile. Ak man nuŋom uraru mi nug lo anjineŋ a. Aria, oŋ awa ilonŋ tap man, oŋ oŋane tei da ilom kisaek da wa. 16 Ak man awa ta ilonŋ na tap, tamol kisaek boi, uraru boi, uŋal pe dida aup oŋane tei da anjineŋ a. Dal an lo ru fidian a sisem abol dan, talpein nuŋod uraru an ka dibinawo wa. 17 Aria, inŋ oŋane tei uraru an awad ta ilonŋ na tap, muruan an gidad Kris midaeŋ naod na abol ilasa wa. Aria, Kris midaeŋ dam sad ru ta ilonŋ na tap, tamol an gob igo wonŋ, tia, takis ŋilarŋal tamol igo wonŋ, ago ale dop abiseip asau mi au.

18 “Ŋai ru rumok ŋurupaianŋ da, an mel ta tan na yak afutani tap, kumaen panu na dam itau a, agod mel ta tan en lo apasi tap, kumaen panu na dam ipasi panaŋ a.

19 “Agod afon ŋurupaianŋ da, saen anŋ nuŋom uraru mel ta niŋen o kabuŋam kisaek go agudani tap, ŋai Tamag kumaen panu na yan mel an igane panaŋ a. 20 Man dugo, aben ta ate talpein uraru boi, utol boi, ŋai yanŋag lo dutumani dan, ŋai inŋ dida mumado da.”

Urat tamol ilo muŋaneŋ aman tia yak san ru faŋan

21 Agog Pita Jesus san na ipalug isumiani, “O Tubun ak, saen ŋai teig ta ŋaisag na mi aupasek igane tap, saen sapta mok inŋsan aupasek ŋupare idu pani wak i? Dag sutek yang 7 boi i?”

22 Jesus irupei, “Saen 7 man tia ya, tia, ŋai ŋurupaio da, saen 70 an seven taida batep, nek ago yen yau a.

²³ “Amaiak niŋen o Anut san kagin panek man igo ya. Kiŋ ta gubun† funfun a inŋsan urat tamol tinidi lo dien dan ikubunep itout o ilon ibol se ya.

²⁴ Saen inŋsad pani naon inŋane san urat an fun igane dugo, urat tamol kisaek diŋaneg san na dupalu ya. Kiŋ san gubun tamol an tinin lo yen dan man ten milion kina ago ya. ²⁵ Ak man urat tamol an inŋsan gubun an isopasi san ta idaisuda na ya. Ago tag kiŋ inŋanen urat tamol aenta irupidaig ibol, ‘urat tamol an bigabeg oŋ didaen lo agane dop, tamol ta idad a. Inŋanen iwon, nanun muroun, agod sad melmel fidian dam nek ago mi agane wa. An lo dop san naon an nŋjanep ate inŋsan gubun ka nŋsopasi wa.’

²⁶ “Urat tamol an kiŋ naon na turun isoluwi idug ibol, ‘O Tubun ak, gidad bube panag dop oŋane gubun an fidian nŋsopasi wa.’ ²⁷ Agog kiŋ ilon imuŋanig san gubun an isopasig iganeg yau a.

²⁸ “Agog urat tamol an ilasag yau man, tamol ta inŋsan urat kisaek gubak mi inŋsan na gubun igane yan ile ya. Tamol an san gubun man 10 kina. Ile go buron yabig iratitale dugo inŋsan gubun ipani wo irupe i a.

²⁹ “Urat tamol an inŋsan urat kisaek an naon na turun isoluwi idug irupe i, ‘Gidad bube panag dop oŋane gubun nŋpano wa.’

³⁰ “Ak man tamol an imoi go subanek ab lo ibili iladu ya. Ago imado dop san gubun an ikubune itout gup ilasa wo ago igane ya. ³¹ Saen inŋsan urat kisaek aenta ago dile man, ilod saian geig go kiŋ san na diaug mel fidian dile yan naon na dubol ilasa ya.

† 18:23: Pani

³² “Agog kinj an urat tamol a kulob igane yan iwagig san na yau a. Yaug iladu man kinj ago irupei, ‘Onj tamol saia geig a, onjsa gubun man ninen o bubeg nupano ya, man dugo, onj naj sumianag a.’
³³ Onj gidad onjsa urat kisaek an bube pani wa, nek naj dam onj bubeg nupano ago mi a.’
³⁴ Kinj tinjaen wananan geig a, ago yan lo urat tamol an dam subanek ab lo igane yau a. Ante man subanek ab san tirnek adi tinin malan dusue dop yaup, kinj san gubun isopasi gup ilasa da wa.

³⁵ “Aria, onj bube fidian lo tei a onj lo aupasek igane dan injsan aupasek ta pare idu na tap, man naj Tamag kumaen panu na yan inj kagin nek ago mi onj lo igane wa.”

19

Jesus pein tamol nug dibisei dak ninjen o injinen a Mak 10:1-12

¹ Saen Jesus ninjen en ibol itout man, distrik Galili ibiseig Judea na yau a. You Jordan ituteg Judea san aben titin ante iladug itilianig itor se ya.

² Ago dugo tamolpein malan tubun ak njen aban diri dugo subam ad da yak ilod lo ikubunia se ya.

³ Agog Farisi aenkadi san na dupalug diabi wo bitinaek diganeg dusumiani, “Idaned kubiaen dugo ibol ak i? Mel ta ninjen o, tia, mel dugo dugo yak ninjen o, tamol ta injanen pein ka ibisei wak i?”

⁴ Jesus ru naon irupidaig ibol, “Anj dag girek en ta asuti na ya, ‘Fun lo mok Mel Niganag Tamol man tamol inj pein da idirai a,’
⁵ agog ibol, ‘Fun an ninjen o tamol inj tinan taman ibisawaip iwon injanep nug dupini dupini wa, an lo dop uraru an

kisaek mi dilasa wa.' ⁶ An niñen o in uraru ago tia ya, in kisaek a, man dugo, Anut in sen mi itumanai a. Ak niñen o kabelan mel ta Anut itumanai an tamol itute banau."

⁷ Ago ibol tag Farisi dusumiani, "Agog ata wo kubiaen Moses igire yan igo ibol ak i? Tamol ta iwon ikudi wo ilon ago yen tap, aria, girek ta igirep, iwon ipani gup ikudip yau a. Girek an nug banin diabi amaiak itute san girek."

⁸ Jesus ru naon igo irupidai, "Moses iwomi akudai san awok ipanañ a, man dugo, an bubaem dawai geig a. Ak man fun lo mok an san saen lo, kagin naok ago yak ta digane na ya. ⁹ Agod ru taida nrupaian da, tamol ta mel ta niñen o iwon ikudi yau dop, pein foun ak inane tap, tamol an jeit kagin igane ya. Aria, iwon imug ak a jeit kagin igane yan mi ka ikudip yau a."

¹⁰ Inanen megeloum dulon go durupe, "An ago pein tamol da lo ilasa tap, gidad nug diñane dumoi."

¹¹ Jesus ru naon irupidai, "Tamol nug nane lo dumoi dan san piteñane man, fidian ilo uyan lo diñane san tia ya, ak man nek a Anut dawai ipidinai damaiak mi kagin an ka diñane wa. ¹² Tamol pein ta dusu na duman, fun senamo senamo ya. Aenta man nabud patun amad tia, ago tinad tiñan lo dilasa ya. Aenta man tamol nabud dupasi da. Aria, aenta man, Anut san kagin panek aben dawai dupani san niñen o pein ta dusu na da. Tamol ta piteñane en awok ka ipani tap, inane wan uyanan geig a."

*Nanuk diñal go dida Jesus san na dupalu ya
Mak 10:13-16; Luk 18:15-17*

¹³ Agog tamolpein inşigned nanuk diñal go Jesus banin kabuñad fo iganep gadiñ lo bar ipidinai san niñen o inşsan na dupalu se ya. Ak man inşanen megeloum adi tamolpein ru dabai nam dupudai a.

¹⁴ Ago gug Jesus ibol, “Nanuk ñaisag na dupalu wo dop eilafu wak, abituanai amoi. Man dugo, Anut san kagin panek aben man nanuk igo yak sadi a.” ¹⁵ Agog banin kabuñad fufo iganeg aben an ibiseig yau a.

*Pinein damag filian anda yak Jesus isumiani a
Mak 10:17-31; Luk 18:18-30*

¹⁶ Aria, pinein damag ta Jesus san na ipalug isumiani, “O girek mañau, ata kulob uyan ak ñigane dop lo madok pempem yen san an ka ñiñane wak i?”

¹⁷ Jesus ru naon igo irupeï, “Ata wo mel ta uyan an niñen o sumianag dak i? Nek Anut kisaek o lian an mi uyanan a. Madok uyan ak lo wau o ilo ibol tap, ru kubiaen girek lo dien dan kagin pidinai a.”

¹⁸ Agog isumiaen, “Ru kubiaen dugomaiak i?”

Jesus ru naon irupeï, “Oñ tamol ta funi imat na wak, jeit kagin ta gane na wak, ta ugam na wak, kot lo supalek ru ta ubol na wak, ¹⁹tina tama awad paen na mado dop kagin pidinai o uyan ak, agod oñse niñe wo umat dak ago mi aenta dam niñedi wo umat a.”

²⁰ Pinein an irupeig ibol, “Ru kubiaen an fidian ñuri ñupani se ya. Ata mel taida niñen o katuk ag ak i?”

²¹ Jesus irupeï, “Onj itaot mok lasa wo ilo yen tap, waup onsa mel an fidian didaen lo ganep moni nane wa. Aria, moni an nanep tamolpein mel ad tia yan pidinai a. Ago dop onj kumaen panu lo filiama da wa. Ago gane gup palup njieg aban uri wa.”

²² Saen pinein an ru ago ilonj man, ilon idug yau a, man dugo, inj tan en lo melmel wei kasik aman da ya.

²³ Agog Jesus injanen megeloum irupidaig ibol, “Nai rumok nabol da, tamol filian anda man Anut san kagin panek lo iladu san man muruan geig a.

²⁴ Nai fon njurupaianj da, tamol filian anda yak Anut san kagin panek aben lo ka iladu an, rumok tap, aria, kamel dam si guburan tusan ak lo yau san man pasauman geig a.”

²⁵ Saen injanen megeloum ago dulonj man, malad ifure saian geig go dusumiani, “Mago tap, enti mok patu pasek ka injane wak i?”

²⁶ Jesus malan ti ibol go yil dugo irupidai, “Tamolpein kulob ago man inj lo ta idaisuda na ya, ak gug Anut lo mel fidian man pasauman a.”

²⁷ Agog Pita ru naon ibol, “Ule, mel fidian mibi-seig njie aban muri se ya, an lo ata naon igo mok minjane wak i?”

²⁸ Jesus irupidai, “Nai rumok njurupaianj da, Anut mel fidian afon foun idirai dilasa san saen lo man, Tamol Nanun injanen badim girager anda yak fufo imasi wa. Ago dop anj enti njieg aban ari apani na yan dam badim 12 ak fufo amasip Isrel san gugoi 12 an abitiniai a. ²⁹ Agod talpein enti ab ibiseig, tia tein boi, lun boi, taman boi, tinan boi, nanun moroun boi, siganen tan boi, an naj yanag yabisa wo ibisei dop man, mel a ibisawai an san naon

sutek yaup 100 irinjani wa. Taida mi, ηai madok pempem yen san an dam ηupani wa. ³⁰ Ak man talpein wei mi gamu in sed malan te idirai dan, saen an lo man in yanad tia yak ago dilasa wa. Agod talpein wei mi in gamu yanad tia dumado dan, saen an lo malan te dilasa wa.

20

Wain abi san urat tamol adi

¹ “Anut san kagin panek man igo ya. Salso idug abi san muroun imasag didaen aben lo yaug urat tamol aenta ibiaip inanen wain abi ilon lo urat digane san. ² In urat tamol an dida urat naon dugo ipidinai an ninen o dukubiai se ya. Agog adian kiskisaek atem kina kiskisaek ipidinai o ago ibol a. Agog urat tamol an dulon go ninen an awok dupanig idinaig inanen abi lo diau a.

³ “Tidom lom, afon imasag didaen aben ante yaug ilasag, tamol ta kawan dutur dugo yil a. ⁴ Ago dugo irupidaig ibol, ‘An dam ηaisag wain abi lo aup urat agane. Ago dop murnap ananem urat naon dugo itaot atem ηupanan a.’ Ago tag diau a. ⁵ In afon, adian lo agod guraian lo mi, nek ago igane ya. ⁶ Guraian mok, auwa kisaek imug mi ad idiau an lo, afon imasag yaug tamol taidam urat ad tia kawan dutur dugo yil a. Agog tamol an irupidaig ibol, ‘An ata wo ad milaen kawan atur amado dugo urat ta agane na dak i?’ ⁷ In abi muroun ru naon durupeig dubol, ‘Tamol ta man ibiama man tia ya.’ Ago tag irupidai, ‘An dam gamu ηaineg wain abi lo au a.’

⁸ “Aria, saen ad idiau dugo abi muroun in san urat gurman irupeig ibol, ‘Urat tamol giai dop

sad urat naon anen anen atem udad a. Tamol a murna geig n̄ajal an ate fun ganep, ipalup, yaup, imug ak ate itout a.’ ⁹ Saen urat tamol a murna geig ibiai an dupalu man, anen anen atem kina kiskisaek urat san gurman ipidinai a. ¹⁰ An niñen o saen urat tamol a imug mi ibiai an dupalu man, in̄ moni subuñan taidam diñane wak ago ilo sou digane se ya, ak man in̄ dam nek kina kiskisaek mi diñane ya. ¹¹ In̄aned kina diñane gug, abi muroun niñen o fun diganeg duñurñur se ya. ¹² In̄ dubol, ‘Tamol e murna geig biai an auwa kisaek o lian urat digane ya, ak man oñ ago gane yan lo mañ in̄ dida sisem mi milasa ya. Gug mañ urat san muruan ad milaen mañ mi misini se ya.’

¹³ “Ak man abi muroun tamol ta luluñad lo imado yan irupeig ibol, ‘Turag, n̄ai oñ ta n̄iginio saian na da. Dugo, oñ kina kisaek o lian lo urat gane wo awok ta ubol na yak i?’ ¹⁴ Oñane urat naon n̄anep wau. Tamol a murna geig n̄ajal an, urat naon a n̄upano yan, nek ago mi in̄ dam n̄upidinai o ilog yen a. ¹⁵ En dugog, n̄ai siganeg moni lo dugog n̄igane wo dan, ago ka ta n̄igane na wak i? Tia, n̄ai siganeg mel n̄uwae dan niñen o mala isi dak i?’

¹⁶ “Nek ago mi, talpein murna yan mitep imug dop, imug an murna wa.”

Jesus afon in̄anen mateñ sumeik ilasa dan niñen o ibol a

Mak 10:32-34; Luk 18:31-34

¹⁷ Jesus in̄ Jerusalem na yau se ya, saen an lo in̄anen megeloum 12 an in̄jal go dida gigin na diaug, irupidaig ago ibol, ¹⁸ “Aloñ uyan a, id Jerusalem na tau da. Ante man Tamol Nanun diñanep pris

gurman agod kubiaen san girek manau banid lo digane wa. Inj malak malak bitinaek lo digane gup imat a. ¹⁹ Ago dop Juda tia yak banid lo diganep lo kukok aman digane gup, rasau nam dufuni nap, aigim fo dubali wa. Ago digane wak man, nal utol itout gup, Anut ifufunip afon kumaen imasa da wa.”

Jems inj Jon da sad tinad san sumiaen

Mak 10:35-45

²⁰ Agog Sebedi san nanun uraru amaiak tinadi da, Jesus naon na dupalu ya. Agog tinadi turun isaluwig mel ta ipani san ninen o Jesus isumiani a.

²¹ Jesus pein an isumiani, “Ata mel ninen o ilo ibol dak i?” Agog pein an naon irupe, “Ru ubol an lo najai nanug muroug e dumado den, murnap unjal pe onjane kagin panek aben lo, onjane badim fo sinjire na dumasip dumado wa. Neinta bani won ak lo dop, neinta najas ak lo gane wa.”

²² Agog Jesus, Jems inj Jon da irupidaig ibol, “Mel dugo mok ninen o asumianag dan ta alon uyan na ya. Ak dugo, gab a najai lo najaluk san an, an dam lo aluk anen idaisuda yak i?” Agog inj ru naon durupeig dubol, “Awo, man idaisuda ya.” ²³ Jesus irupidai, “Rumok, an najineg gab an lo aluk a. Ak man sinjireg na amasip amado, ta banig won ak lo, ta banig najas ak lo, aben a yanjan anda amaiak najai npanan san ta idaisuda na ya. Tia, najineg Tamag injen mi tamol ta aben an ipidinai san ipilianai la ya, amaiak ninen o aben uraru an injaned mi a.”

²⁴ Saen injanen megeloum 10 dumado yan ago dulong man, tamol uraru an ninedi wo tinjaed saian geig a. ²⁵ Ak man Jesus igiaig san na dupalug igo

irupidai, “Anj alonj ak, gob adi luluᅇad lo iᅇaned gurman sed idiraip lak na mok disuda dop tamolpein ditirnai o digane wa. Agod iᅇaned tutubu yan tamolpein kawan ak didiraip tuod paed na dumado wa. ²⁶ Ak gug anj luluᅇam lo kagin ago yak ta mok ilasa na wa. Tia, talpein ta anj luluᅇam lo yaᅇak tubun ak iᅇane wo ilon ibol tap, sen iganep anjanem biabi ᅇilaᅇal oᅇ ilasa wa. ²⁷ Agod talpein ta anj luluᅇam lo imug yau san ago ilon ibol tap, sen igane idup anj fidian mi wagem lo bigabeg igo woᅇ ilasa wa. ²⁸ Nek ibol Tamol Nanun iᅇsen igo woᅇ, tamolpein aenta binawek urat dupani wo ta ipalu na ya, tia, aenta niᅇedi wo binawek urat igane wo ipalu ya. Agod sen tinin fidian ibiseip an lo tamolpein wei mi siganen dar lo idad pe iᅇal imul o dam ipalu ya.”

*Jesus tamol uraru malad itau an ikubuniaia a
Mak 10:46-52; Luk 18:35-43*

²⁹ Saen Jesus iᅇanen megeloum dida Jeriko dibi-sei man, tamolpein malan tubun ak ᅇien aban diri a. ³⁰ Ante man tamol uraru maladi itau ak dal gigin na dumasig dumado ya. Saen Jesus iriᅇanai o igane dugo duloᅇ man diwagiᅇ, “O Tubun ak, Dawid Nanun, ilo imuᅇanama!” ³¹ Agog tamolpein an dububuᅇanaig durupidai, “Awam itaup atok-abol pe amado!” Ago tag tamol uraru an nen maeg nam duwagiᅇ dugo disasai, “O Tubun ak, Dawid Nanun, ilo imuᅇanama!” ³² Jesus awad ago ilonj man, ipartuanig igiaig irupidai, “Dugo ᅇidiraᅇ o ilom ibol di?” ³³ Agog iᅇ durupeig dubol, “O Tubun ak, maᅇ aban mile wo iloma ibol da.” ³⁴ Agog Jesus tubun mok ilon imuᅇanaig maladi isupuri dugo

gamu nam uraru an aban dile ya. Agog n̄ien aban dirig dutor se ya.

21

Jesus kin̄ oñ Jerusalem na iladu ya

Mak 11:1; Luk 19:28-40; Jon 12:12-19

¹ Jesus in̄anen megeloum dida Jerusalem sumeik dupani dugo, Did Oliv sin̄iren na panu ta yan̄an Betfage dubol dan ate dilasa ya. Ago man Jesus megeloum uraru panu an ilon lo diau o idinai a.

² In̄ ago irupidaig ibol, “An̄ nuñom urarum panu o tile dan ante au a. Aup don̄ki ta dususeg itur dak ante ale wa, in̄ nanun da sisem dutur da. Urarum kam apasip an̄al pe n̄aisag na apalu. ³ Tamol ta ru aman da dop, an̄ igo arupeï wa, ‘Tubun ak urat ipidinai a.’ In̄ ago ilon̄ dop, idinaip an̄al pe apalu salti wa.”

⁴ Dal an lo man, awan aban ta profet ta ibol an nuñon ilasa ya. Ru an igo ibol,

⁵ “Ru en Saion san Nanun Pein* naod na ubol ilasa wa.

Ale, an̄anem Kin̄ gamu an̄sam na ipalu da.

Tamol mos aman ak igo won̄ ipalu da, don̄ki ta fufo na imasig imado da.

Don̄ki an foun ak fo na imasig imado dugo ipalu da.”

⁶ Agog megeloum uraru an diaug, Jesus ibol ak ago mi digane ya. ⁷ Diaug, don̄ki tinan in̄ nanun da diñal go dupalu ya. Agog don̄ki an patun fufo kulos duruwarig, Jesus fo isudag imasig imado dugo diau a. ⁸ Agog tamolpein malan tubun geig

* **21:5:** Saion san Nanun Pein an ru fañan, in̄ fun man ‘Jerusalem san tamolpein’

an inſigned kulos milmilae ak dupasi dugo dal te duruwari se ya. Ago dugo aenkadi ai raen dututeg dal damag dupani dugo didiri se ya. ⁹ Tamolpein aenkadi, Jesus dida inug mi diau dugo, tamolpein aenta murna dupalu ya. In fidian mi igo dubol duwagin se ya,

“Hosana,[†] Dawid Nanun, per mupano da!
Tamol Anut yan an lo ipalu den bar inane ya!
Hosana lak na geig!”

¹⁰ Saen Jesus Jerusalem na iladu man, tamolpein fidian ilod imasa dugo nug dusumiani se ya, “Tamol en enti ak i?” ¹¹ Ago dugo tamolpein a ida turen diabi se yan ago dubol, “En Jesus, emaiak in profet, distrik Galili ilon lo panu ta Nasaret san ak ipalu ya.”

Jesus tamol tempel san ar ilon lo didaen digane se yan ikudai a

Mak 11:15-19; Luk 19:45-48; Jon 2:13-22

¹² Jesus tempel san ar ilon lo iladug, aben ante didaen tamol, agod a melmel ta didad dan dam fidian ikudaig patun fo dilasa ya. Inſad tebol fufo na moni dubulisa se yan, iratitaleg yabibol idu dugo, tamol aenta muluk didaen lo didirai se yan sad kalik dam yabibol yau a. ¹³ In igo ipidai, “Anut san buk lo ru en digire ya, ‘Naineg ab man gudanek san ago dubol a,’ ak man an agane ilasag ‘gumagam adi sad mianuk ab’ igo agane da.”

¹⁴ Jesus tempel lo imado dugo, malad itau agod njed saian ak dam san na dupalu se ya, ago

[†] **21:9:** Wagam mok ru en ‘hosana’ san fun man ‘on patuma pasi’ igo ya, murnag fun afon ibileksag, nek ibol ‘per mupano’ ago ilasa ya.

man in̄ ikubunia i dugo tinid siŋaokan dilasa se ya. ¹⁵ Ak man pris gurman adi agod kubiaen̄ san girek maŋau dam in̄ kulob girager igane se yan dile dugo, nanuk tempel san ar ilon lo yak igo duwagin̄, “Hosana Dawid Nanun, per mupano da!” Saen gurman adi ago dile man ilod saian dugo tin̄aed wananan a.

¹⁶ Ago tag Jesus dusumianig dubol, “Ru e dubol den ulon̄ dak i?” Agog Jesus ru naon irupidai, “Awo, ŋalon̄ da. Nag an̄ ru en ta asuti na yak i? ‘On̄ nanuk kititik agod nanuk su ate dam pilianai dop, per panek awad lo ilasa wa.’ ”

¹⁷ Agog in̄ ibisawaig Jerusalem patun fo ilasag yang tidom an lo Betani na ŋion̄ yabi a.

Jesus ibol dugo gurab ibun yau a

Mak 11:12-14; 20-24

¹⁸ Tidom lom mok Jesus imul go Jerusalem na yau, saen an lo dam in̄ anaŋ o imat. ¹⁹ Malan yang dal gigin na ai gurab ta itur dugo ile, ago man siŋiren na geig yau. Ak man nuŋon ta ile man tia ya. Roun kawan mi yen a. Ago tag in̄ ai gurab an ago irupe i, “On̄ afon nuŋo ta ufu na wa. Tia geig a.” An lo man gurab an ibun yau kisaek on̄ a.

²⁰ In̄anen megeloum ago dile man durut geig dugo dubol, “En dugo won̄ mok go gurab an ibun yau kisaek on̄ ak i?” ²¹ Ago dugo Jesus ru naon igo irupidai, “Ŋai rumok mi ŋurupaian̄ da, an̄ ilom lo rumok dop, agod ilom uraru dam tia tap, an̄ kulob e ŋai gurab lo ŋigane yak ago mi ka agane wa. An mi tia ya, tia, an̄ did en arupe i, on̄ masap sokalik beig lo udu, ago dop mel a arupe i

an awam yabi wa. ²² Agod an ilom rumok aman da yak lo gudanek agane tap, mel fidian a niñedi wo gudanek agane dan ka anjane wa.”

Inj Jesus dusumiani, “Enti ipiliano ya?”

Mak 11:27-33; Luk 20:1-8

²³ Jesus tempel lo iladug tamolpein manau ipitenjanai se ya. Ago dugo pris gurman adi agod Isrel san gurman adi dam dupalug naon na dilasag dusumiani, “On kob en agod dabai dam dugon te njaneg lo melmel en gane dak i? Enti mok dabai en ipanog ate urat en gane wo ibol ak i?”

²⁴ Agog Jesus ru naon igo irupidai, “Njai dam mel ta niñen o nsumianan o da. Ago dop an imug njaisag sumianek an itaot arupaiağ tap, enti mok urat e njigane den san dabai ipanag ak ka njabol pe alon a. ²⁵ Dugo ilom isou dak i? Jon san suguek man, dugon te kagin an injane yak i? An kumaen panu san mel, tia, tamol sad mi ak i?”

Agog inşed nug lo igo diñinjen se ya. “En kumaen panu san mel, ago tabol tap, in igo ibol isumianad a, ‘En ata wo an in niñen o ilom ta rumok na yak i?’

²⁶ Ak gug ‘En man tamol sad mel mi a,’ ago tabol tap, id o dugo ilasa wak i? Id tamolpein en niñedi wo tarer da, man dugo, inşad ilo sou lo man Jon mi in profet, ago dubol da.” ²⁷ Ago yak niñen o Jesus ru naon durupeig dubol, “Man ta malon na ya.” An lo man Jesus irupidai, “Ago yak niñen o naji dam enti mok kob agod dabai ipanag an ta njurupaian na wa.”

Nanuk uraru tamad da sad ru mitilaen

²⁸ “An mel emaiak niñen o dugo wonj ilo sou agane di? Tamol ta nanun uraru a. Inj nanun matu

ak san na yaug igo irupei, ‘Nanug, on gamu waup wain abi lo urat gane wa.’²⁹ Agog nanun ibol, ‘Nai n̄amoi.’ Ak man murna gug ilon ibileksag abi lo yau a.³⁰ Agod taman an nanun bakan ak san na yaug, ru naon kisaek ago mi irupei a. Agog nanun an awan yabig ibol, ‘Awo Bai, n̄au o da.’ Ak gug in̄ ta yau na ya.³¹ Dugo ilom isou dak i? Nanuk uraru en, enti mok taman san ilobol iri ak i?” Ago man in̄ dubol, “Nanuk matu ama ya.” Agog Jesus ago irupidai, “Nai rumok n̄urupaian̄ da. Takis n̄ilañal, agod dal san pein adi, in̄ an̄ dirin̄anan̄ go Anut san kagin panek aben lo diladu da, ak man an̄ aladu wo amoi da.³² Man ata wo? Jon imug an̄ kagin itaot ak san dal ikubiaip ale wo, sam na ipalu ya. Ak man an̄ ilom ta rumok na ya. Ak gug takis n̄ilañal tamol, agod dal san pein adi dam, in̄ ilod lo rumok a. Gidad an̄ ago ale bo man, ilom lo ta rumok na, agod ilom dam ta ibileksa na ya.”

*Abi san kagin panek adi san ru fañan
Mak 12:1-12; Luk 20:9-19*

³³ Jesus tamol tutubu yak ago irupidai, “Kududom agure dop ru fañan taidam n̄urupaian̄ o da. Tamol ta in̄ wain san abi yabig ar ifou a. Abi an̄ ilon lo wain patun dupartitale san gib yabi a. Agod ab a ate abi titianek dumado san dam abi ilon lo yabi a. Agog tamol ta abi an̄ kagin dupani san urat digane wo ipilianaig, banid lo igane ya. Aria, saen abi taman in̄ urat an̄ fidian igane itout man, imasag panu asau ak ate yau a.³⁴ Aria, ai wain nuñod ifu san saen sumeik ipani dugo, in̄ in̄san biabi n̄ilañal idiraig in̄anen wain nuñon disini wo diau a.³⁵ Ak man urat tamol a abi lo dumado dan

dumasag, tamol a abi muroun idinaig diau an muruan dupidinai a. Ta dufunig, neinta dufuni imat dugo, kisaek pat nam dufuni imat a. ³⁶ Murnag abi taman an urat tamol sen ak idiraig sad na diau a. In nunod kitek wei a, a gubak mi idiraig diau an dirinanai a. Tamol abi lo urat digane yan dumasag urat tamol a diau an lo kulob gubak mi digane yak ago mi digane pidinai a. ³⁷ Murna geig abi taman nanun mok idinig yau dugo ilo sou lo igo ibol, ‘Urat tamol an naineg nanug mok an awan diabi wa.’

³⁸ “Tamol abi lo urat digane dan, malad yang nanun ipalu dugo dile. Ago man in sed nug ru dupeig dubol, ‘Tamol en man taman san melmel fidian mi inane wo da. Ago yak ninen o id tufunip imat dop, inanen abi id tinane wa.’ ³⁹ Ago dubol go diabig ar patun fo dubal idug dufunig imat a.

⁴⁰ “Ago yak ninen o an dugo won ilom isou dak i? Murnap, saen abi taman an ipalu wan lo, in tamol a abi lo urat digane na yan ninedi wo dugo mok igane wak i?”

⁴¹ In ru naon igo durupei, “Abi taman in tamol saiad i an daon saian geig ak ipidinai a. Ago dop wain san abi an tamol sen ta ipidinaip kagin dupani wa. Urat tamol foudi an, wain nunon ifu san saen lo, san nunon dinanep dutumanip disini dop dupani wa.”

⁴² Ago tag Jesus ago ibol isumianai, “Nag an ru e girek lo yen den ta asuti na i?”

‘Pat nek a ab bek tamol adi dumoi dan,
nek amaiak ab tinin fidian yabi sakar da.
An Anut sen ago igane ya,
agod id malad lo en man sinjakan geig a.’

⁴³ “Amaiak ninjen o n̄ai n̄urupaian da, Anut in̄san kagin panek aben an, an̄ tuom lo ipasi yau a. An lo dop tamolpein sen ak ta, in̄ Anut san kagin panek aben an san nuon mok digane ilasa dan, kagin panek aben an in̄ ipidinai a. ⁴⁴ Talpein ta in̄ pat en fo na yau idu dop man, sen ifuni ititale wa. Ak gug talpein ta pat en kabunan fufu idu dop, ifufari idu wa.”

⁴⁵ Saen pris tutubu agod Farisi adi, Jesus ru fanan a ibol se yan dulon man, in̄ dulon uyanan ak Jesus in̄anen ru lo in̄ isiai se ya. ⁴⁶ Amaiak ninjen o dal ta lo Jesus diabi wo maeg diganeg aban dile se ya. Ak man tamolpein malan tubun ak nin̄edi wo direr, man dugo, tamolpein an sad ilo sou lo man Jesus in̄ profet, an ninjen o in̄ ta diabi na ya.

22

Nug iwon n̄ilan̄al san anan̄ tubun ak san ru miti-laen

Luk 14:15-24

¹ Agod afon, Jesus tamolpein an ru fanan lo irupidai a. ² “Anut san kagin panek man igo ya. Kin̄ ta in̄sinan nanun tamol ak o nug n̄anek san soubul yabi a. ³ In̄ imug mi tamol adi a in̄san nug iwon san anan̄ diani wan nal dugon lo dupalu wo irupidai. Aria, anan̄ nal idu dugo in̄sinan urat tamol idiraig tamol an dil o diau a. Ago yak man in̄ dupalu wo dumoi a. ⁴ Agod afon in̄ urat tamol sen ak idiraig diau wo dugo, igo irupidai, ‘An̄ tamol a gubak mi n̄giai an sad na aup, igo arupidai a. Alon̄ uyan, n̄ai anan̄ n̄ukubune la ya. Makau tubun ak agod makau nanud tinid bulbal ak dam mafu la

ya, mel fidian mukubuneg dien da. An soubul en lo apalu wa.'

⁵ "Urat tamol diaug tamol an ru durupidai a, ak man ru an dumoi go kagin ta dupani na yan lo, dufurak go gidigheid diau a. Ta inſinan abi lo yau dugo, ta yang inſinan bisnis urat igane se ya. ⁶ Aenta dumasag kiŋ san urat tamol duburoug ru saian ak lo dububunanaig dufu dumat a. ⁷ An niŋen o kiŋ tiŋaen tubun mi saian tag, inſinan yu tamol adi idiraig diaug, tamol a inanen urat tamol dufu dumat, amaiak dufu dumat dugo sad panu dam dumarig inani yau a.

⁸ "An itout go kiŋ an inſan urat tamol ago irupidai, 'Nug iwon niŋaŋal san anan kubunek go yen da. Ak man tamol a ŋai imug ŋigiaian, dupalu san inŋ ta idaisuda na ya. ⁹ Ago yak niŋen o amasap dal gigin fidian lo atur a, tamol fidian eil dop, agiaip nug niŋaŋal san anan lo dupalu wo ago arupidai a.' ¹⁰ Inŋ ago ibol dugo, inanen urat tamol dumasag, dal gigin fidian atem dutur dugo, tamolpein uyadi agod saiadi ak dam dil dugo dutumanai se ya. Agog anan tubun an lo dupalu ya. An lo man ab a ate soubul diani san an awan isa geig a.

¹¹ "Tamolpein dumasig dumado dugo kiŋ an yil o iladu ya. Inŋ iladug malan yau man, tamol ta nug niŋaŋal san kulos ta igane na yan ile ya. ¹² Agog naon na isusag isumiani, 'Turag, en dugog on nug ŋanek san kulos ta gane na gug ente sadu yak i?' Agog tamol an ru ta ibol san tia ya.

¹³ "Ago tag kiŋ urat tamol adi siŋiren na dutur dan irupidaig ibol, 'Anŋ niŋen banin afoup, ananep abili patun fo ilasa dop, aban tidom tubun ak

lo imado wa. Aben ante man tamolpein tinan digane dop madai lo luod dugurmi wa.’ ¹⁴ Man dugo, Anut in bo tamolpein wei kasik igiai da, ak gug tamolpein kisaek kisaek mi diladu san kob ipidinai a.”

Kaisa san takis njanjal

Mak 12:13-17; Luk 20:20-26

¹⁵ Agog Farisi adi diaug, Jesus san njanen lo dal dugo diabi san njanen o dutumanig dukubiai se ya.

¹⁶ In awad kisaek go, siganed megeloum aenkadi, Herod san tamol aenta dida didiraig, Jesus san na diau a. Tamol an Jesus durupeig dubol, “Girek manau, man malon ak on ru rumok san tamol. On tamolpein Anut san dal an njanen o itaot mi pitenanai da. On tamol ta njanen o urer san tia ya. Tia, on ru kisaek an mi tamol fidian lo ubol yau da. Gidad yanad da yak, di yanad tia yak dam mi a.

¹⁷ An njanen o on ka mel en njanen o rupaiama wa. Dugo, Kaisa takis moni tupani wan uyan ak i? Tia, saian ak i? On dugo ilo isou dak i?”

¹⁸ Ago yak man Jesus insad ilo sou saian an ilon dugo igo irupidaig ibol, “An balem rararu a, ata wo naj bitinaek lo aginiag o agane dak i? ¹⁹ An moni a lo takis adad o dan kisaek akubiai dop njile wa.” Ago tag in moni ta disinig san na dupalug dupani a. ²⁰ Jesus ibol isumianai, “Mitilaen agod yanak e fufo digire yan enti san ak i?” ²¹ Agog in dubol, “Kaisa san.” An njanen o irupidai, “Mel ta Kaisa san tap, Kaisa apani wa, agod mel ta Anut san tap, Anut apani wa.”

²² Saen ru an dulon man durut saian geig a. Agog dibiseig diau a.

*Sadyusi Jesus diabi wo bitinaek digane ya
Mak 12:18-27; Luk 20:27-40*

²³ Nal kisaek an lo Sadyusi aenta Jesus san na dupalu ya. Tamol nek an pris gurman adi sad warou, in tamol dumat pe murnap fon kumaen dumasa da wan ninen o ilodi ta rumok na da. Agog Jesusigo dubol dusumiani, ²⁴“Girek manau, Moses gubak mi igo ibol a. ‘Tamol ta in nanuk aman tiag imat tap, gidad tein imasap iwon ka inane dop, an lo tein imat la yak aben lo nanuk idiri ilasa wa.’ ²⁵ Aria, gubak mi man tein muroun nunod 7 man lulanama lo dumado se ya. Matu ak pein inane imado nag imat, ak gug in nanuk aman tia ya. Ago yak ninen o tein bakan ak imasag matu imat an san pein inane ya. ²⁶ Tein bakan an dam tein san suos a inane, dumado yak man nanuk amad tiag tamol ak imat a. Tein muroun murna an dam nek ago mi, teidi sad suos an dinane yak man, nanuk amad tia dumado nag, dumat a. ²⁷ Tein an fidian mi nanuk amad tia dumat gug pein an dam imat a. ²⁸ An ninen o on ubol rupaiama wa. Saen tamolpein dumat pasik an afon kumaen dumasa tap, tamol an fidian ilod lo man, pein an enti iwon ak i? On ulon ak in fidian iwodi a.”

²⁹ Ak gug Jesus ru naon irupidaig igo ibol, “An afurfi saian a. Man ata wo? Anut san ru girek lo yen dan, agod Anut san dabai dam an ta alon uyan na ya. ³⁰ Saen tamol dumat pe dumasap kumaen panu na dutor dan, pein ta dusu na da, agod ante tamol ta pein njen ta dupani na da. Tia, in kumaen panu san enel igo won dumado da. ³¹ Agod taida mi, tamol dumat ak fon kumaen

dumasa da wan ninen o kududom agure. Nag an ru a Anut irupaian an ta asuti na yak i? Inj igo ibol, ³² ‘Nai man Abraham san Anut, nai dam Aisak san Anut, agod nai dam Jakob san Anut.’ Anut man inj tamol a maten lo dumado dan sad Anut tia ya. Tia, inj man tamol kumaed dumado dak sadi a.”

³³ Saen tamolpein a Jesus dubuluwi dan in san pitenj anek emaiak dulon man, inj durut dugo ru an ninen o nug lo dinjenen ila iso se ya.

Kubiaen dugomaiak malan te yak i?

Mak 12:28-34; Luk 10:25-28

³⁴ Saen Farisi, Jesus ru a ibol an lo Sadyusi awad yabituani an dulon man, naon na dutumani a. ³⁵ Tamol ta inj lulunad lo itur an, inj kubiaen san ulon tamol, amaiak ru a Jesus ibol an ipipi wo igo isumiani a. ³⁶ “Girek manau, kubiaen dugomaiak inj malan te dugo, kubiaen aenta irinani geig ak i?” ³⁷ An ninen o Jesus ago irupei, “On gidad Tubun en onane Anut ninen o umat a, on bube fidian lo, on ntu fidian lo, agod onane ilo sou fidian lo ago gane wa. ³⁸ Kubiaen en tubun a, agod inj malan te geig a. ³⁹ Kubiaen turan en dam nek ago mi a. Nek onse nje wo umat dak ago mi, tamolpein aenta dam nijedi wo umat a. ⁴⁰ Kubiaen uraru en malan te yen da, Moses san kubiaen fidian, agod profet sad awak aban an dam, kubiaen uraru en paed na diyuk dien da.”

Kristus inj enti nanun ak i?

Mak 12:35-37; Luk 20:41-44

⁴¹ Farisi adi dutumanig dumado dugo Jesus ibol go isumianai, ⁴² “An Kristus ninen o dugo ilom isou di? Inj enti nanun ak i?” Ago man inj durupei, “En

man Dawid nanun.” ⁴³ Ago tag in irupidai, “Aria, en dugo won go, Kristus ninen o, Dawid in sen mi Awan Urgun san dabal lo mi in inen dugo tamol an yan an man, Tubun ak ibol ak i? In igo ibol,

⁴⁴ “Tubun en niasag Tubun ak igo irupe, “On n ai tuog won ak ate masip yaup, murna gup n ai on sa ager adi ndiraip, on n ie pae na dumado dop n ie nam partuanai a.”

⁴⁵ Amaiak ninen o Dawid in sen mi in Tubun ak ago ibol tap, en dugo won pe in Dawid nanun ak i?” ⁴⁶ Nal an log yau man, Jesus sumiaen subunan taidam dusumiani wan ninen o direr se ya.

23

Jesus in Farisi agod girek manau adi sad kagin sisiaiak an kuai tem igane ilasa ya

Mak 12:38-39; Luk 11:43,46; 20:45-46

¹ Nal an lo Jesus in anen megeloum, agod tamolpein a dubuluwi an dam irupidaig ibol,

² “Kubiaen san girek manau in Farisi dida Moses naon dinane ya. ³ An ninen o ata mel agane wo durupaian dan an kagin apani dop itaot mi agane wa. Ak gug kagin naok naok a digane damaiak an dam nek an ta ari apani na wa. Tia geig, man ata wo? In ru kagin wei mi dubol dak, gug in sed mi in siganed ru ta duri dupani na da. ⁴ In tu muruan ak dufou dugo, tamol yarod fo didirai da, ago yak gug in sed banid kurunen nam kitek diabip tamol dubunawai dop disini wo man dumoi da.

⁵ Mel fidian in digane duman, tamol dil o digane da. Awo, in gudanek san ariy didiri dugo, bala milmilae ak dam kulos bitin en fo na digane da.

⁶ Inj soubul lo kalik malan te yak ninjen o dumat da, agod ubou ab lo dam nek ago mi a. ⁷ Inj panu titinje mi tamol ‘adian’ dupidinai o ilod yen da, agod tamol inj ninjedi wo ‘tamol tubun ak’ ago dubol an dam ninjen o dumat da. ⁸ Ak man, tamolpein aenta an gurman adi dubol ak ago ta digane na wa. Tia, tamol kisaek o lian man an sam gurman, agod an fidian man nug tein taon amado da. ⁹ Tan en lo talpein ta an tamamami ak ago ta abol na wa. Man dugo, Tamol kisaek o lian inj an tamamami, amaiak kumaen panu lo imado da. ¹⁰ Agod tamolpein aenta inj an girek manjau adi ak ago ta dubol na wa, man dugo, an girek manjau kisaek o lian am da ya, inj Kristus. ¹¹ Tia, an lulujam lo man, enti inj malan te yan, an fidian sam urat tamol ago ilasap imado wa. ¹² Tamol inj sen yanjan yabisa dan, inj san yanjan an yau idu wa. Tamol inj sen yabi idu dan, yanjak tubun ak injane wa.

Jesus saen 7 ru lo ibiai dudu ya

Mak 12:40; Luk 11:39-42,44,47-51; 20:47

¹³ “Anj kubiaen san girek manjau, Farisi dida man, muruan tubun geig ak ale wa. Anj tamol awam rararu amam mi a! Man ata wo? Anj tamolpein naod na Anut san kagin panek aben an san dalawan afutani da. Ansem ta aladu na da, ago dugo tamolpein a diladu wo dan, nek amaiak an sad dal afou da.* ¹⁴ Anj kubiaen san girek manjau, Farisi dida man, muruan tubun geig ak ale wa. Anj tamol awam rararu amam mi a! Man ata wo? Anj pein suos sad ab agam da, agod gudanek milaen

* **23:13:** Boi 14 Grik lo tia ya.

kasik, tamolpein dilian o agane da. Amaiak ninen o naon a anane wan nen tubun mi ilasa wa.

¹⁵ “Anj kubiaen san girek manau, Farisi dida man, muruan tubun geig ak ale wa. Anj tamol awam rararu amam mi a! Man ata wo? Anj wein abi dak, agod tan na dam ator dak, tamol ta kisaek o lian aban an ale dop, an lo aganep, Juda sad dal iri san tamol ago ilasa wa. Gug saen anj tamol naok ago yak ale dop, nek ibol ansem Ades lo aup amado wak igo, in dam Ades lo yaup imado wan ninen o tubun geig irinjanan a.

¹⁶ “Anj malam itapul amami a, muruan tubun geig ak anane wa. Anj tamol malad itapul an ak dal akubiai pidinai dak gug ansem mi malam itapul an a. Anj igo abol da, ‘Tamol ta innsinan ru dabai ipani wo, tempel san yanjan lo lak na geig ibol tap, innsan promis Anut ipani an man kawan a. Ak gug in tempel san gol ilon lo yen dan san yanjan lo lak na geig ibol tap, gidad promis a ibol ak ago mi iri wa.’

¹⁷ Anj mala tapul buraurau! Ata mel malan te yak i? Ak dugo, gol malan te yak i? Tia, tempel an san gol gun igane damaiak malan te yak i? ¹⁸ Taida mi anj igo abol da, ‘Tamol ta innsinan ru dabai ipani wo, alta san yanjan lo lak na geig ibol tap, innsan promis Anut ipani an man kawan a. Ak gug in lou panek a alta fufo yen dan san yanjan lo lak na geig ibol tap, gidad promis a ibol ak ago mi iri wa.’ ¹⁹ Anj malam itapul amami a! Ata mel malan te yak i? Ak dugo, lou panek an malan te yak i? Tia, alta a lou panek an gun igane damaiak malan te yak i? ²⁰ An ninen o tamol innsinan ru dabai ipani wo alta san yanjan lo lak na geig ibol tap, melmel a alta fufo na dien dan lo dam sinan ru dabai ipani da. ²¹ Nek ago mi,

tamol inj tempel san yañan lo lak na geig ibol tap, inj tempel agod Inj a ate imado dan sisem sad yañad lo dam lak na geig ibol da. ²² Agod tamol a sinan ru dabai ipani wo kumaen panu san yañan lo lak na geig ibol dan, Anut san badim lo, agod Inj a badim an fufo imasi dan lo dam, lak na geig ibol da.

²³ “Anj kubiaen san girek mañau, Farisi dida man, muruan tubun geig ak ale wa. Anj tamol awam rararu amam mi a! Man ata wo? Abi san pinapan kititik wei mi abitig malan 10 dilasa ya, agog malan kisaek Anut apani a. Ak man anj kubiaen san ru malan te yak, nek ibol kot lo atarpasai uyanan dak, aenta ilom imunanai dak, agod anşiganem ru aganuri dan, kagin naok naok ago yak ari san ninen o kagin ta apani na da. Kagin malan te yak agane wa, agod kubiaen san ru kagin kititik dam ta abisei na wa. ²⁴ Anj gurman adi, anj malam itapul ami a! Anj tuor fufo na gubudai akudai da, gug ta alonj dugo kamel atunjali da!

²⁵ “Anj kubiaen san girek mañau, Farisi dida man, muruan tubun geig ak ale wa. Anj tamol awam rararu amam mi a! Man ata wo? Anj gab inj daeg da, tinid patud fo yak mi afulani da, ak man ilodi nun tinan a. Anj ilo sek san kagin, agod ilo masa san kagin abituani san ta idaisuda na ya, kagin sisaiak an anj ida isuda geig a. ²⁶ Onj Farisi, onj mala itapul an a! Onj imug gab ilon fulani uyan a, ago gup tinin patun fufo na yak dam ikok aman ilasa wa.

²⁷ “Anj kubiaen san girek mañau, Farisi dida man, muruan tubun geig ak ale wa. Anj tamol awam rararu amam mi a! Man ata wo? Anj bem milkouk ak nam mutou san ab diabi ak igo wonj

a. Kuai te man mutou an san leil sinjaokan mok a, ago gug ilon lo man tamol dumat ak sad tatumadi, in melmel nun amad da yak wei mi dam dida awa nag dien da. ²⁸ An dam nek ago mi amado da. Tamolpein malad lo anjanem nao lalek man uyanan manon a, ak gug ilomi man, balek rararu san kagin in kubiaen pilalek kagin da awa nag yen da.

²⁹ “An kubiaen san girek manau, Farisi dida man, muruan tubun geig ak ale wa. An tamol awam rararu amam mi a! Man ata wo? An profet sad mutou san ab abi da, nek ago mi tamol uyadi ak sad mutou dam bala apani da. ³⁰ Agod an igo abol, ‘Man tubum bagem sad saen lo mumado yak man, man in luad masap mibinawaip sisem profet ta mafu dumat na wa.’ ³¹ Ru amaiak lo an sem ibian adu da, man dugo, an kuai tem tamolpein akubiai pidinai dak ansem man, tamol ensauta a profet adi dufu dumat na yan, amaiak sad nanud muroud mi a. ³² Amaiak ninen aup, kagin naok a tubum bagem digane se yan, ago mi aganep idaisuda wa. An lo dop kob a in ante dilasa yan an dam ante alasa wa!

³³ “O an mot adi, mot wagai ak sad nanud muroudi! En dugo won Anut an Ades lo au o irupaian an abiseip asol au ak i? ³⁴ Fun amaiak ninen o naj profet adi nidinai dugo, manau tamol adi, agod girek manau adi, dupalu dugo ansam na dilasa da. Ago bo man an aenta afu dumat a, aenkadi aigim fo abalai a, aenkadi sinam ubou ab ilod lo asukutai a. Aenkadi akudaip taun an dibiseip taun sen ak lo diau a, kagin nek agom digane yau a. ³⁵ Fun an ninen o, tamol uyadi fidian

a tan en lo ager adi banid lo materŋ dile yan, kagin amaiak san ai wadan Anut ansem mi ipanaŋ a. An man ansinam muruan mi a. An lo Abel imat ak san saen log ipalug kiŋ Joas san saen lo, Sakarias iŋ Berekaia nanun tempel san galuŋ gun ak, alta da titiŋae mi tubum bagemi dufunig imat a, kagin an san ai wadan man anŋiganem muruan mi a. ³⁶ Nai ru rumok ak ŋurupaiaŋ da, kagin sisaiak fidian en sad naon saian ak tamolpein gamu dumado den sad na ilasa wa.

Jesus Jerusalem tamolpein niŋedi wo ilon muruan a

Luk 13:34-35

³⁷“O Jerusalem, Jerusalem, oŋ profet ufu dumat na ya, oŋ tamol a Anut idinaig oŋsa na dupalu na yan ufu wo pat ubal na ya! Saen sapta, nek ibol kurek tinar subarin roun paen na nanun ituanai o dak ago mi, ŋai oŋsa nanu murou ŋutumanaip kagin ŋupidinai o, ilog tubun mi yen da. Ak gug aŋ amoi a. ³⁸ Ale, Anut ananem tempel ibisei la ya, an lo ananem ubou ab man kawan yen da. ³⁹ Man dugo, ŋai igo ŋurupaiaŋ da, aŋ fon ŋai ta aliag na wa. Tia, saen aŋ abol, ‘Tamol e Tubun ak yan lo ipalu den bar mupani da,’ an san saen lo mi afon ŋai aliag da wa.”

24

Saen e lo tumado den itout san kob

Mak 13:1-31; Luk 21:5-33

¹ Jesus tempel ibiseig yau dugo, iŋanen megeloum tempel san ab funfun naodi dugo yak dukubiai ile wo san na dupalu ya. ² Ak man iŋ ru naon ago irupidai, “Aŋ mel en fidian mi ale yak

i? Njai ru rumok ak n̄rupaian da, ente man pat ta kisaek o lian pat sen ak tinin fufo na ta yen na wa. Tia, murnap tamol adi dupalup tempel en fidian daon dupani wa, ago dop tempel san pat fidian dugufututep diabibol tan na dudu wa.”

³ Jesus Did Oliv fo imasi dugo inanen megeloum mianuk lo san na dupalug dubol, “On rupaiama wa, saen dugomaiak lo melmel en dilasa wak i? Mel dugomaiak imug ilasa dop, ate man malon ak, on umul palu o di? Agod saen gamu e tumado den itout o di?” ⁴ Jesus ru naon igo irupidai a, “An kagin agane, kabelan tamol ta an irawan banau. ⁵ Tamol wei mi dupalup n̄ai yanag dupatep dubol a, ‘Naiseg Kristus.’ Ago dop tamolpein wei kasik dirawai a. ⁶ An yu ager alon ak, agod ru tim yu ager sensen yau on an dam alon a. An kagin agane wa, kabelan amasa saian banau, man dugo, mel an ilasa wak, ak gug nal wadan san saen man gamugo da. ⁷ Tamol malan ta yu diabisa dop, tamol malan ta yu naon in̄sad na digane imul a. Ago dop kin ta in̄san tamolpein dida yu diabisap, kin sen ak ta in̄anen tamolpein dida nug dufuni wa. Agod aben sensen lo man kadag tubun mi idu dop kanaurig tubun ak gidigheid dilasa wa. ⁸ Nek ibol pein nanuk igansi wo dop madai ile dak igo won, melmel en fidian man, madai a nal wadan ilasa san amaiak ilasa wo fun igane da.

⁹ “Saen an lo gup an diñilian pe an̄anem ager sad tuod lo didiran dop madai tubun kasik dupanan a, agod dam dufunan amat a. Tamolpein tan titin fidian lo dumado dan an lo siai digane wa. En ata wo? Njai yanag man an̄sam na yen la ya. ¹⁰ Nek saen

an lo dop, tamolpein ilo rumok dubusei wa, ago dop teidi ager tuod lo didirai a. Nug lo ago digane dop siai dam digane wa. ¹¹ Ago dop profet sewak adi dumasap tamolpein wei mi dirawai a. ¹² Ago dop kagin sisaiak tubun mi ilasap ilod inañefute wa, an lo dop tamolpein wei kasik sad ilo panek kagin an kute ibol yaup ibubarum geig a. ¹³ Ak man, talpein enti inñsan ilo rumok yabi sakar dop, yaup inñanen kumaen tan en san itout gup man, Anut talpein an patun ipasi wa. ¹⁴ Agod inñaineg tamolpein bilaluñ uyanan Anut anen kagin panek ninen o dubol ilasap, tamolpein tan titin fidian lo yan duloñ a. Ago dop inñaineg ru rumok tamolpein fidian malad lo walal te ilasap yen a. Ante gup, nal wadan ilasa wa.

¹⁵ “Saen ilasa dop, mel ta tempel san aben gun ak lo duguni dop ale wa. Mel an gubak mi profet Daniel ninen o ibol a. Mel an Anut malan lo man iganan geig a, nek mel amaiak igane dop daon panek ilasa wa. (On ru e suti den ulon uyan o ta pasauman na yak man, maeg gane tap ka ulon ak boi.) ¹⁶ Nal an lo dop, tamolpein a Judea na dumado dan, dusol diaup did luloñad lo sed imi-anai a. ¹⁷ Talpein ab fufo na imado dan, imul idup inñanen biouñ isini wo ta iladu na wa, tia, itaot mi isol yau a. ¹⁸ Agod talpein abi lo imado dak dam, kulos madid san ak inñane wo ta imul yau na wa. ¹⁹ O kabel, nal en san pein luam anda yak, agod an pein anñanem nanuk su apidinai dan dam, inñai ilog tubun mi imuñanañ da! Nal en man saian geig a. ²⁰ An gidad agudani wa, man dugo, kabelan an madid san saen lo, tia, ubou nal lo asol au banau. ²¹ Man ata wo? Saen an lo dop muruan tubun

geig ak ilasa wa. Muruan naok ago yak gubak mi ta ilasa na ya, saen tan en ilasag ipalug gamu en lo, mel igo yak ilasa man tia geig a, agod murna gup afon ta ilasa da na wa. ²² Anut saen en itutep katukan a, in̄ ago ta igane na tap man, tamolpein fidian mi dideg diau a. Ak man, saen an lo dop Anut tamolpein a ipilianai la yan nin̄edi wo ilon isou wa. Amaiak nin̄en o in̄ saen an itutep katukan a. ²³ Saen ante talpein ta irupaian̄ a, ‘Ale, Kristus ebe ya!’ Tia, ta ibol, ‘In̄ obo imado da!’ Ago dubol tap, an̄ ilom ta rumok na wa. ²⁴ Man dugo, kristus sewak, in̄ profet sewak adi dida dilasa wa, ago dop in̄ kulob girager tubun ak, agod mel naon senamo geig ak tamolpein malad lo dukubiaip dile wa. An lo dop in̄ tamolpein a Anut ipilianai la yan dam dirawaip lo diau dudu wo ago maeg digane wa. Ago bo man dirawai san ta idaisuda na wa. ²⁵ Ale, mel en gamugo ilasa dugo n̄ai imug an nin̄en o kuai tem n̄urupaian̄ la ya.

²⁶ “Amaiak nin̄en o talpein ta an̄ durupaian̄ pe dubol, ‘Ale, in̄ onte aben kawan talpein tia yak ate imado da!’ In̄ ago dubol tap, an̄ ante ta au na wa. Nag igo dubol, ‘Ale, ab on san galun̄ ilon lo mok imado da!’ An̄ ilom ta rumok na wa. Tia geig a. ²⁷ Man ata wo? Saen keit irafule dan, san lilaman aben o ad ilasa dak atep, aben o ad idiau dak ate yau dop, tamolpein fidian leil dupani wa. Nek ago mi, saen Tamol Nanun ipalu dan, kulob an san leil man naon kisaek a. ²⁸ Tamol sisanun dugon te yen dak ate bog dupalup dutumani wa.

²⁹ “Saen muruan tubun en itout dop, ad ta ided uyan na wa. Saen an lo ‘adian tidom on̄ ilasa wa,

ago dop kalam dam ta ided na wa.
 Ante patui keit dibiseip dudu wa,
 agod Anut mel dabai a keit lo yan fidian imiri-
 ranai a.'

³⁰ "Saen an lo dop, Tamol Nanun san kob keit lo kuai isi wa, an lo dop tan en san tamolpein fidian tinaŋ aru digane wa. Ago dop in fidian Tamol Nanun keit lo timtaen titinjaem kuai te ilasa dop, dabai agod girager tubun geig ak da ipalu dan, dile wa. ³¹ Ago dop eŋel ta tour iwip Tamol Nanun inanen eŋel adi idiraip dufurak diau a. Ante dop inanen tamolpein a ipilianai an dutumanai a. In tim sukurun iwoiwo, agod tan tilianek fidian dam ante diŋal dupalu wa.

³² "Aŋ gurab niŋen o ilo sou agane wa, in maŋau ka ipanaŋ a. Saen inŋsan raen you aman da dop, roun foun ak ilasa wa. An lo ale aloŋ ak madid itout agod ad ilasa san saen sumeikan ipanaŋ da. ³³ Amaiak niŋen o, aŋ murnap melmel fidian a dilasa dan ale dop, aŋ aloŋ ak Tamol Nanun ipalu wo dak, sumeik dalawan te itur da. ³⁴ Nai rumok ŋurupaiaŋ da, warou gamu en san tamolpein gamugo itout yau dop melmel en fidian dilasa wa. ³⁵ Rumok geig, keit in tan da murnap itout a, ak gug ŋaisag ru man ta itout na wa.

*Nal mok ante mel en ilasa wan id fidian tijaon a
 Mak 13:32-37; Luk 17:26-30,34-36*

³⁶ "Ak gug talpein ta auwa dugo, agod nal dugon lo melmel en dilasa wan ta ilon na wa. Kumaen panu san eŋel adi agod Nanun dam ta dulon na ya. Bai sen mi ilon a. ³⁷ Kulob a Noa san saen lo digane yan, nek amaiak mi saen Tamol Nanun

imul ipalu dop digane wa. ³⁸ Saen lom tubun ak ta ilasa na dugo, in anan diani dugo, you dam duluk dugo, nug dinane dugo, pein njedi dupidinai dugo, yaug saen Noa wog tubun ak lo iladu ya. ³⁹ In ilo girek amad tia dumado dugo, lom tubun ak ilasa saltik on go tamolpein an fidian irianai diaug dumat pasik a. Nek ago mi, saen Tamol Nanun ipalu dop, tamolpein ta dulon na dop kulob an in lo ilasa saltik on a. ⁴⁰ Gidad tamol uraru abi lo dumado wa. Ago dop Anut tamol kisaek inane dop, kisaek ibiseip imado wa. ⁴¹ Pein uraru bret dukubune wo pat nam wit patun dibaltitale wa. Anut kisaek inane dop, turan ibiseip imado wa. ⁴² Amaiak ninen o malam ipuk pe amado wa. An ta alon na dak, nal dugomaiak lo ananem Tubun ak ipalu wa. ⁴³ An mel en ninen ilo sou agane wa. Ab taman in saen dugon lo gumagam tamol tidom lo ab igilep ilon lo iladu wan ilon tap, in njon ta yabi na wa. Tia, tawan igane uyanan pe gumugam isadu san dal ifou wa. ⁴⁴ Ago yak ninen o an dam malam ipuk pe aban ale wa. Man dugo, saen a Tamol Nanun ipalu san an ta akubiani na dop, saen nek an lo in imul ipalu wa.

Urat tamol uyan ak in urat tamol saian ak da sad ru fanan

Luk 12:41-48

⁴⁵ “Amaiak ninen o mel en ninen o ilom isou wa. Ab taman ta insan urat pinein a manau aman da yak, agod awan iri ipani dan, kob ipanig an lo in inanen urat pinein aenta itirnai san, agod anan diani san saen ante mi anan ipidinai da. Ak dugo, an lulunam lo man, enti in urat pinein naok ago

yak i? ⁴⁶ Saen ab muroun ipalup urat pinein an inſan urat igane uyanan dan ile tap, in lo uyan a. ⁴⁷ Nai rumok nurupaian da. Tamol tubun en inanen urat pinein emaiak kob ipanip, an lo inanen biouſ fidian kagin ad igane wa. ⁴⁸ Ak man urat pinein an tamol saian tap, ilon lo igo ibol, ‘Naisag tamol tubun en ta ipalu kisaek oſ na da.’ ⁴⁹ An ninen o fun iganep urat pinein aenta ifu isudap, lukluk tamol dida anan diani dop, you sakar ak duluk o kagin naok ago igane wa. ⁵⁰ Urat pinein an san gurman, nal dugon lo, agod auwa dam ta ilon na dop ipalu wa. ⁵¹ An lo dop tamol tubun en ipalu saltik oſ pe urat pinein an ibaltiti idu wa. Ago dop balek rararu san tamol luad te iganep dida dumado wa. Aben ante man tamolpein tinan digane dop madai lo luod dugurmi wa.

25

Pein baras nuſod 10 ak sad ru mitilaen

¹ “Saen an lo, Anut san kagin panek man igo ya. Nug nanek san saen lo, pein baras 10 inſad lam dusulanaig duburoug diaug, ab a ate tamolpein dutumani dan te dilasa ya. Ante man kuai te dumasig tamol a inſan iwon inane wo ipalu dan dititianig dumado se ya. ² Pein baras nuſod 5 man kankan ad tia ya, ago dugo 5 aenta man kankan ad da ya. ³ Man dugo, pein baras kankan ad tia yak inſigned lam disinig dupalu yak gug, in guren ided san subunan taidam ta dinaneg dupalu na ya. ⁴ Ago man pein a kankan ad da yan guren ided san inſigned butol lo dililig lam da disinig dupalu ya. ⁵ Tamol a iwon inane dan, in ta ipalu kisaek oſ na

ya, amaiak niñen o pein fidian mi malad muruan dugo ñion diabi se ya.

⁶ “Ak man tidom luak talpein ta igo iwagiñ dugo dulong a, ‘Ale, tamol, pein inane wo damaiak ipalu wo da! Amaiak niñen o apalup tau, dal te tile dop tinanep ida tamul tupalu wa.’ ⁷ Ago man pein baras an fidian dumasag inaned lam dukubine idu ya. ⁸ Agog pein kankan amad tia yan dumasag, pein kankan amad da yan igo durupidai, ‘Gidad an̄sam gureñ kitek apanama. Mañsama lam dumat o da.’

⁹ “Ak gug pein kankan amad da yan ru naon durupidaig dubol, ‘Tia ya, gureñ e mabi den, id sisem niñed o ta idaisuda na ya. Gidad amul aup an̄siganem gureñ foun ak didaen aben lo adad a.’

¹⁰ “An niñen o pein kankan ad tia yan gureñ didad o dumul go diau a. In̄ diau dugo tamol a iwon pein inane wan ipalu ya. Ante man pein a dititianig dumado se yan, dida nug ñilanj̄ san ab an lo diladu dugo, tamol ante yan dalawan dufutani a.

¹¹ “Murnag pein baras aenta dupalug igo dubol, ‘O tamol tubun ak, palup mañ dalawan pasi panama!’

¹² “Ak man in̄ ru naon igo irupidai, ‘Ñai rumok ñurupaian̄ da, ñai an̄ ta ñalon̄ na ya.’

¹³ “Amaiak niñen o malam ipuk pe amado wa. Man dugo, nal dugo, agod auwa dugon lo Tamol Nanun imul ipalu wan ta alon̄ na da.”

Urat pinein moni diñane yak sad ru mitilaen

Luk 19:11-27

¹⁴ “Agod fon, murna dop Anut san kagin panek nek igo wa. Gurman ta tureñ yabi wo dak niñen

o inanen urat tamol igiaig dupalu ya. Agog naon na dilasa man inanen melmel an kagin dupani san tuod lo yabitig ipidinai a. ¹⁵ Inanen urat tamol kisaek kisaek insad kagin, agod dabai dam, ninen o ilon isou dugo moni yabitig ipidinai a. Tamol ta 5,000 kina ipani dugo, ta 2,000 kina, ago dugo ta 1,000 kina ipani a. In ago igane itout go ibisawaig turen yabig yau a. ¹⁶ In yau dugo, tamol 5,000 kina inane yan yau kisaek on go, moni subunan taida an fufo igane wo didaen urat igane se ya. Agog 5,000 kina subunan taidam inane ya. ¹⁷ Tamol a in 2,000 kina inane yan, in dam nek ago mi iganeg 2,000 kina taidam inane ya. ¹⁸ Ak gug tamol a 1,000 kina inane yan, yaug tan gib yabig ilon lo moni an imianig yen a.

¹⁹ “Saen milaen kasik yau la gug, gurman an imul ipalu ya. Saen ipalu man urat tamol an igiaig moni ipidinai amaiak ninen o, dida ru dukubuneg dinjen a. ²⁰ Ago dugo tamol 5,000 kina inane yan, 5,000 kina subunan anda isinig ipalug igo ibol, ‘Naineg gurman, 5,000 kina e panag en ule, nai didaen urat niganeg onane 5,000 kina subunan taidam ninane ya.’

²¹ “Inanen tubun ak igo irupe, ‘On urat tamol uyanan mok a, awag uri pani sinakan, onane urat dam kagin pani uyanan a. On melmel kititik e bani lo niganeg emaiak kagin pidinai uyanan a, amaiak ninen o melmel tubun geig ak wei mi tirnai san nupano wa. Palup, nai da uyasusai tigane.’

²² “Tamol 2,000 kina inane yan dam ipalug ago ibol, ‘Naineg gurman, on 2,000 kina panag a. Ule, nai didaen urat niganeg onane 2,000 kina taidam ninane ya.’

²³ “Inanen tubun ak igo irupeï, ‘On urat tamol uyanan mok a, awag uri pani sinjaokan, onane urat dam kagin pani uyanan a. On melmel kititik e bani lo nigan e maiak kagin pidinai uyanan a, amaiak ninen o melmel tubun geig ak wei mi tirnai san nupano wa. Palup, nai da uyasusai tigane.’

²⁴ “Ak man tamol in 1,000 kina inane yan dam ipalug ago ibol, ‘Naineg gurman, nai nalon ak man on tamol silei a. On abi san urat tamol sad silali naon nane da. ²⁵ Amaiak ninen o nai narer go, onane 1,000 kina nisini naug tan nisareg nimiani a. Ule, onane moni ebe ya, ka nane wa.’

²⁶ “Ak man in san gurman ru naon igo irupeï, ‘On urat tamol saia geig a. On yalis tina ya. On ulon ak, nai abi san urat tamol sad silali naon ninane da. ²⁷ Fun an ninen o naineg moni an moni ab san urat tamol pani ak man, in ka urat ipani wa, an lo moni en san tim anda nane wa.’ ²⁸ Agog gurman an in san urat gurman irupeig ibol, ‘Aria, tamol an san na 1,000 kina nanep, tamol a 10,000 kina aman da yan pani wa. ²⁹ Ata wo? Talpein enti in da yan, nai suguan taidam nupanip an lo in idaisuda wa. Ak man, enti in tinin lo tia agod, gidad in kitek da bo man, in san melmel an banin lo dupasi itout a. ³⁰ Urat tamol lou aman tia yan wabip ubal patun fo ilasap tidom tubun lo imado wa. Aben ante man tamolpein tina n digane dop madai lo luod dugurmi wa.’

Tamol Nanun sipsip bilelek da itarpasai a

³¹ “Saen Tamol Nanun inanen girager aman da lo ipalu dop inanen enel adi fidian dida dupalu wa. Ante inanen kin san badim fo na imasip imado

wa. ³² Ago dop in tan titin fidian sad tamolpein itumanai dop naon na dutur a. Ante dop in itarpa-saip malan uraru lo idirai a, nek ibol titianek tamol sipsip sen idirai dop bilelek sen idirai dak ago mi a. ³³ An lo dop in sipsip tuon won ak ate idiri dop, bilelek tuon nas ak ate idiri wa.

³⁴ “Agop Kin tamolpein a tuon won ak ate dumado dan, igo irupidai, ‘An naineg Bai san bar anane ya. Apalup kagin panek aben e Anut fun lo mok tan igane ilasa wo dugo ikubuneg yen den anane wa. ³⁵ Enta wo? Gubak mi nai kadag lo numado dugo anan apanag a. You o nhamat dugo you dam apanag a. Nai tamol gol ak gug an anjiliag go ansam ab lo tau a. ³⁶ Nai kulos amag tia yak gug, kulos apanag a. Nai subam amag da yak gug, kagin apanag se ya. Nai subanek lo numado dugo, an bubeg abisa wo apalug aliag a.’

³⁷ “Agod tamolpein itaotan ak ru naon igo durupei, ‘O Tubun, saen dugon lo kadag ifuno dugo miliog, anan mupano yak i? Tia, saen dugon te you o umat dugo you mupano yak i? ³⁸ Saen dugon te tamol gol ak on milio dugo minjilio ab lo tau ak i? Ago dugo saen dugon lo kulos ama tia dugo miliog kulos mupano yak i? ³⁹ Saen dugon lo subam ifuno dugo milio boi, tia, subanek lo mado dugo maug milio yak i?’

⁴⁰ “Agop Kin ru naon igo irupidaip ibol, ‘Nai rumok nurupaian da, kulob dugo nai teig e yan an tia yen lo agane man, kulob ago agane yan, an nai lo dam ago agane ya.’

⁴¹ “Agop in aenta tuon nas ak ate dumado dan igo irupidai, ‘An tamolpein Anut san misilane am

da ya, abisawag sen alasap, yai o ta imat na dan lo au a. Yai an man Satan inanen enel adi dida lo idiraip diau o Anut ikubune pidinai lag yen da. ⁴² Man ata wo? Gubak mi kadag nai ifunag dugo ananj ta apanag na ya. Nai you o nmat dugo you ta apanag na ya. ⁴³ Nai tamol gol ak gug, an anjiliag go anjam ab lo ta tau na ya. Nai kulos amag tia yak gug, an kulos ta apanag na ya. Nai subam amag da subanek lo numado dugo, aug ta aliag na ya.'

⁴⁴ "Agop in dam ru naon igo durupe, 'O Tubun en, saen dugon lo kadag ifuno boi, tia, you o umat boi, tia, on tamol gol ak on boi, tia, on kulos ama tia, subam ama dag, subanek lo mado dugo milio gug, man kagin ta mupano na yak i?'

⁴⁵ Ante dop in ru naon irupidaip ibol, 'Nai rumok nrupaian da, kulob dugo nai teig e yanjan tia yak lo ta agane na yan, nek kulob an nai lo dam ta agane na ya.'

⁴⁶ Agop tamolpein an dibiseip diaup ai wadan saian geig saen fidian yen dan lo diladup ante pempem mi dumado wa. Ak man tamolpein itaotan ak kumaen pempem san dijanep dumado wa."

26

*Gurman adi Jesus dufuni imat o awad kisaek a
Mak 14:1-2; Luk 22:1-2; Jon 11:45-53*

¹ Jesus ru mitilaen en fidian ibol itout go inanen megeloum irupidaig ibol, ² "An alon ak, Pasova san ad nanek idu san man nal uraru mi yen da. An lo dop Tamol Nanun ager banid lo diganep aigim fo dubali wa."

³ Saen an lo pris tutubu, agod Isrel san tamol gurman adi, pris gurman yañan Kaiafas dubol dak san ab lo dutumani a. ⁴ Inj Jesus pasak nam dirawi nap diabip dufuni imat o dukubiai se ya. ⁵ Ak man inj dubol, “Id tumanek gun ak san nal lo kulob en ta tigane na wa, kabelan tamolpein luluñad lo ager diabisa banau.”

*Pein ta Jesus kabuñan fo gureñ iwali a
Mak 14:3-9; Jon 12:1-8*

⁶ Jesus inj Betani panu na imado dugo, tamol ta yañan Saimon tinin gubak mi lepra aman da yak inñsan ab lo ida dumado ya. ⁷ Ago dugo pein ta gureñ, butol ta pat siñaokan ak nam digane yak, isinig san na ipalu ya. Butol an ilon lo gureñ naon lak na geig ak awana ya. Jesus tebol sinjiren na imasi dugo pein an ipalug gureñ an kabuñan fufo na iwali a.

⁸ Saen inñanen megeloum ago dile man, tiñaed saian go igo dubol pein an dusumiani, “Enta wo gureñ kawan bidani dak i? ⁹ Gidad tubuseip, didaen lo tiganep moni naon tubun ak lo didad dop moni an tiñanep tamol filiad tia yak ka tupidinai a.”

¹⁰ Jesus inñsad nñeñ an ilon go igo ibol irupidai, “Enta wo pein en muruan apani dak i? Inj man nñai nñeg o kulob siñaokan geig ak igane ya. ¹¹ Saen fidian tamolpein filiad tia yak añ luluñam lo dida amado wa, ak gug nñai man saen milaen añ da ta tumado na wa. ¹² Pein inj nñai tinig fufo gureñ iwali an, nek kagin an lo man inj nñaisag sisanun mutou lo diginiag amaiak san dal ikubune da. ¹³ Nñai ru rumok nñurupaian da. Tan dugon te bilaluñ uyanan en dubol ilasa wan, ante dam kulob a pein en

igane yan ninjen o dubol ilasap, lo pein en ninjen o ilo sou digane wa.”

Judas Jesus gurman adi tuod lo igane wo awad kisaek a

Mak 14:10-11; Luk 22:3-6

¹⁴ Saen an lo, nunod 12 amaiak luluᅇad lo, tamol kisaek yaᅇan Judas Iskeriot amaiak pris tutubu yak sad na yau a. ¹⁵ Ante in igo ibol, “An ata mel ta ᅇai apanag dop, ᅇai Jesus tuom lo ᅇigane wak i?” Ago man moni silva 30 an dupani a. ¹⁶ Agog Judas imasag, Jesus tamol tutubu yak tuod lo igane wo, dal an abanᅇ yabi se ya.

Jesus megeloum dida soubul wadan diani a

Mak 14:12-26; Luk 22:7-23; Jon 13:21-30; 1Kor 11:23-25

¹⁷ Tumanek a yaᅇan bret yis an tia yak san nal malan te yan lo, megeloum adi Jesus san na dupalug ago dubol, “Onᅇsa ilo lo, manᅇ dugon te melmel mukubinep onᅇ ate tumanek an san ananᅇ wani wo rupaiama dak i?”

¹⁸ Ago dugo in ibol, “Aup Jerusalem na aladup tamol ta ᅇai ᅇalonᅇ ak naon na alasap, igo arupeᅇi, ‘Girek manᅇau igo ibol a. ᅇaisag saen ipalug sumeik la ya. Onᅇsa ab lo ᅇaineg megeloum dida tumanek ananᅇ mani wo da.’ ” ¹⁹ Ago tag megeloum ru kagin Jesus irupidai an dirig, ananᅇ dukubune ya.

²⁰ Gurai idu dugo Jesus tebol sinᅇren na imasig, nunod 12 an dida dumado ya. ²¹ In ananᅇ diani dugo igo ibol, “ᅇai rumok ᅇurupaianᅇ da. Anᅇ lulanᅇam lo tamol kisaek, ᅇai ager adi tuod lo iginiag ᅇau a.”

²² An lo na ilod muruan geig dugo, anen anen dusumianig dubol, “O Tubun ak, ηai i?”

²³ Ago dugo in ru naon irupidaig ibol, “Tamol nek a daeg lo ηai da sisem banima musomini dan, nek amaiak ηai ibilag pe ager banid lo ηilasa wa.

²⁴ Tamol Nanun ru a in ninen o buk lo digire yan nek ago mi in lo ilasa wa. Ak gug tamol enti a Tamol Nanun iganep inanen ager adi sad tuod lo ilasa wan, rumok in muruan tubun kasik ak ile wa! Gidad tinan ta igansi na yak man, an uyan a.”

²⁵ Agog Judas, tamol in sen Jesus ager tuod lo igane yan, igo ibol isumiani, “Girek manau, ak ηai i?” Jesus irupeig ibol, “Awo, nek onse ubol la ya.”

²⁶ Aria, in anan diani dugo Jesus bret inaneg, Anut ilo uyan ru ipanig yafuteg, inanen megeloum adi ipidinai dugo ibol, “An ananep ani, en man ηaineg tinig.” ²⁷ Agog in gab wain anda yak inaneg, Anut ilo uyan ipanig, ipidinai dugo ibol, “An fidian gab en lo aluk a. ²⁸ En man ηaisag dar kontrak san, tamolpein wei mi inaned aupasek isasi san tinig lo yak ilasa wa. ²⁹ ηai ηurupaian da, ηai afon ai wain san nunon lo ta ηaluk na wa, ago yaup nal ilasa dan te gup, afon Tamag san kagin panek aben lo fon an da sisem taluk a.”

³⁰ In bar diabi itout gug kuai te dilasag Did Oliv ate diau a.

Jesus ibol, murnap Pita in ninen o itot a

Mak 14:27-31; Luk 22:31-34; Jon 13:36-38

³¹ Agog ante Jesus in irupidaig ibol, “Gamu tidom nek en lo, an fidian mi ηai nineg o ilom idup yaup abisawag a. Man dugo, Anut san girek lo ru igo ibol,

‘Nai titianek tamol nufuni wa,
ago dop inſan sipsip dusol pe gidigheid diau a.’

³² Ak man Anut n̄ai ifufunag pe fon n̄umasa gup, n̄ai n̄irinanan̄ pe imug mi Galili na n̄au a.”

³³ Pita ru naon igo irupei, “Gidad tamol fidian on̄ n̄ine wo ilod idup dibisawo bo man, n̄ai man tia ya.”

³⁴ Jesus ru naon igo ibol irupei, “N̄ai rumok n̄urupaio da, gamu tidom nek en lo kurek ta ibob na dop, saen utol on̄ n̄ai n̄ineg o utot a.”

³⁵ Agog Pita irupei, “Gidad, n̄ai on̄ da tamat bo man, n̄ai on̄ n̄ine wo ta n̄atot na wa, tia geig a!” Ago dugo megeloum fidian dam nek ago mi dubol se ya.

Jesus abi Getsemani lo yaug igudani a
Mak 14:32-42; Luk 22:39-46

³⁶ Ago man Jesus in̄ dida, aben ta yaŋan Getsemani dubol dan ate diau a. Ante Jesus megeloum irupidai, “An̄ ente amasip amado dop, n̄ai onte n̄aup n̄ugudani wo da.” ³⁷ Agog in̄ Pita agod Sebedi nanun uraru dida in̄al go diau a. Saen an lo in̄ funiganeg ilon ipapao dugo ilon dam muruan idu ya. ³⁸ An lo igo irupidai, “N̄ai ilog tubun mi muruan idu dugo n̄amat o sumeik da. An̄ gidad igo amado dop n̄ai da sisem malad ipuk pe tumado wa.”

³⁹ Ago dugo in̄ kitek ipar yaug, turun isoluwig, kabunan̄ idug tan itutig, igo ibol imosiai, “O n̄aineg Bai, idaisuda tap, gab en n̄ai banig lo ka pasi yau a. Ak gug on̄ n̄ai ilog ta uri na wa, tia, on̄sigane ilo mi uri wa.”

⁴⁰ Agog in inanen megeloum adi sad na ipalug, njon diabi dugo yil a. An lo in Pita irupeig isumiani, “En dugo, an auwa kisaek nai da malad kumaen tumado san ta idaisuda na yak i? ⁴¹ An malam kumaen amado dop amosiai a, man dugo, kabelan bitinaek ta ipalup ilom inanep ari banau. Njutum lo man awag yabi wo ilom ibol da, gug tinimi man dabai an tia ya.”

⁴² In afon imul yaug imosiaig igo ibol, “O naineg Bai, gab en ta irinanag na dop, gidad njaluk a. Onjane ilo nai o an, ago ka ilasa wa.”

⁴³ Saen imul ipalu man njon diabi dugo yil a, man dugo, maladi muruan geig a. ⁴⁴ An lo afon ibisawaig imosiai o imul yau a. Gudane naok gubak mi igane yan ago mi fon igane da ya.

⁴⁵ Imosiai itout go megeloum adi sad na ipalug igo irupidai, “An njon abi dugo yaes abal on dak i? Ale, naisag saen idu wo da, Tamol Nanun aupasek tamol tuod lo digane san saen idu la ya. ⁴⁶ Amasap, tau. Ale, tamol a palan ag imari amaiak ipalu da!”

Ager adi Jesus diabi a

Mak 14:43-50; Luk 22:47-53; Jon 18:3-12

⁴⁷ Saen Jesus inijen se man, Judas ipalu ya. In megeloum 12 ak lulunad lo aben anda ya. In ipalu dugo tumanek malan tubun ak dida, sabiri agod tok dam duburoug naon na dilasa ya. Pris tutubu agod Isrel sad gurman adi didinaig dupalu ya. ⁴⁸ Imug palan niganag tamol a in tuod lo igane san man, kob ta njen o irupidai, “Tamol a nai musuk njupani dop ale dan, nek an Jesus, an tamol amaiak abi wa.” ⁴⁹ Aria, in Jesus san na ipalu kisaek on

go ibol, “O girek manau, tidom uyan.” Ago ibol go musuk ipani a.

⁵⁰ Jesus ru naon igo irupei, “Turag, ilo yen dan ago gane.” Ago ibol go in Jesus sumeik dupanig diabi a. ⁵¹ Ago dugo tamol ta Jesus da dumado yan, inşinan sabiri igursig pris gurman an san urat pinein kududon aen ta ituteg tan na idu ya.

⁵² Ak gug Jesus irupei, “Onane sabiri gane imul a. Man dugo, tamol fidian a sabiri duburoup lo wagai digane dan, sabiri lo nam daon dişane wa. ⁵³ An dugo ilom isou di? Ak dugo, şai Tamag şusumiani dop, eşel malan 12 agod suguan taidam wei kasik dida ipanag kisaek on o imoi ak i? ⁵⁴ Ak man şai ago şigane tap, en dugo won ş ru a Anut san buk lo, kulob gamu e ilasa wo ibol en, nuşon ilasa wak i?”

⁵⁵ Saen amaiak lo Jesus ager tamol an igo irup-idai, “Enta wo an ş sabiri in ai tok da asinig aliag pe abiag o apalu yak i? Ak dugo, şai wagai adi dida gabman mabi idu san gurman igo won an ago ilom isou di? Nal fidian şai tempel aben lo şumasi dugo tamolpein şupiteşanai se ya, ak gug şai ta abiag na ya. ⁵⁶ Ak man melmel en fidian ilasa san fun man, ru gubak mi profet adi digire yan gamu en nuşon ilasa ya.” Agog megeloum fidian mi Jesus dubuseig dusol go diau a.

Juda adi Jesus kot lo digane ya

Mak 14:53-65; Luk 22:54-55,63-71; Jon 18:13-14,19-24

⁵⁷ Tamol a Jesus diabi an, dişaneg pris gurman Kaiafas san ab lo diau a. Kubiaen şan girek manau, agod pris tutubu dida imug mi diaug ab ante

dutumanig Jesus dititianig dumado se ya. ⁵⁸ Ak man Pita Jesus njen aban irig yau ak gug, in kitek asau mi imado ya. In pris gurman san ar lo iladug ai katuk adi dida dumado ya. In ata mel ta Jesus njen o ilasa dop ile wo malan igane se ya.

⁵⁹ Pris tutubu, agod kaunsil fidian mi, tamol aenta digiaig sewak ru dubol dop, Jesus kagin saiak ta igane yak, ate dufunip imat san dal ta dile wo dukubiai se ya. ⁶⁰ Ak man tamol wei mi sewak ru amad da yan naod na dilasa bo man, dal ta dile na ya. Ak gug murnag tamol uraru dupalug naod na dilasa ya, ⁶¹ in ago dubol, “Tamol en igo ibol a, ‘Nai dabai amag da yak lo Anut san tempel njurubep, nal utol lo mi foun ak njabisa wa.’ ”

⁶² Ago man pris gurman imasag Jesus igo isumi-ani, “On ru naon ta ubol na wak i? Ru e on nije wo tamol emaiak dubol den dugo yak i?” ⁶³ Ak man Jesus ru ta, ta ibol na ya, itokibol itur se ya.

Ago dugo pris gurman irupe, “Nai Anut kumaen imado dan san yanjan lo, on njurupaio dak an njen o, itaot mi rupaiama wa. On Kristus, Anut Nanun i? Rupaiamap malon.”

⁶⁴ Ago man Jesus igo ibol irupe, “Awo, nek onse ubol la ya. Ak man nai an njurupaian da, murna gup Tamol Nanun in Anut a dabai tubun geig anda yan tuon won ak ate imasi dop ale wa. Agod Tamol Nanun keit lo timtaen titinjaem kuai tem ipalu wa, mel amaiak dam ale wa.”

⁶⁵ Agog pris gurman, ru an njen o imasa saian go, in san ilo muruan an kuai te ikubiai dile wo inanan kulos irasireg igo ibol, “In Anut yanjan malan isue ya. Gidad, tamol taidam, tamol en san kagin njen o dubol ilasa san id ta tigiai na

wa. Man dugo, gamu geig inanen ru lo Anut yanjan malan isue yan ansemi alonj a. ⁶⁶ Ansam ilo sou lo, tamol en dugo tigane wak i?”

Ago tag in ru naon igo durupe, “In mel saian geig ak igane, ak ninen o ka imat onj a.”

⁶⁷ Ago man in Jesus naon fo na dulusu dugo banid nam dufuni na ya, agod aenta in kudanan dugufute dugo igo dubol, ⁶⁸ “Kristus, onj gamu profet ru ubol a, tamol e ifuno den enti ak i?”

Pita Jesus ninen o itot a

Mak 14:66-72; Luk 22:56-62; Jon 18:15-18,25-27

⁶⁹ Aria, saen an lo Pita kot ab patun fo imasig imado dugo, urat pein ta sinjiren na ipalug igo ibol, “Onj dam Jesus Galili san tamol amaiak da amado ator se ya.”

⁷⁰ Ak gug Pita tamol an fidian malad lo itot go igo ibol, “Ru onj ubol dan naj ta njalon na ya.”

⁷¹ Murna gug yang ar san dalawan te imado dugo, urat pein sen ak ta ileg, ninen o tamolpein sumeik dumado yan fidian irupidai, “Tamol an in Jesus Nasaret san amaiak ida dumado dutor se ya.”

⁷² Ago man fon Pita itot go ru sakar nam irupidai, “Rumok geig naj tamol an ta njalon na ya!”

⁷³ Kitekan taidag tamolpein a dutur na yan Pita san na diaug durupeig dubol, “Rumok geig, onj insad kisaek a. Onjane njinen lo se kuai te ibulo lasa ya.”

⁷⁴ Agog fun iganeg sen imisilanig ibol, “Nai sewak njigane tap Anut ka imisilanag a! Nai tamol an ta njalon na ya!”

Saen ago ibol itout man, kurek ibob. ⁷⁵ Ago dugo Pita in Jesus ru ibol an ilon isou a, “Saen kurek gamugo ibob dop, saen utol naj ninjeg o utot a.” Ago man in kuai te ilasag tinañ tubun mi igane se ya.

27

Jesus dinjaneg ida Pailat san na diau a
Mak 15:1; Luk 23:1-2; Jon 18:28-32

¹ Salso idu dugo pris tutubu adi, agod Isrel tamolpein sad gurman adi, dal dugon lo Jesus dufunip imat o nug lo dukubiaig ilod kisaek dilasa ya. ² Agog in Jesus rasau nam dushmanig dida diaug Rom san gurman Pailat tuon lo digane ya.

Judas sen buron isuseg imat a
Apo 1:18-19

³ Tamol Judas, nek emaiak Jesus ager adi tuod lo igane ya. In leil igane dugo Jesus pilapil ru lo diabi idug muruan lo digane ya. An lo man in ilon tubun mi geig imunani a, ago yan lo inanen aupasek ninen sen ipasi wo moni patun silva 30 dupani an isinig imul yang ipidinai a. ⁴ In igo ibol, “Nai au napas a. Nai tamol a tuom lo nigane yan, in kulob saian ak ta igane man tia ya, ak gug an afunip imat o da.”

Ak man in dubol, “En man mansama mel tia ya, onane ilo saian mi a.”

⁵ An lo man, Judas moni patun silva 30 dupani an, tempel san ar lo yabibol idu dugo, aben an ibiseg yang sen buron isuseg imat a.

⁶ Pris tutubu adi moni an dinjaneg igo dubol, “Moni en man tamol dufuni imat ak san naon, an dar idad a. An lo id moni en tempel san moni da tutumani san ninen o idsad kubiaen ipadau

a.” ⁷ Amaiak niñen o in awad dutumanig moni an urat dupani wo ilo sou digane ya. Ago man tamol bod niganag, inñsan tan titin ta didad a, an lo dop ante in ka tamolpein gol ak sad sisanud disiriai a. ⁸ Ago yak niñen o, tan titin nek an yañan man igo ya, “Dar san tan” ago dubol a. Gamu en dam tamolpein in yañak nek an mi dubol da. ⁹ Saen pris tutubu adi in tan titin an yañak amaiak dupate man, ru ta profet Jeremaia ibol ilasa yan nuñon ilasa ya. In igo ibol, “In moni patun 30 silva ak diñane ya. An man inñsan daden san naon. Isrel san tamol aenkadi, tamol an in didad san naon amaiak digansi a. ¹⁰ Moni an diñaneg, lo tamol bod niganag san tan titin didad a, nek ibol Tubun en ru kagin ñai ipanag ak nek ago mi digane ya.”

*Jesus Pailat san sumiaek lo dugunig itur a
Mak 15:2; Luk 23:3-5,13-25; Jon 18:33–19:16*

¹¹ Jesus gabman gurman naon na dugunig itur dugo, ago isumiani, “On Juda sad kin ak i?”

Ago dugo Jesus ibol, “Awo, nek onse ubol la ya.”

¹² Ak gug saen pris tutubu adi agod Juda sad gurman adi in Jesus ru dupani man, in ru naon ta ibol man tia ya. ¹³ Ago yak niñen o Pailat irupeig isumiani, “On ru fidian dupano den kududo lo ta ulon na yak i?” ¹⁴ Ak man Jesus ru naon ta Pailat irupein man tia ya, gidad ru wei mi dupani bo man ru naon ta irupidai na ya. An niñen o Pailat irut go ilo sou wei mi igane se ya.

¹⁵ Aria, anañar fidian, Pasova san saen lo, gabman gurman subanek tamol kisaek o lian yañan dupate dop, ipasip kawan imado wa. Kagin nek an san nal idu ya. ¹⁶ Saen an lo man tamol ta

yañan Barabas in subanek lo imado ya. Tamol emaiak in man saian geig an tamolpein fidian mi duloñ fufei a. ¹⁷ Amaiak ninen o saen tamolpein dutumani itout man, Pailat igo ibol isumianai, “En dugo woñ ilom isou di? Enti ñubuseip añsam na imul o? Ñai Barabas ñubusei wo, tia, Jesus e Kristus dubol damaiak ñubuseip imul o?” ¹⁸ Man dugo, in ilonñ uyan ak man, tamol an in mala sek lo Jesus diñaneg kot lo dupalu ya. ¹⁹ Mel taida mi, saen Pailat in tulek tamol san kalik fo imasig imado dugo, inñsan pein san na ru igane ipalug igo ibol, “Onñ mel ta tamol e itaot aman en ninen o ta gane na wa. Man ata wo? Gamu na ñai ñionamin ta lo ñile dugo in ninen o madai wei mi ifunag na ya.”

²⁰ Ak gug pris tutubu agod Juda sad tamol gurman adi, tamolpein malan an ilod diñane ya. In tamolpein an dududuwaig Pailat dusumianig Barabas ipasi pidinai dop, Jesus daon ipani wo ago dubol se ya.

²¹ An ninen o Pailat fon ibol isumianai, “Anñ tamol uraru en luloñad lo enti ñupasi wo amat di?”

Ago man duwagin dugo igo dubol, “Nek Barabas mi a.”

²² Agog Pailat ibol isumianai, “Añsam ilo sou lo, Jesus e Kristus dubol den ninen o ñai dugo ñigane wak i?”

Ago man fidian mi duwagin dugo dubol, “Aigim fo bali wa!”

²³ Gug in ibol, “Ata mel o? Inñ ata mel saian ak igane yak i?”

Ago bo man in awad tubun mi duwagin go disasai, “Aigim fo bali wa!”

²⁴ Pailat in sen ikubiani man, in san ru ta idaisuda na dugo, ager tubun ak ilasa wo da. Amaiak ninen o in you in aneg, tamolpein malad lo banin ifulani a. Ago dugo in igo ibol, “Tamol en imat dop man n̄aisag muruan tia ya. An man an̄siganem mel mi a.”

²⁵ Agog tamolpein fidian ru naon durupeig igo dubol, “Ai wadan en man man̄sigama, agod nanum murouma dida lo, ka yen a!”

²⁶ Agog saen ante man in Barabas ibiseig sad na yau dugo, Jesus ipidinaig rasau nam dufuni a. Dufuni itout go Jesus aigim fo dibali wo yu tamol tuod lo igane yau a.

*Yu tamol adi Jesus kukok an digane ya
Mak 15:16-20; Jon 19:2-3*

²⁷ Agog gabman gurman san yu tamol adi, Jesus di aneg gabman san ab lo diau a. Ante man in Pailat san yu tamol fidian mi dupalu wo digiai a. Aria, dupalug naon na dutumani a. ²⁸ Jesus tinin fo kulos dupasi dugo, yamel daran ak ta nam kin san kob igo won tinin dubuluwi a. ²⁹ Ago dugo in kam dudurun aman da yak, kin san kitikat* igo won ditiladeg, Jesus kabunan fo na digane ya. Makud ta di aneg tuon won ak ate diganeg kin igo won yabi a. Ago dugo naon na turud disoluwig, kukok an digane dugo igo dubol, “Per o, Juda sad Kin!” ³⁰ Agog tinin fo dulusu se ya, ago dugo makud a banin lo yabi an di aneg ate kabunan te dufuni se ya. ³¹ Saen kukok an digane itout man, yamel daran tinin fo yan dupasi dugo, in siganen

* **27:29:** Katkat

kulos digane pani a. Agog aigim fo dubali wo dijaneg diau a.

Jesus aigim fo dubali a

Mak 15:21-32; Luk 23:26-43; Jon 19:17-27

³² In Jesus dida turen diabig diau dugo, yu tamol adi dal te tan Sairini san tamol ta, yanjan Saimon dubol dan dile ya. Agog Saimon an disodudunig Jesus san aigim isini a. ³³ In diaug aben ta, yanjan Golgota dubol dak, ate dilasa ya. Yanjak an san fun igo ya, “Kabunja tatu san aben.” ³⁴ Aben ante dilasag, marasin gigen ta wain da dukubulig, Jesus iluk dop lo madai yabi idu wo dupani a, agog kitek iluk ak man ikubiani ile tag, ta iluk na ya. ³⁵ Agog yu tamol adi Jesus aigim fo dubali la gug, in sed nug ilon lo in san bioun diabititi san ninen o satu lo dukok se ya. ³⁶ Dukok itout man, dumasig dititianig dumado se ya. ³⁷ Ru ate kot dupani amaiak ai lapan fo digireg, aigim kabunan fufo na dubali a. Ru en san sutek lo man igo ya, “En Jesus, Juda sad Kin.” ³⁸ Jesus giranen na man ager tamol gumagam digane na yak urarum aigim fo dubalai a. Ta tuon won ak ate dusanjani dugo, ta tuon nas ak ate dusanjani a. ³⁹ Tamolpein diau dumul dop ninen o ru kukok dubol dugo, kabunjad dukupari pani se ya. ⁴⁰ Ago dugo igo dubol se ya, “On tamol amaiak tempel subarip, nal utol lo mi foun wabisap guni wak ubol a, an ninen o on se ka patu pasi wa! On Anut Nanun mok tap, aigim biseip udu.”

⁴¹ Nek ago mi pris tutubun adi, kubiaen san girek manau adi, agod Juda sad gurman adi dam, in kukok an digane dugo igo dubol se ya, ⁴² “In

tamol aenta patud ipasi na yak gug, inſen patun ipasi san man tia ya. Inſ Isrel sad Kiſ, an niſen o inſ aigim ibiſeip idu dop, an lo na id ilod rumok a. ⁴³ Inſ Anut niſen o ilon rumok da, aria, Anut tamol en niſen o imat mok tap, gamu geig en Anut mi ka ibinawi wa. Ak gug Anut inſ o imat mok di? Man dugo, inſ ibol ak, ‘Ŧai man Anut Nanun a.’ ” ⁴⁴ Dal kiſaek mi lo gumagam tamol uraru Jeſus giranſen na aigim fo duſunſanai an dam ru kukok wei mi tinin fo digane ſe ya.

Jeſus imat a

Mak 15:33-41; Luk 23:44-49; Jon 19:28-30

⁴⁵ Ad mitilaen 12 kilok an lo, tidom tubun tan an fidian yafutani geig go yaug 3 kilok gurai iſi a. ⁴⁶ Saen kitek 3 kilok ſumeik ipani dugo, Jeſus awan tubun mi iwagiſn dugo ibol, “Eli, Eli, lama ſabaktani?” Ru en fun igo ya, “Ŧaiſag Anut, ſaiſag Anut, ata wo ſai biſawag ak i?”

⁴⁷ Tamol aenta ſumeikan dutur man duloſn go dubol, “Tamol en man Elaija iwagi da.”

⁴⁸ Ago dugo yu tamol ta ririan mi imaspalug yaug, mel ta beig ſan titaliſn igo woſn ak inſaneg, wain gigen an lo iſominig, den luon ate iſueg, Jeſus iluk o awan te igane ya. ⁴⁹ Ak man aenta dubol, “Ale funi woſn dop, Elaija ipalup ibinawi dop tile wa.”

⁵⁰ Jeſus afon awan tubun mi iwagiſn dugo, inſanen ur tinin lo yak ibiſeig yau dugo imat a.

⁵¹ Saen nek amaiak lo mi, yamel tubun tempel lo iyuk yen an, o lak na fun iganeg imasireig yaug tan na idug uraru dilasa ya. Saen an tan iſuruwor dugo pat tutubu yak ſed igile yau ſe ya.

⁵² Ago dugo mutou san aben dam awad ikasap dugo, tamolpein gun ak wei mi gubak mi dumat la yan sad sisanudi fon kumaen dumasa ya. ⁵³ In mutou dubusei a. Murnag saen Jesus imasa yan lo Jerusalem na diaug diladu dugo tamolpein wei mi dil a.

⁵⁴ Yu gurman inanen yu tamol dida Jesus diti-tianig dumado na yan, tan isuruwor dugo melmel dilasa yan ago dil man, tubun mi direr se ya. An ninen o yu gurman an ibol, “Rumok geig, en man Anut Nanun.”

⁵⁵ Pein wei mi dumado na yan dam, asau mi dutur dugo leil digane se ya. Pein amaiak saen Jesus Galili ibiseig turen yabi dugo dubunawi wo njen aban diri se ya. ⁵⁶ Lulanad lo pein kisaek ta man taun Magdala san Maria, agod turan man Maria sen ta, Jems in Joses da tinadi, agod ta man Sebedi nanun uraru amaiak tinadi.

*Jesus san sisanun pat san gib lo digane ya
Mak 15:42-47; Luk 23:50-56; Jon 19:38-42*

⁵⁷ Ad idiau o sumeik dugo, taun Arimatea san moni tamol ta yan Josef ipalu ya. In dam Jesus san megeloum mi a. ⁵⁸ In Pailat san na yang Jesus san sisanun inane wo isumiani. Inanen yu tamol adi ru dabai anda yak ipidinaig diaug Jesus san sisanun dinaneg Josef dupani a. ⁵⁹ Josef sisanun an isini yang, yamel foun ikok aman geig ak nam ifou ya. ⁶⁰ Agog in sinanen mutou foun ak lo igane ya. Mutou an man pat san gib, Josef in sen gubak mi tamol irupidai dugo diabi a. Agog Josef pat muruan tinan ak ta ibili ipalug mutou awan ate ibalfutani a. Agog aben an ibiseig yau a. ⁶¹ Taun

Magdala san Maria, in Maria ta da mutou an fun na dumasig leil digane se ya.

Yu tamol adi mutou ditiyani a

⁶² Nal a Soubul Kubunek San dubol dan itout la gug, nal tinin te yak lo, pris tutubu adi agod Farisi adi diaug Pailat naon na dutumani a. ⁶³ Agog igo dubol durupei, “O tamol tubu, ru ta sewak tamol en kumaen imado dugo ibol an man iloma isou da. In ibol, ‘Nal utol itout la gug, fon kumaen numasa wa.’ ⁶⁴ Amaiak ninen o, on gidad ubol dop yu tamol adi mutou fun na nal utol tawan diganep dumado wa. Kabelan inanen megeloum adi sisanun gumagam aman dinane dop, mutou lo imasa la yak ago dubol tamolpein durupidai banau. Ago dop man insad ru sewak foun en, insiganen ru sewak gubak mi ibol an irinjani banau.”

⁶⁵ An ninen o Pailat irupidai, “An yu tamol anjal dop, arupidaip mutou fun na tawan digane wo uyanan a. Mutou kagin apani dop dugo agane wo ilom ibol tap ago ka agane wa.” ⁶⁶ Ago man diaug mutou dufutani wo uyanan a. Agog in gib awan san pat amaiak fo na kob ta digane ya. An lo tamol ta pat an ibili tap kob an malan issue wa. Ago dugo yu tamol didiraig mutou kagin dupanig dumado se ya.

28

Jesus fon kumaen imasa ya

Mak 16:1-10; Luk 24:1-12; Jon 20:1-10

¹ Aria, ubou san nal Sabat dubol dan* itout go nal patun fo, ubou turan san nal malmalan,†

* **28:1:** Sarere † **28:1:** Sande

tidom lom geig Maria Magdala san pein, in Maria turan da mutou dile wo diau a.

² Ago dugo kanaurig tubun ak ilasa ya. Man dugo, Tubun ak san enel ta in kumaen panu ibiseig idug, pat a mutou awan ifutani an ibilig fufo na imasig imado se ya. ³ Enel an san leil man ibol weil irakilawi dak san leil ago mi a, agod in san kulos milkouk kasik man ibol ais igo won a. ⁴ Ago man yu tamol adi, in ninen o durut direr se yan lo dusuruwor go tan fufo na dudug tamol dumat ak igo won dien se ya.

⁵ Ago dugo enel pein uraru an igo irupidai, “An ta arer na wa. Nai naloŋ ak an uraru mi Jesus ale wo apalu ya, tamol nek a aigim fo dubali ama ya. ⁶ In ete ta yen na da, in imasa la ya, nek ibol imug irupaian ak ago mi a. Apalup yen ak aben ka ale wa. ⁷ Ago dop ririan aup inanen megeloum igo arupidai a. ‘In mutou ibiseig imasa la ya. Ago man in imug mi Galili na yau dop an nien aban ari wa, an aben ante gup in ale wa.’ Aria, bilalun nupanan o nupalu yan nrupaian itout a.”

⁸ Pein uraru an direr geig ak gug, in uyasusai tubun mi digane ya. Ago man in ririan mi mutou dubuseig dumaspalu on in san megeloum durupidai o diau se ya. ⁹ Dal dirig diau dugo Jesus naod na ilasag ibol, “Tidom lom mi!” Agog pein an sinjiren na diaug nien diabig ubou an dile ya. ¹⁰ Ago dugo Jesus uraru an igo irupidai, “An ta arer na wa, an aup nai teig muroug arupidaip Galili na diau a. In aben ante gup nai diliag a.”

Yu tamol adi sad ru

11 Pein uraru an turenj diabi dugo, yu tamol adi mutou kagin dupani se yan, taun ilon lo diaug diladug melmel ilasa yan, niñen o pris tutubu yan durupidai a. 12 Amaiak niñen o pris tutubu yan in Juda sad gurman adi dida dutumani dugo nug lo dukubiaig an lo ru dufuni a. Agog moni patun silva an idaisuda mi yu tamol an dupidinai a. An lo awad dufutani wo ago digane ya. 13 Ago dugo in igo dubol durupidai, “Anj tamolpein igo arupidai a. ‘Tidom lo man maen on dugo, insan megeloum adi pasak nam dupalug sisanun an gumagam an digane ya.’ 14 Agod gabman gurman ru en ilon tap, man ida ru ka mukubune wa, ago dop an muruan am tia wa.” 15 Ak niñen o yu tamol adi, moni an diñane dugo, gurman adi dubol ak ago mi digane ya. An niñen o ru amaiak Juda adi lulanad lo ifurak yau a, an lo Juda adi ru nek an mi dubol dugo ipalug gamu da mi a.

Ru kagin tubun geig ak Jesus id irupaiad a

Mak 16:14-18; Luk 24:36-49; Jon 20:19-23; Apo 1:6-8

16 Aria, megeloum nunod 11 an, Galili na diau wo turenj diabig dutor nag, did ta gubak mi Jesus niñen o ibol an sinjiren na dilasa ya. 17 Ante saen in dile man, ubou an dile yak gug, aenta Jesus niñen o ilod uraru a. 18 Agog Jesus in sumeik mi ipalug igo irupidai, “Anut dabai fidian mi, kumaen panu san, agod tan en san dam, lo melmel fidian njetirnai o ipanag a. 19 Ago yak niñen o, an gidad aup an lo tamolpein a tan fidian lo dumado dan, naisag megeloum adirai dilasa wa. Ago dop an Bai yan an lo, Nanun yan an lo, Awan Urgun yan an lo afulanai

a. ²⁰ Ru kagin fidian ηai an ηurupaian amaiak in duri dupani uyanan o apitenjanai a. Agod en ale, ηai pempem mi an da tumado da, ago mi yaup saen en itout a.”

Anut san bilalug foun
The New Testament in the Takia Language of Papua
New Guinea
Nupela Testamen long tokples Takia long Niugini

Copyright © 1999 The Bible Society of Papua New Guinea

© Faith Comes by Hearing

Language: Takia

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-12-11

PDF generated using Haiola and XeLaTeX on 22 Feb 2024 from source files dated 31 Aug 2023

757b3e4e-2023-5b45-893a-ee9294ddeb9d